

Siunnersummut nassuiaatit

Nassuiaatit nalinginnaasut

1. Aallaqqasiut:

Aalisarneq pillugu inatsimmi siunertaq pingaardeq tassaavoq inatsisip paasuminartuunissaa, ullutsinnut naleqquttuunissaa atuisunillu atoruminartuunissaa.

Tamassuma saniatigut Naalakkersuisut inatsisissatut siunnersummi siunertaraat, nunatsinni aalisakkat naleqquttimik nungusaataanngitsimillu atorneqarnerat tunngavigalugu Kalaallit Nunaanni malittarisassaqarnissaata qulakkeerneqarnissaa.

Inatsisissatut siunnersuut aamma Kalaallit Nunaanni inuiqatigiinni annertusiartortumik naligiinnginnerup akiornissaa siunertaralugu suliniutitut aamma suliffissat qulakkeerneqarnissaat siunertaralugu suliniutitut aalisartullu isertitaqarnissamut periarfissaannik pitsanngorsaanertut isigineqassaaq. Taamaammat sinneqartoortutnik pisuussutinik inuiaqatigiit pigisaannit pilersinneqartunit aalisartut amerlanerit annertunerusumik pissarsinissaat siunertaralugu aalisakkanik pisuussutinik piginnittuunermut tunngatillugu naleqqussaanernik arlalinnik inatsisissatut siunnersummi siunnersuuteqartoqarpoq.

Naalakkersuisut siunnersuutimikkut aalisakkat inunnit amerlanerusunit aalisarneqartalernissaat kissaatigaat, taamaaliornikkullu inuit ikittuinnarnit inuiaqatigiinni aalisagassat aalisarneqartarnissaat annikillisarniarlugu. Naalakkersuisuts isumaqarput taamatut siammarsaaneq aalisarnermi suliffissaqarnerulersitsinermik kinguneqassasoq.

Naalakkersuisut siunnersuutiminni aamma sinerissap qanittuani pisassiissutit amerlinerisigut sinerissap qanittuani aalisarneq qulakkeerlugu pitsanngorsarniarpaat. Taamaammat siunnersuut aalisarnermi suliffisanut amerlisaaqataassasoq Naalakkersuisut naatsorsuutigaat. Sinerissap qanittuani aalisarnerup annertusineqareerpata nunami tunisassiorfinni sulisunik amerlanerusunik atorfissaqarttsisoqassasoq Naalakkersuisut naatsorsuutigaat.

Inatsisissatut siunnersummi siunertat ilagivaat aalisarnermik nakkutilliisut inuit suliffeqarfiallu aalisarneq pillugu malittarisassanik unioqqutitsisut pineqaatissinneqarnissaannut ajornanginnerulersitsisussanik nutaanik arlalinnik sulinikkut sakkussaqalernissaat. Aalisarnermik nakkutilliineq sunniuteqarluartoq nungusaataanngitsumik aalisarneq pillugu takorluukkat piviusunngortinniarnerannut ingerlatiinnarniarnerannullu pingaaruteqartutut Naalakkersuisut isigaat.

Aalisarneq pillugu inatsimmi atuuttumi aalajangersakkat amerlanersaat inatsisisssatut siunnersummi uani allanngortinnagit ingerlateqqinnejartut eqqamaassallugu pingaaruteqarpoq. Aalisarnerup ineriarornera peqatigalugu nutarsaanissaq siunertaralugu inatsisisssatut siunnersummi aalajangersakkat nutaat atuutilersinneqassapput.

Siunnersuut taamaalilluni innuttaasunut pisortanullu ullutsinnut naleqqunnerusunik paasiuminarnerusunillu malittarisassiornissamik kissaateqarnertut kiisalu aalisarneq pillugu inatsimmi atuuttumi naleqqutinngitsut ilaat aaqqiivigineqarnissaannik kissaateqarnertut isigineqassaaq.

2. Siunnersummi immikkoortut pingarnerit

2.1. Raajarniarnermi pisassiissutinik nammineq pigisanik piginnittuunermik nutaamik naatsorsuineq nutaaq

Pisassiissutinit nammineq pigisanik naatsorsuinermi pisaassiissutinit pigisanut toqqaannartumik piginnittuuneq aamma pisassiissutinit pigisanut aalangiisuulluni sunniuteqarneq ilanggullugit naatsorsuunneqassapput.

2.2 Kalaallit Nunaata kitaani raajat pisarineqarsinnaasutut akuerisaasut tamarmiusut 50/50-imik agguarneri

Kalaallit Nunaani raajanik pisassiissutit agguarneri 43/57 procentimiit sinerissap qanittuani raajarniarnermut 50 procentinngorlugit aamma avataasioluni raajarniarnermut 50 procentinngorlugit allanngortinngassapput. Tassunga peqatigitillugu avataasiornermi angallatiniit sinerissap qanittuani angallatinut pisassiissutinit pigisat tuninissaannut periarfissat ikilineqarput.

2.3 Raajarniarsinnaanermut akuersissutinik piffissamut killiligaanngitsunik atorunnaarsitsinissamik ukiunut tallimanut kalerrineq

Raajarniarsinnaanermut akuersissutinit piffissamut killiligaanngitsut utertinngassaat pillugu malittarisassat agguaasseqqinnissarlu Inatsisartut immikkut inatsisaanni kingusinnerusukkut aalajangersarneqassapput. Siunnersummi uani taamaallaat aalajangersarneqarpoq utertitsineq sivikinnerpaamik ukiunut tallimanut siumut nalunaaruteqarluni Inatsisartut inatsisaatigut pisinnaasoq.

2.4 Aalisarnermi uumassuseqarnikkut misissuinerit kiisalu inuussutissarsiorluni misileraalluni aalisarneq

Misileraalluni aalisarnermut kisermaassisinnaanermut periuseq atuutilersinneqarpoq, tassani misileraalluni aalisarnissamut taamaalillunilu aalisakkanik sumiiffinnillu nutaanik misissuinissamut aalisartut aningaasaqarnikkut kajumissuseqartinneqalissallutik.

2.5 Allaffissornikkut pillaammik akiligassiisarnerit

Allaffissornikkut pillaammik akiligassiisarnissamut arsaarinninnissamullu periarfissaq atuutilersinneqarpoq, tassunga ilanngullugu nalilinnik arsaarinninneq. Periarfissaq inatsisip atuuffiani tamani atuutilersinneqarpoq, taamaalilluni nalunaaruteqartarneq pisanillu tunisisarneq pillugu malittarisassanik unioqqutitsineq tunngavigalugu pillaammik akiligassiinissaq arsaarinninnissarlu allaffissornikkut aalajangerneqarsinnaallutik.

3. Pisortanut aningaasaqarnikkut allaffissornikkullu kingunissai

Pisortanut kingunissai inatsisissatut siunnersuutip immikkoortuinut ataasiakkaanut tamanut kiisalu inatsisissatut siunnersummut tamarmiusumut immikkoortillugit nalilerneqarput.

3.1 Raajarniarnemi pisassiissutinit naammineq pigisanik piginnittuunermik naatsorsuineq nutaaq

Pisassiissutinit pigisanik piginnittuunermik naatsorsuinermi siunissami pisassiissutinit pigisanik toqqaannanngitsumik pigisat aamma pisassiissutinit pigisani aalajangiisumik sunniuteqarfiusut ilanngullugit naatsorsorneqartassapput.

Raajarniarnermi piginnittuunermik naatsorsuinermi periuseq nutaaq – ullumikkut pissutsit taamaatsillugit – ingerlatseqatigiiffit ataasiakkaat pisassiissutinit pigisaminnik imaluunniit ingerlatseqatigiiffinni pigisani piginneqataassutit tunineqarnissaannut pinngitsaaliissutaassaaq.

Pisassiissutinit pigisat akit suliffeqarfinnut ataasiakkaanut nalingisa assingi atorlugit suliffeqarfiit ataasiakkaat pisassiissutinit pigisat tunisinnaanngippatigit tamanna suliffeqarfinnit taakkunanit pigisanik nalilinnik pisassiissutinit pigisanik piginnittunut nutaanut agguaasseqqinnermik kinguneqassaaq. Suliffeqarfiit namminersortut, inatsisissatut siunnersuutikkut annaasaqartut, annaasaqarnermut taarsiiffigineqarnissamik piumasaqarsinnaasut aamma eqqartuussivimmi suliami ajugaassappata siunnersuut taarsiissutissat suliami aningaasartuutit ilanngullugit annertoqataannik pisortat aningaasaqarnerannik artukkiissaaq.

Taamatut ataasiaannarluni sunniutaasinnaasup saniatigut piginnittuunermi naatsorsueriaaseq nutaaq ingerlatseqatigiiffit nutaamik aaqqissuunnerisigut avaqqunneqarsinnaanngippat inatsisissatut siunnersuutip kingunerissavaa siunissami qaninnerusumi pisortat aningaasaqarneranni 9 mio. kr.-it tikillugit siunissamilu ungasinnerusumi 13 mio. kr.-it

tikillugit *ukiumut* annaasaqartarneq. Ukiumoortumik annaasanut ilaapput aalisarnermiit akileraarutitigut iluanaarutit apparneri aamma Royal Greenlandimi sinneqartoorutit apparneri. Piffissami ungasinnerusumi annaasaqarnermut pissutaavoq inuussutissarsiummi nalorninerup annertusinera:

- *Siullermik* ingerlatseqatigiiffik ingerlatseqatifiiffinnut allanut aalajangiisuulluni sunniuteqarnersoq taamaalillunilu piginnittuunermut killiliussat naammassiniarlugit pisassiissutinit pigisat tunineqassanersut maannakkut ataasiakkaarlugit nalilersuisoqarsinnaanera inuussutissarsiortunut nalorninermik pilersitsivoq.
- *Aappaatut* ingerlatseqatigiiffinnit ataasiakkaaniit aalisarnermi maannakkut ingerlatseqatigiiffinnut allanut imaluunniit ingerlatseqatigiiffinnut nutaanut pisassiissutinik tunisineq siunissami qaninnerusumi ingerlatseqatigiiffinni taakkunani aqutsinikkut piginnaasanik misilittakkanillu annaasaqarnermik kinguneqassaaq. Piginnittut siaruarneri aamma ingerlatseqatigiiffit ataasiakkaat niuernerisa assigiinngisitaartuuneri annikillisissinnaavai. Taakku marluk aalisarnermi aningaasaliisartut nalorninerat annertusitissavaat.
- *Pingajuattut* tunisassiasanik suliffissuarnut pilersuinerup patajaatsuunera annikillisissavaa. Tamatumunnga pissutaavoq ingerlatseqatigiiffit ataasiakkaat angallatinik piginnittuujunnaarunik imaluunniit aalajangiisuullutik sunniuteqarunnaarunik aalisariutit ataasiakkaat sumi qaqugulu tunisinissamut ullumikkornit annikinnerusumik pilersaarusiorsinnaanerat.

Nalorninerup annertusinera kinguneqassaaq taarsigassarsisitsisoqarpat aningaaseriviit ernianik qaffasinnerusunik immaqa piumasaqarsinnaanerat, tamannalu aamma aalisarnermi aningaasaliisartut ilunaaruteqarnerunissamik piumasaqarnerannik kinguneqarsinnaalluni. Taamaalilluni nalorninerulerup tamassuma aalisarnermi aalisariutinut nutaanut naammassisqaqnerusinnaasunullu aningaasaliinissaq pilerinannginnerulersissavaa. Tamanna isumaqarpooq siunissami ungasinnerusumi naammassisqaqsinnaassutsip isertitallu apparnissaat.

Ingerlatseqatigiiffit pioreersut nutaallu akornanni aalajangiisumik sunniuteqarnermik aamma piginnittuunerup nuunnerani nalilersuinermut pisortanut allaffissornikkut aningaasartuutit ukiumut 500.000 kr.-inik qaffassasut nalilerneqarput.

3.2 Kaallit Nunaata kitaani raajat pisarineqarsinnaasut annerpaaffissaattut akuerineqartut 50/50-imik agguarneri

Kalaallit Nunaata Kitaani raajarniarnermi pisassiissutit agguarneri sinerissap qanittuani raajarniarnermut 50 pct.-inut aamma avataasiorluni raajarniarnermut 50 pct.-imut allanngortinneqarneri. Peqatigisaanik avataasiorluni aalisariutit sinerissap qanittuani aalisariutinut pisassiissutinit pigisanik tunisinissaannik periarfissaat ikilineqarput

Pisarineqarsinnaasutut akuerisaasut tamarmiusut annertussusaannik 50/50-imik agguaanerup kingunerissavaa avataasiorluni aalisarnermi pisassiissutinit pigisaqartunii ingerlatseqatigiiffinnit sinerissami qanittumi raajarniarnermi ingerlatseqatigiiffinnut pisassiissutinik piginnittunut pisuussutinik agguasseqqinneaq. Ingerlatseqatigiiffit namminersortut, inatsisisstat siunnersuutikkut annaasaqartut, annaasaqarnermut taarsiiffigitinnissamik piumasaqarsinnaasut aamma eqqartuussivimmi suliami ajugaassappata taarsiissutissat annertussusaannik kiisalu suliassami aningaasartuutit ilangulligit inatsisisstat siunnersuut pisortat aningaasaqarnerannut artukkiissaq.

Pisarineqarsinnaasutut akuerisaasunik tamarmiusunik 50/50-imik agguaanerup kingunerissappagu avataasiorluni aalisarnermut naammassisqaqrifiulluarnerusartumut taarsiullugu sinerissap qanittuani naammassisqaqrifiunnginnerusumut pisassiissutit annertunerusumik aalisarneqalerterat, aalisarnermi naammassisqaqrinnaassuseq tamarmiusoq appariassaq. Appasinnerusumik naammassisqaqrinnaanerup kingunerissavaa aalisarnermi aningaasartuutit qaffanneri, aamma aalisarnermiit pisortat isertitaat apparneri. Pisarineqarsinnaasutut akuerisaasunik tamarmiusunik 50/50-imik agguaneq taamaalilluni siunissami qaninnerusumi pisortat aningaasaqarneranni 24 mio. kr.-it tikillugit siunissamilu ungasinnerusumi 34 mio. kr.-it tikillugit *ukiumut* annaasaqarnermik kinguneqarsinnaavoq.

Taamaattorli nalorninarluni 50/50-imik agguaneq pisassiissutinik kikkut aalisartuunerinik paarlaattoqarneranik kinguneqassanersoq. Tamatumunnga pissutaavoq pisarineqarsinnaasutut akuerisaasut tamarmiusut 50 pct.-iisa missaaniittut sinerissap qanittuani aalisarnermi ullumikkut piviusumik aalisarneqarnerinut naapertuuttumik avataasiorluni aalisarnermiit sinerissap qanittuani aalisarnermut ukiumut pisassiissutit ullumikkut tunineqartarneri. Inatsisisstat siunnersuutikkut siunissami avataasiorluni aalisarnermiit sinerissap qanittuani aalisarnermut ukiumut pisassiissutinik tunisisarnermik akornusiisumik allannguisoqassaaq. Avataasiorluni aalisarnermiit sinerissap qanittuani aalisarnermut siunissami ukiumut pisassiissutinik tunisisinnaaneq taamaalilluni ajornarsippat kikkut pisassiissutinik aalisarnerannik allanngortoqassanngilaq, aamma naammassisqaqrinnaassutsimik appariartoqarnani.

Naliliisoqarpoq Pisassissutit 50/50-imik agguarnerinut atasumik allaffissornikkut annertuunik aningaasartuuteqassanngitsoq.

3.3 Sivikinnerpaamik ukiunut tallimanut siumut nalunaaruteqarluni atorunnaarsitsineq

Raajarniarsinnaanermut piffissamut killiligaanngitsumik akuersissutinik utertitsinermut kiisalu agguasseqqinermut malittarisassat immikkut inatsisikkut kingusinnerusukkut aalajangersarneqassapput. Siunnersuummi matumani sivikinnerpaamik ukiunut tallimanut siumut nalunaaruteqarluni Inatsisartut inatsisaatigut utertitsinissaq taamaallaat aalajangersarneqarpoq.

“Pissusissamisoortumik kalerrilluni” piffissamut killilingaanngitsumut akuersissutinik utertitsisinnaaneq ullumikkut periarfissaareerpoq. Ingerlatseqatigiiffiit ullumikkut akuersissutit piffissamut killilingaanngitsutut isigippatigit, aamma ingerlatseqatigiiffiit atorunnaarsitsinissamut kalerrinerup aalajangerneqarnera piffissamut killilingaanngitsumut piginnittuunermiit piffissamut killilimmuit piginnittuunermut nuunnertut isigippassuk, atorunnaarsitsinissamut kalerrineq namminermi aalisarnermi ingerlatseqatigiiffiit akornanni siunissami pisassiissutit pillugit nalornineq qaffassinnaavoq. Aalisarnermi aningaasaliinerit siunissamut ungasissumut aningaasaliinerummata aamma aalisarsinnaanermut akuersissutit piffissamit aalisarsinnaanermut akuersissutit piffissamut killiligaalerannerannit ukiut tallimalluunniit qaangiunneranni pisassiissutinik allanngueriataarsinnaaneq ullumikkut aalisarnermut aningaasaliinissamik pilerinannginnerulersitsisinnavaoq.

Aningaasaliisinnanaerit qaffassisusiisa apparnerata kingunerissavaa naammassisqaqsinnaassutsip isertitallu siunissami apparnerat. Atorunnaarsitsinissamut kalerrineq siunissami ungasinnerusumi aalisarnermiit pisortat isertitaasa 13 aamma 91 mio. kr.-it akornanni ukiumut apparnerannik kinguneqarsinnaavoq. Annertuumik assigiinngissuteqarnerat inuussutissarsiummi nalorninerulererup annertussusilerneqarnissaanik nalornissuteqarnermik takutitsivoq.

3.4 Ataatsimut naliliineq

Pisortat aningaasaqarneranni ataasiartumik sunniutit saniatigut inatsisisstatut siunnersuut ataatsimut isigalugu siunissami qanittumi 33 mio. kr.-it tikillugit siunissamilu ungasinnerusumi 14 aamma 130 mio. kr.-it akornanni aalisarnermiit pisortat ukiumut isertitaat annikillissasut nalilerneqarpoq.

Kisitsisit annertuumik nalorninartortaqarput, isertitalli appariarnerat inuiaqatigiit aningaasaqarnerannut tunngaviusumik sunniutinik atuuttussaasunik marlussunnik takutitsivoq

Siullermik pisassiissutit 50/50-imik agguarneqarneri kinguneqarsinnaavoq avataasiorluni aalisarnermut naammassisqaqluarnerusumut taarsiullugu sinerissap qanittuani naammassisqaqfiunginnerusumut pisassiissutit annertunerusumik aalisarneqalernerat. Taamaalilluni naammassisqaqsinnaassuseq tamarmiusoq aalisarnermiillu akileraarutinik isertitat tamarmiusut apparsinnaapput.

Aappaatut inatsisisstatut siunnersuut immikkoortunik arlalinnik inuussutissarsiummi nalorninerulersitsisinnavaoq. Nalorninerulererup aalisarnermi angallatinut nutaanut aningaasaliinissaq pilerinannginnerulersissavaa. Tamassuma kingunerissavaa siunissami ungasinnerusumi naammassisqaqsinnaassuseq aamma akileraarutinik isertitat appaqqissasut.

4. Inuussutissarsiutinut aningaasaqarnikkut allaffissornikkullu kingunissai

Inuussutissarsiortunut kingunissai inatsisisstatut siunnersuutip immikkoortuinut ataasiakkaanut tamanut kiisalu inatsisisstatut siunnersummut tamarmiusumut nalilerneqarput.

4.1 Pisassiissutinit pigisanik piginnittuunermik naatsorsuineq

Pisassiissutinit pigisanik piginnittuunermik naatsorsuinermi siunissami pisassiissutinit pigisanik toqqaannanngitsumik pigisat aamma pisassiissutinit pigisanik aalajangiisumik sunniuteqarfiusut ilanngullugit naatsorsorneqartassapput.

Raajarniarnermi piginnittuunermik naatsorsuinermi periuseq nutaaq – ullumikkut pissutsit taamaatsillugit – ingerlatseqatigiiffit ataasiakkaat pisassiissutinit pigisaminnik imaluunniit ingerlatseqatigiiffinni pigisani piginneqataassutit tunineqarnissaannut pinngitsaaliissutaassaaq.

Pisassiissutinit pigisat akit ingerlatseqatigiiffinnut ataasiakkaanut nalingisa assingi atorlugit ingerlatseqatigiiffit ataasiakkaat pisassiissutinit pigisat tunisinnaangippatigit tamanna ingerlatseqatigiiffinnit taakkunanit pigisanik nalilinnik pisassiissutinit pigisanik piginnittunut nutaanut agguaasseqqinnermik kinguneqassaaq.

Pisuussutinik ataasiartumik agguaasseqqinnerup saniatigut ingerlatseqatigiiffinnit ataasiakkaaniit aalisartunut allanut tunisinermi akit qaffasinnerusut aqqtigalugit isertitat allatut agguaanneqaqqissinnaapput. Piginnittuunermi naatsorsuinerup allanngortinera pissutigalugu aalisartoq ataaseq, imaluunniit avataasiorluni aalisarnermiit sinerissap qanittuani aalisarnermut ukiumoortumik pisassiissutit tunineqarnissaannut periarfissat annikillippata, toqqaannartumik piginnittuunermiit imaluunniit ingerlatseqatigiiffinnit angisuunit ataasiakkaanit aqunneqartumik siunissami attaviitsunngorpat, tunisinermi akit aalajangerneqartussanngorpata, aalisartoq siunissami isumaqatiginninniarnissami pitsaunerusumik inissismalissaqq, tassa aalisartoq unammillertimut nuunnissaminut killilersorneqarnani periarfissaqassamat. Siunissami tunitsivissatut periarfissat nutaat pilersinneqarpata unammilleqatigiinnerlu qaffalluni, aalisartut suli pitsaunerusumik inissismalissaapput.

Piginnittuunermik naatsorsuinerit nutaat sunniuitit immikkut ittut assigiinngitsut arlallit aqqtigalugit inuussutissarsiummi nalorninerulersitsisinhaapput:

- *Siullermik* ingerlatseqatigiiffinnit ataasiakkaaniit aalisarnermi maannakkut ingerlatseqattigiiffinnut allanut imaluunniit ingerlatseqatigiiffinnut nutaanut pisassiissutinik tunisineq siunissami qaninnerusumi ingerlatseqatigiiffinni taakkunani aqutsinikkut piginnaasanik misilittakkanillu annaasaqarnermik kinguneqassaaq. Piginittut siaruernerini aamma ingerlatseqatigiiffit ataasiakkaat niuernerisa

assigiinngisitaartuuneri annikillisinneqarsinnaapput. Taakku marluk aalisarnermi aningaasaliisartut nalornissuteqarnerulersissavaat.

- *Aappaatut* tunisassiorfinnut pilersuinerup patajaatsuuunera annikillisissavaa. Tamatumunga pissutaavoq ingerlatseqatigiiffit ataasiakkaat angallatinut piginnittuujunnaarunik imaluunniit aalajangiisuuullutik sunniuteqarunnaarunik ullumikkornit angallatit ataasiakkaat sumi qaqugulu tunisinissaannik pilersaarusiorsinnaanerisa annikillinera.

Nalorninerup annertusinera kinguneqassaaq taarsigassarsisitsisoqarpat aningaaseriviit ernianik qaffasinnerusunik piumasaqarsinnaanerat, tamannalu aamma aalisarnermi aningaasaliisartut iluanaaruteqarnerunissamik piumasaqarnerannik kinguneqarsinnaalluni. Taamaalilluni nalornissuteqarnerulerneq aalisarnermi angallatinut nutaanut naammassisqaarnerusinnaasunullu aningaasaliinissaq pilerinannginnerulissaaq. Taassuma kingunerissavaa siunissami ungasinnerusumi naammassisqaarsinnaassutsip isertitallu ikilieriarnissaat. Naliliisoqarpoq piginnittuunermik naatsorsuisarneq nutaaq inuiaqatigiinni ilangaaseereernani isertitat tamarmiusut (BNP) siunissami ungasinnerusumi ukiumut 19 mio. kr. *tikillugit* ikilieriarnernik kinguneqarsinnaasoq.

4.2 Pisassiissutit 50/50-imik agguarneri

Kalaallit Nunaata kitaani raajarniarnermi pisassiissutit agguarneri sinerissap qanittuani raajarniarnermut 50 pct.-inut aamma avataasiorluni raajarniarnermut 50 pct.-imut allanngortinneqarput. Peqatigisaanik avataasiorluni aalisariutiniit sinerissap qanittuani aalisariutinut pisassiissutinit pigisanik tunisinissamut periarfissat ikilineqarput.

Pisarineqarsinnaasutut akuerisaasut tamarmiusut annertussusaannik 50/50-imik agguaanerup avataasiorluni aalisarnermi suliffeqarfinnit pisassiissutinik pigisaqartunit sinerissap qanittuani raajarniarnermi suliffeqarfinnut pisassiissutinik piginnittunut pisuussutinik agguasseqqinneq kingunerissavaa.

Pisarineqarsinnaasutut akuerisaasunik tamarmiusunit 50/50-imik agguaneq kinguneqarpat pisassiissutit avataasiorluni aalisarnermut naammassisqaarfiunerasinnaasumut taarsiullugu sinerissap qanittuani aalisarnermi naammassisqaarfiunnginnerusartumi annertunerusumik aalisarneqassasut aalisarnermi naammassisqaarsinnaassuseq tamarmiusoq appariassaaq. Appasinnerusumik naammassisqaarsinnaaneq aalisarnermi aningaasartuitit qaffannerinik aalisarnermilu isertitat ikilineranik kinguneqassaaq. Taamaattoqassappat naliliisoqarpoq BNP siunissami qaninnermi ukiumut 12 mio. kr.-it tikillugit appassasoq.

Naammassisqaarsinnaassuseq appasinnerusoq kinguneqarsinnaavoq. Angallatit mikinerulerpata pisqaaunerulerlutilu aalisarnermi suliffissaqartitsineq qaffassasoq, pisassiissutillu aalisarnissaannut sulisut amerlanerusut pisariaqartinneqassallutik. Peqatigisaanik pisassiissutit annertunerusut sinerissap qanittuani aalisarneqarpata

suliffissuarni sulisut amerlissapput. Siunissami qaninnermi suliffeqarnerup qaffannerata suliffissaaleqineq appartissinnaavaa. Siunissamili ungasinnerusumi suliffissaaleqineq appassangilaq, paarlattuanilli Kalaallit Nunaanni aningaasarsiornermi immikkoortuni allani suliffeqarneq apparluni. Suliffeqarneq inuiaqatigiinni immikkoortuni allani apparpal isertitat ikilissapput. Aalisarnermi suliffit qaffannerisa akerlianik immikkut isertitaqarnermik pilersitsissangilaq, tassa pisassiissutit qaffanngimmata. Taamaattumik Kalaallit Nunaanni tamarmiusumik naleqarnerulersitsineq appassaaq. Siunissami ungasinnerusumi tunisassiat ataatsimut nalii 46 mio. kr.-it tikillugit appassasut nalilerneqarpoq.

Kisiannili 50/50-imik agguaanermi pisassiissutinik kikkut aalisalernerannik kinguneqassanersoq nalorninarpoq. Tamassumunnga pissutaavoq pisarineqarsinnaasutut akuerisaasut tamarmiusut 50 pct.-iisa missaaniittunit sinerissap qanittuani ullumikkut aalisarneqartareersut amerlaqataannit ukiumoortumik pisassiissutinik avataasiorluni aalisarnermit sinerissap qanittuani aalisarnermut ullumikkut nuussisoqartarnera. Siunnersummi allannguinikkut ukiumoortumik pisassiissutinik avataasiorluni aalisarnermit sinerissap qanittuanut aalisarnermi siunissami tunisisarnissaq pinngitsoortinneqassaaq. Taamaaliornikkut ukiumoortumik pisassiissutinik avataasiorluni aalisarnermit sinerissap qanittuani aalisarnermit nuussisoqarsinnaanngippat pisassiissutinik aalisartartut allanngornaviangillat, taamaalillunilu aalisarsinnaassuseqarneq appasanani aningaasaqarnermilu allani isertitarineqartartut appasanatik.

4.3 Sivikinnerpaamik ukiunik tallimanut siumut nalunaaruteqareerluni atorunnaarsitsineq

Raajanut piffissamut killiligaanngitsumut akuersissutinik utertitsinermut kiisalu agguasseqqinnermut malittarisassat immikkut kingusinnerusukkut inatsisikkut aalajangersarneqassapput. Siunnersummi matumani sivikinnerpaamik ukiunut tallimanut siumut nalunaaruteqareerluni utertitsinissaq Inatsisartut inatsisaanni taamaallaat pineqarpoq.

“Pissusissamisoortumik siumut nalunaaruteqarluni” piffissamut killiligaanngitsumut akuersissutinik utertitsisinnaaneq ullumikkut periarfissaareerpoq. Atorunnaarsitsinissamut siumut nalunaaruteqarnermik ilangussineq nammineq siunissami pisassiissutissanik aalisarnermi ingerlatseqatigiiffinnut nalorninerulersitsissaaq. Aalisarnermi piffissamut sivisuumut aningaasaliisoqartarmat, aamma piffissamit aalisarsinnaanermut akuersissutit piffissamut killeqalersinnerannit ukiut tallimalluunniit qaangiunneranni pisassiissutinik allanngueriataarsinnaaneq ullumikkut aalisarnermut aningaasaliinissaq pilerinannginnerulersissinnaavaa.

Aningaasaliisinnaanerit qaffassisusiata apparnera kinguneqarsinnaavoq naammassisqaqsinnaassutsip isertitllu piffissami sivisuunerusumi apparneri. Siumut nalunaaruteqarluni atorunnaarsitsineq BNP-p 17 aamma 124 mio. kr.-it akornanni ukiumut ikileriarnerannik kinguneqarsinnaavoq. Aningaasat taakku assigiinngitsorujussuunerata

inuussutissarsiummi nalorninerulererup annertussusilernissaanut annertuumik nalornineq takutippaa.

4.4 Ataatsimut naliliineq

Inatsisisatut siunnersuutikkut Kalaallit Nunaanni isertitat BNP-mut uuttorgugit siunissami qaninnermi 12 mio. kr.-it tikillugit siunissamilu ungasinnerusumi 180 mio. kr.-ikileriartissavai. Kisitsisit taakku annertuumik nalorninartoqarput, isertitalli ikileriarneri inuiaqatigiit tunngaviusumik aningaasaqarnerannut sunniutinut uku atuutissallutik:

Siullermik pisassiissutit 50-50-imik agguardeqarneri kinguneqarsinnaavoq avataasiorluni aalisarnermi naammassisaqarfialluarnerusumi aalisarneqarneqarannut taarsiullugu annerusumik sinerissap qanittuani naammassisaqarfiallunginnerusartumi aalisarneqalernerri. Taamaalilluni aalisarnermi naammassisaqarsinnaassuseq tamarmiusoq appassaaq isertitallu tamarmiusut ikilillutik.

Aappaatut inatsisisatut siunnersuut inuussutissarsiummi nalorninerulersitsisunik immikkoortunik arlalinnik imaqrpoq. Nalorninerulererup aalisarnermi angallatinut nutaanut aningaasaliinissaq pilerinannginnerulersissavaa. Tamassuma kingunerissavaa siunissami ungasinnerusumi naammassisaqarsinnaassutsip appariaqqinnera isertitallu ikileriaqqinnerat.

Pingajuattut naammassisaqarsinnaassutsip apparnera angallatit mikinerulerpata pisoqaanerulerpatalu aalisarnermi suliffissaqartitsinerup qaffanneranik kinguneqassaaq, taamaalillunilu pisassiissutit aalisarnissaannut sulisut amerlanerusut atorfissaqartinneqassallutik. Peqatigisaanik pisassiissutit annertunerit sinerissap qanittuani aalisarneqarpata suliffissuarnullu tunineqarlutik suliffissuarni sulisut amerlissapput. Piffissami sivikitsumi suliffissaqartitsineq qaffatsinneqarsinnaavoq suliffissaaleqisullu ikilisinneqarlutik. Piffissamili sivisunerusumi suliffissaaleqisut ikilissangillat, tassungali taarsiullugu Kalaallit Nunaanni aningaasaqarnermi immikkoortuni allani suliffissaaleqisut ikilissallutik. Inuiaqatigiinni immikkoortuni allani sulisut ikilippata isertitat ikilissapput. Aalisarnermili sulisut amerlinerini akerlianik immikkut isertitaqarnermk pilersitsissanngilaq, tassa pisassiissutit amerlanerulernavianngimmata. Taamaammat Kalaallit Nunaanni BNP-mi naleqarnerulersitsineq tamarmiusoq ikileriassaaq.

Pisassiissutit *agguaateqqinnejnarisa*, nammineq inuiaqatigiit aningaasaqarneranni annaasaqarfialngitsup, pisortat aningaasaqarnerisa appartinneranik siunnersuut aamma kinguneqassaaq. Pisassiissutit piginnittunut naleqarmata pisassiissutinik maannakkut piginnittuniit piginnittunut nutaanut agguasseqqinnerup aningaasanik nalilinnik (imaluunniit *pigisanik* imaluunniit *atingaasaatinik*) agguasseqqinnej assigissavaa:

- Pisarineqarsinnaasutut akuerineqartunik tamarmiusunik 50/50-imik agguaneq avataasiorluni aalisarnermi ingerlatseqatigiiffit sinerissap qanittuani raajarniarnermi

pisassiissutinit pigisaqartut aningaasanik naleqartunik pigisaannik agguuaasseqqinnermik kinguneqassaaq.

- Raajarniarnermi piginnituunermik naatsorsuinermi periutsip nutaap ingerlatseqatigiiffit ataasiakkaat pisassiissutinit pigisanik imaluunniit ingerlatseqatigiiffinni pigisani piginneqataassutsit tunineqarnissaannut pinngitsaolineqarsinnaapput. Ingerlatseqatigiiffit taakku pisassiissutinit pigisat naliinut naapertuuttumik tunisinnaanngippatigit tamanna ingerlatseqatigiiffit taakku pisassiissutinit pigisanik piginnittunut nutaanut agguasseqqinnererannik kinguneqassaaq.

5. Avatangiisinut, pinngortitamut inuillu peqqissusiannut kingunissat

Siunnersuut avatangiisinut, pinngortitamut inuillu peqqissusiannut toqqaannartumik kinguneqassasoq ilimagineqanngilaq.

6. Innuttaasunut kingunissat

Siunnersuut innuttaasunut toqqaannartumik kinguneqassasoq ilimagineqanngilaq.

7. Kingunissat allat annertuut

Siunnersuut toqqaannartumik annertuunik allanik kinguneqassasoq ilimagineqanngilaq.

8. Oqartussanut kattuffinnullu il.il. tusarniaaneq

Siunnersuut piffissami aggustusip 14-ianit septembaarip 22-iani 2017-imut pisortatigoortumik Naalakkersuisut nittartagaatigut takusassiatut saqqumisinneqarpoq aamma ukununnga tusarniutigineqarluni:

- Naalakkersuisut Siulittaasuata Naalakkersuisoqarfia
- Pinngortitamut Avatangiisinullu Naalakkersuisoqarfik.
- Isumaginninnermut, Ilaqutariinnermut, Naligiisitaanermut inatsisinillu atuutsitsinermut Naalakkersuisoqarfik
- Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik
- Aningasaqarnermut Akileraartarnermullu Naalakkersuisoqarfik
- Akileraartarnermut Aqutsisoqarfik
- Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik
- Peqqissutsimut Naalakkersuisoqarfik
- Namminiilivinnermut, Nunanut Allanut Nunalerinermullu Naalakkersuisoqarfik

- Kommuninut, Nunaqarfinnut, Isorliunerusunut, Attaveqaqtigijinnermut Ineqarnermullu Naalakkersuisoqarfik
- Aatsitassanut Ikummatisanullu Naalakkersuisoqarfik
- Kalaallit Nunaanni Aalisartut Piniartullu Kattuffiat (KNAPK)
- Kalaallit Nunaanni Kommunit Kattuffiat (KANUKOKA)
- NUSUKA
- SQAPK
- Kalaallit Nunaanni Sulisitsisut
- Sulinermik Inuussutissarsiuteqartut Kattuffiat (SIK)
- Pinngortitaleriffik
- Polar Seafood A/S
- Royal Greenland A/S
- Halibut Greenland ApS
- Kalaallit Nunaanni Politiit
- Issittumi Sakkutooqarfik
- Den Europæiske Union
- Kommuneqarfik Sermersooq
- Qaasuitsup Kommunia
- Kommune Kujalleq
- Qeqqata kommune:
- GrønlandsBANKEN
- Advokatfirmaet Malling-HansenDamm
- Nunatsinni Advokatit – Grønlandske Advokater
- WWF – Verdensnaturfonden
- Transparency International Greenland

Piffissap tusarniaaffiusup kingorna siunnersuut oqaaseqaatinik ataani allassimasunik kinguneqarpoq. Tassunga atatillugu oqaatigineqassaaq tusarniaanermi akissutit taamaallaat pingaaruteqarneranik naliliineq tunuliaqutaralugu pingaarnersiorlugit issuarneqarmata. Tusarniaanermi akissutinut Naalakkersuisoqarfiup oqaaseqaatai uingasumik allanneqarput.

Pinngortitamut Avatangiisinullu Naalakkersuisoqarfik.

Naalakkersuisoqarfiup tusarniummut akissuteqaatimini siunnersuummi siunertarineqarmat kalaallit nunaanni inuiaqatigiinnut aalajangersakkanik pisuussutit pillugit piujaannartitsinermik tunngaveqarluni atuilluarernut aallaaveqartumik tunngaveqarmat iluarismaarpaa. Naalakkersuisoqarfiuttaaq aalisarneq pillugu maleruagassanik unioqqutitsinerni aalisarnermi nakkutilliisuutitat nutaanik arlaqartunik sulinikkut sakkussanik periarfissinneqarmata iluarismaarpaa, tassami angusaqarfiulluartumik nakkutilliinerup qulakkeerneqarnissaa pingaaruteqarmat aammalu inatsisip atuutsinneqarnerata aalisarneq piujaannartitsinermik tunngaveqartumik ingerlanneqarnissaa qulakkiissammagu. Naalakkersuisoqarfiup siunnersuutigivaa ilisimatuussutsikkut ilisimatusarnerit pingaaruteqartut ilangunneqarnissaat aamma nakkutilliineq kiisalu piffinni ilisimasat

aqutsinissami tunngaviusunut atatillugu siunnersuummi oqaaseqaataasut § 2, imm. 1, nr. 1- imi allassimaneri ersarissarneqassasut.

Siunnersuummi § 22, imm. 3-mi aalajangersarneqareerpoq aalisakkanik pisarineqarsinnaasutut akuerisaasunik annerpaaffiliineq uumassusilerisut innersuuteqarnerisigut aalisarnermilu aqutsinissamik pilersaarutinik akuerisaasunik isiginninniarluni tunngaveqassasut. Toqqaannartumik piffinni ilisimasat taaneqannngikkarluartut aalisarnermi aqutsinissamik pilersaarusiornermi piffinni ilisimasat ilanngullugit suliarineqarsinnaatitaapput.

Pinngortitamut Avatangiisinullu Naalakkersuisoqarfiup siunnersuummi § 2, imm. 1, nr. 2 naleqqussarneqassasoq atuilluarnerup nammaqatigiissarneqarnissaa anguniarneqassasoq pingaaruteqartoq taamaasiornikkullu inuiaqatigiinnut aningasaqarnikkut sunniutissat piffissaq ungasinnerusoq eqqarsaatigalugu annerpaaffiusinnaanissaanut anguniakkat ersarissarneqassammata innersuussuteqarluni.

Aalisarnerup avatangiisinut sunniuteqarsinnaanerata nammaqatigiissumik inissisimanissaanut pingaaruteqassusia siunnersuummi § 2, imm. 1, nr. 1-imi erseqqissarneqareerpoq.

Isumaginninnermut, Ilaqtariinnermut, Naligiisitaanermut inatsisinillu atuutsitsinermut Naalakkersuisoqarfik

Naalakkersuisoqarfiup maluginiarpaq inuttut atukkatigut siunnersuut kinguneqartitsisinnaasoq siunnersuummi anguniakkatut siunnerfik anguneqassaneroq anguneqassannginnersorluunniit apeqquataillugu. Taamaammat kaammattutigineqarpoq inuttut atukkatigut kinguneqartitsisoqarsinnaaneranut siunnersuutip oqaaseqaasiornieranut atatillugu nalorninartoqarsinnaaneranik nalilersuuteqaqqusilluni.

Siunnersuutip oqaaseqaasiornerani annerusumik siunnersuummi toqqannartumik kinguneqartsinissat sammineqarput. Kinguneqartitsisinnaanermut sunniutissat siaruarsimavallaamik allaaserissagaanni kinguneqassaaq.

Aningasaqarnermut Akileraartarnermullu Naalakkersuisoqarfik

Naalakkersuisoqarfiup tusarniuteqarnermi akissuteqaateqarnermini siunnersuutigivaa inatsimmi aalajangiisumik periusissatut tunngaviusariaqartoq aalisakkanut ataasiakkaanut atatillugu aalisarsinnaassuseq nutaaq akuerineqartassanngitsoq, aalisarneqartussanut atatillugu pisassiissutinullu imaluunniit aalisarnermi pineqartumi aalisarsinnaassutsip sinnerlugu aalisarsinnaassutsip inisisimareerneratigut peqareertillugulu akuersisoqartannginnissaanik. Naalakkersuisoqarfiup siunnersuutini tunngavilfersorpaa, aalisarnermi imminut akilersinnaassutsip sunniutai taamatut aalisarsinnaasutsip sinnerlugu ilaneqarneratigut ajortumik sunniuteqalertarmat.

Siunnersummi kingunerisassatut sunniutit eqqartorneqarneranut atatillugu Naalakkersuisoqarfik oqaaseqaateqarpoq naliliillunilu, inatsisisstatut siunnersummi aningaasaqarnikkut sunniutissat allaaserineqartut imaannaanngitsumik qularnartunik amigaateqartoq. Pisussanut atatillugu itisiliinernik aamma allaaserinninnernik maqaasisaqarput aamma aningaasatigut sunniutissat pillugit kingunerisinhaasaannut nalilersuuteqarnermi periutsinut tunngaviit pillugit. Siunnersuut tabelimik ilalerneqartariaqartoq piffissamut qaninnermut tunngasunik sunniutinik imaqartumik, soorlu assersuutigalugu ukiut tallimanut aamma piffissami ungasinnerusumi soorlu ukiuni 20-ni kingunerineqarsinnaasunik takutitsumik. Aammattaaq BNP-ip sunniutissaasa saniatigut aalisarnermi inuussutissarsiuteqartut ingerlatsinerminnut aningaasaqarnerannut tunngatillugu kingunerineqarsinnaasunik allaaserisanik aamma akileraarutit akitsuutinillu sunniutissat pillugit sunnerneqarneri ilanggullugit takussutissiisunik. Pisunut ataasiakkaanut atatillugu sunniutaasinnaasut ilisimanngikkaanni, iluaqtissaq siunertalarugu periusissanik suliaqarnernik aallarnisaasoqarsinnaagaluartooq innersuussutigineqarluni politikkikkut oqartussaasut siunnersummut aalajangiilersigatik pisunut ataasiakkaanut pisussaatitatut ilimanaateqartutut naatsorsuutinut naliliissuteqarsinnaaqquillugit.

Aningaasaqarnermut Akileraartarnermullu Naalakkersuisoqarfip tassunga atatillugu inatsimmi oqaasertanut aamma oqaaseqaataasinnaasunut atatillugu siunnersuutinik arlaqartunik siunnersuuteqarput.

Naalakkersuisut siunnersuut pillugu sapinngisamik aningaasatigut sunniutissat pillugit paasissutissaqarnissamik pisariaqartitsisoqarnera kissaateqartoqarneralu paasilluarpaat. Siunnersuuteqarnermi oqaaseqaateqarnermi aningaasaqarnikkut sunniutit pillugit naatsorsuinerit kisimiillutik saqqummiunneqartussaapput. Siunnersuuteqarnermi tunuliaqutitut paasissutissat imaluunniit naatsorsuineri tunngaviit oqaaseqaasiornermi ilaasussaanngillat. Taamaattorli siunnersummut ilanggussatut peqataatinneqarsinnaapput. Naalakkersuisut aalisarneq pillugu inatsisisamut siunnersuusiornermi naatsorsuutit suliarineqarsimasut naammaginartumik tunngaviliisutut nalilerpaat, naatsorsuutit kinguneqartitsilluni sunniutissat suut pillugit ersersitsimmata, siunnersuut akuerineqassappat sunniutaasinnaasut pillugit. Siunnersuutip suliarineqarluni eqqartorneqannginnera sioqqullugu misissuinernik suli pisariaqartitsisoqarneranik oqariartuuteqarneq Naalakkersuisut isumaqataaffiginngilaat.

Akileraartarnermi Aqutsisoqarfik

Aqutsisoqarfip tusarniaanermi akissuteqarnermini siunnersummut atatillugu oqaaseqaatigineqartunut tunngatillugu aningaasatigut naatsorsuinerntunulialaqutit ersarinnerusut ilisimanagit oqaaseqarpoq taamaammallu Akileraartarnermi Aqutsisoqarfik aningaasanut tunngatillugu oqaaseqaateqarsinnaanera ajornakusoorluni. Aqutsisoqarfip nalilerlugu oqaatigivaa oqaaseqaatigineqartuni missangersuilluni aningaasatigut annaasassatut saqqummiunneqartut tamatigoortumik amerlasuunerik minnaarilluni missangersuusiorneqartut isumaqarlni.

Nangilluni aqutsisoqarfik oqaaseqarpoq pisussatut naatsorsuutigineqartut assingusunut aallaaveqassagaanni ullumi raajanut akitsummut iluanaaruteqartarneq nalilliissutigalugu, aqutsisoqarfip raajartassat agguarneqartarnerisa 50/50-imut allannguiteqartinneqarneratigut tamakkiisumik 58,6 mio. Kr.-inik annaasaqarfiussasoq naatsorsorsimallugu oqaatigivaa.

Aqutsisoqarfip akissuteqaateqarnermini nassuerutigivaattaaq iluanaarutinit annaasaqataasussatut naatsorsukkatik amerlassuseqartereerlugu sineriammut qanittumi raajarniarnermit akileraarutitigut akitsuutitigullu iluanaaruteqarnerulerermik taarserneqarumaartut oqaatigisariaqarlugu. Tassunga atatillugu Aqutsisoqarfik oqaaseqaateqarpoq “siunnersuummi ersersinneqanngimmat amerlassutaanerulersussat qanoq agguaanneqarnissaat, aalisarnermit tassannga ersarissumik missangiilluni amerlanernik iluanaarutinik naatsorsuinissamik perarfissaqanngilaq, Aqutsisoqarfippi nalileraa tunngaviusumik iluanaarut tamanna 10-20 mio. Kr.-it akornanni inisisimasinnaassasoq. Taamatut oqariarluni tunngavilersuutigivaa nutaatut ingerlatsisussanik eqpartuisoqartussammat taakkua aningaasaliissutinik nutaanik pilersitsisussasut, tamatumalu kingunerissagaa annertunerusunik nalikilliliissuteqarnissat taamaasilluni siunissaq qaninnerusoq eqqarsaatigalugu aningaasarsiat akileraaruteqaataasussat ikinnerusut pilersinneqassasut. Sinerissap qanittuani raajarniarnermi landskarsimut iluanaarutaasussatut naatsorsuutigineqarsinnaasut qulaani missangerlugu 10-20 mio. Kr.-it ataatingaatsiarlugit angusaqarfiunissaat ilimagisariaqartoq, tamatumalu avataasiroluni raajarniarnermi iluanaarutitigut annaasaqatissat amerlassusaannut qanillatoriaataasinnaasutut oqaatigineqarsinnaagatik.

Taakkua saniatigut Royal Greenland A/S-imit sinneqartoorutinit annaasaqaatit maannamut sanilliullugu pisassiissutinit pigisat ikileriarneratigut pisussat ilanngulligit, tamatumalu kingunerisinnaagaa iluanaarutinit pissarsiassanit ikiliaateqartitsinerit pisinnaasut tassungalu ilanngullugu Namminersornerusut eqorneqarlutik.

*Naalakkersuisunittaaq naatsorsuutigineqarpoq raajartassat 50/50-nngorlugit
agguaanneqartalernissaasa landskarsimut iluanaarutiitigut annaasaqataaffeqarnissaa.
Agguaserryaatsilli 50/50-imut allannguiteqartinneqarnerata kingunerissavaa aalisarnermi
suliffissaqartitsinerulernissaq, tamannalu agguaserryaatsip allanngortinneqarnerata
kingunerisaanik sineriammut qanittumi raajarniarnermi sulisussaqartitsinerulernissamik
pilersitsiffulernissa naatsorsuutigineqarmat. Pisassiissutinit amerlanerusunik sinerissap
qanittuani aalisartoqarternissaata Kalaallillu Nunaanni tunisassiorfinnut tulaassassaaneri
peqqutigalugit aalisarnermi sulisussaqarnerulersitsinissaq amerleriaateqassaaq, tamatumalu
pifinni ataasiakkaani inuiaqatigiinnut iluaqutaasumik aamma kinguneqartitsissaaq.*

Akileraartarnermut Aqutsisoqarfip oqaatigivaattaaq “killiligaanngitsumik akuersissutit ukiuni tallimani sioqqutsilluni nalunaaruteqarnikkut killilikkamik akuersissutit allanngortinnissaat, Inatsisartut inatsisissaannik nutaamik aalajangersaanikkut”. Aqutsisoqarfippi nalilerpaa piginnittuusut akornanni allannguiteqartitsinerit aamma

aalajangiisuumik sunniuteqarsinnaanerit piffissamik sivikippallaamik atorunnaarsitsinissamik nalunaaruteqarnermut sanilliullugu maannamut siunissamullu aningaasaliissuteqartunut angisuumik nalornisitsisoqartoq aamma aningaasaliissuteqartussat ikilinissaat aamma/imaluunniit iluanaaruteqarnerulernissamik amerlanernik piumasaqalernerit aamma erniatigut akiliuteqarnermut atatillugu.

Siunnersuummi § 15, imm. 2 naapertorlugu killiligaanngitsumik akuersissuteqarnermut killilikamik akuersissuteqalernissamut sanilliullugu siusinaarluni kalerreereernissaq sivikinnerpaamik ukiuni tallimanik sivisussuseqassasoq aalajangersarneqarpoq. Naatsorsuutigineqarpoq Inatsisartut nutaamik immikkut inatsisiilornermikkut piffissap sivisussusilernissaa aalajangersassagaat. Matumani inuussutissarsiuteqartut periarfissinneqarumaarpot ilanngunnissaannik allallu soqutigisaqartut ilanngullugit.

Aamma oqaatigineqassaaq Inatsisartut inatsisissaattut siunnersuutinik saqqummiussineq ajornakusooruteqassasoq, siunnersuutigineqartut pillugit nalorninartunik pilersitsisoqanngippat. Taamatut oqariarluta taama Naalakkersuisut isumaqarput nalorninartorsiorneq pissusissamisoortuunngitsoq sapinngisamillu minnerpaaffissaminiitinneqartariaqartoq.

Kalaallit Nunaanni Aalisartut Piniartullu Kattuffiat (KNAPK)

KNAPK-p qitiusumik isornartorsiuttaa tassaavoq siunnersuutip sukumiinerusumik kingunissaanik takussutissanik amigaateqartoq.

KNAPK siunnersuummi aalajangersakkanut arlalinnut isumaqataalluni ilaliivoq, ilaatigut umiatsiaaqhat GR normulerneqarnissaannik piumasaqaateqalernissat, aamma piumasaqaatissatut siunnersuut inuussutissarsiutigalugu aalisarsinnaanermi Kalaallit Nunaanni qularutissaanngitsumik najugaqarnissamik piumasaqaat.

KNAPK-p iluarisimaarpaa Naalakkersuisut siunnersuut aqqutigalugu aalisariuteqassutsip aqunneqarnerulernissaa siunertarimmagu, erseqqissaatigalugulu Naalakkersuisut aalisariuteqassutsip taakkulu pisinnaasaat sippotumik annertussuseqalernissaat mianersuutigissagaat.

KNAPK-p ilisimatitsissutigaa KNAPK-p tungaaniit kissaatiginartikkitsik suliffeqarfiiut nutaat aalisarsinnaanermut akuersissutinik tunineqartarnissaat, suliffeqarfiiut akuersissuteqareersut kisimik salliuinneqarnissaat pisariaqanngimmat.

Aalisarsinnaanermut akuersissutinik tunisisarmeq kinaassusersiortuunngitsumik tunngaveqartariaqarpoq, qulaakkeerinittumik akuersissutit tunngavimmikkut aalisartunut isumalluit atorluarneqarnissanik qulakkeerinittunut tunniunneqartassasoq.

*Aalisartut nutaat piumasaqaatit naammassisinnaagunikkit ajortortanngilaq taakku aamma
akuersissutinik tunineqarsinnaanissaat.*

Siunnersuutip § 15, Imm. 2 tassa akuersissutit piffissamut killiligaanngitsut minnerpaamik ukiunik tallimanik siumut nalunaaruteqarluni piffissamut killiligaalernissaat pillugu KNAPK-p isumaqarfíga taama aaqqiiniarneq naammaginartumik eqqarsaatigilluagaanngitsoq.

*Allannguut akuersissutit piffissamut killiligaanngitsut nalunaaruteqarluni minnerpaamik
ukiunik tallimanik piffissamut killiligaalernissaanik erseqqissaassuteqarnermik taamaallaat
erseqqissaaneruvoq.*

KNAPK-p isornartorsiorpaa tamakkiisumik pisarineqarsinnaasut akuerisaasut biologit siunnersuutaat kisiat malinneqarnissaa. Takuuk siunnersuutip § 22 Imm. 3. KNAPK-p kissaatigaa siunnersuutimi atuisut ilisimasaat aamma tusaaniarneqartassasoq biologit siunnersuutaat oqimaaqatigalugu, tamakkiisumik pisarineqarsinnaasut aalajangerneqartarnerini.

*Siunnersuummi § 22 imm. 3-mi aalajangersarneqarpoq, pisarineqarsinnaasutut akuerisaasut tamarmiusut aqutsinissamut pilersaarutitut akuerisaasut mianeralugit biologit siunnersuutaat malissagaat. Naalakkersuisut isumaqatigaat atuisut ilisimasaat tusaaniarneqartassasoq.
Taamaattumik aalisagaqatigiit ataasiakkaanut aqutsinissamik pilersaarusiornermi atuisut ilisimasaat atussallugu periarfissaqarluarpoq.*

KNAPK-p isumaqatigaa siunnersuummi Kalaallit Nunaata Kitaani raajanut pisassiissutinut agguanissamut siunnersuut, taamaalluni ukiumut pisassiissutit 50 pct.-ii avataasiorluni aalisartunut aamma 50 pct.-ii sinerissap qanittuani aalisartunut. KNAPK-p erseqqissarpaa ukiuni siuliini ukiumut pisassiissutinik annertuunik avataasiorluni aalisartuniit sinerissap qanittuanut nuussisoqartarsimasoq. KNAPK isumaqarpoq 2016-mi 4.800 tonsinik nuussisoqarsimasoq.

KNAPK-p tunngaviatigut aamma tapersorsorpaa, avataasiorluni aalisarnerup aamma sinerissap qanittuani aalisarnerup akornanni ukiumut pisassiissutinik nuussisarneq killilersorneqassasoq. KNAPK-p isumaqarpoq avataasiorluni aalisartuniit sinerissap qanittuanut nuussisarneq pisariaqarunnaassasoq, umiarsuaatileqatigiiffit pisassiissutinik naammattumik peqarpata.

*Agguaqatigiinneq allanngorpat, Naalakkersuisut naatsorsuutigaat sinerissap qanittuani
aalisartut annertunerusumik pisassiissutinik pisisaqalerpata nuussisarneq pisariaarutissasoq.*

KNAPK-p erseqqissaatigaat isumaqarnertik avataasiorluni aalisartuniit sinerissap qanittuanut pisassiissutinik nuussisarneq periarfissatut ammatinneqarallassasoq Kalaallit Nunaata Kitaani 50/50 pct.-imik raajanik pisassiissutinik immikkoortitsineq tamakkiisumik atuutilernissaata

tungaanut. Isumamut tassunga tunuliaqutaasoq tassaavoq KNAPK-p annilaangagimmagu naammattumik aalisakkanik nioqquissiassanik nunami tunisassiornissamut amigaateqalersinnaaneq.

Siunnersuummi avataasiorluni aalisartuniit sinerissap qanittuanut pisassiissutinik nuussisarnissaq suli periarfissiisoqassaaq nunami tunisassiornissamut amigaateqalersinnaaneq pinngitsoortinniarlugu, tak. § 27, Imm. 2.

Siunnersuutip § 30, Imm. 4, Naalakkersuisut inatsisitigut malittarisassiornissamut tunngaviliisussaq, aalisartoq pisassiissutit pigisani tamaasa tuneriarlugit aalisarnermut uteqqinniartumik mattussisinnaaneq, aamma KNAPK-miit ilalerneqarpoq.

KNAPK-p isumaqatigilluinnarpaa, toqqaannanngitsumik 50 pct. ataallugu piginneqataaneq, siunnersuut malillugu piginneqatigiissutinut naatsorsuisarnermi ilaasalissasoq. Tak. § 31. KNAPK-lli iluarinngilaat siunnersuummi aalisartut imaluunniit ingerlatseqatigiiffiit ukiuni qulini piginneqatigiissutitik nalimmassarnissaanik periarfissiineq. Tak. 32, Imm. 1. Annerpaamik nalimmassaanissamut piffissaq qaammatit 18-iusreriaqarput KNAPK malillugu. KNAPK-p qularutigingilaa naammattumik pisassiissutinik pisusussaqarumaartoq.

Oqaaseqaatit siunnersuummi allanngortitsinissamik tunngavissiinngillat. Ingerlatseqatigiiffiit sivikitsumik piffissalerneqarlutik, soorlu qaammatinik 18-inik, pisassiissutinit pigisanik imaluunniit piginneqataassutinik pinngitsaaliinikkut ingerlatseqatigiiffiit tunisissappata tulluassanngilaq. Qaammatinik 18-inik nalimmassaanissamut piffissaliineq sivikippallaassaaq aalisartut imaluunniit ingerlatseqatigiiffiit annertuumik annaasaqaratarsinnaaneranik pinngitsoortitsinissamik.

KNAPK assinganik isumaqarpoq qaammatinik 48-nik killiliineq siunnersuutip § 34, Imm. 2 aamma sivisualaartoq siunnersuutigalugulu qaammatit 24-it.

Tusarniummik akissuteqartup siunnersuuttaa malinneqanngilaq. Naalakkersuisut kissaatigaat aalisartut nutaat aalisarnermut isersinnaanissaanut pitsaanerusumik tunngavilerneqassasut. Pisassiissutinik pissarsiarnermi aalisariummik pigisaqqaarnissamik piumasaqaat, aalisartut nutaat aalisarnermut iserniarnerannut akimmiffiuvoq. Akimmiffimmiit ammaassiniarnermi qaammatit 24-it sivikippallaartutut nalinerneqarpoq.

KNAPK aamma isumaqarpoq misileeraalluni aalisarnermiit naliginnaasumik aalisarnermut ikaarsaarnermi kisremaassilluni aalisarsinnaanissamut piffissaq ukiuni pingasuni sivisualaartoq. KNAPK isumaqarpoq ukiut pingasut sivisualaartoq, sivisunerpaamillu ukiumut ataatsimut killeqartariaqartoq, imaluunniit ukiut marluk.

Siunnersuutip § 45, Imm. 2 aalajangerpaa, kisremaassilluni aalisarsinnaaneq tunngaviusumik ukiuni pingasuni atutissasoq, kisianni siunnersuutip § 45, Imm. 3 malillugu

Naalakkersuisut kisermassailluni aalisarsinnaaneq ukiut pingasuniit sivikinnerusumik atuunnissaa aalajangersinnaavaat. Siunnersuut malinneqanngilaq.

Aalisarnermut Siunnersuisoqatigiit pillugit aalajangersakkat pillugit KNAPK isumaqarpoq siullertut, Aalisarnermut Siunnersuisoqatigiit misileraalluni aalisarnermi tusarniaanermi peqataatinneqartassasut. Taassuma saniatigut siunnersuutip § 45, Imm. 4 KNAPK-p nalilerpaa atorsinnaanngitsutut, KNAPK-p isumaqarpoq aalisarnerup susasaqartui soqtigineqanngitsut, Aalisarnermut Siunnersuisoqatigiinnimi ilaanerat ilanngarneqarmat.

Naalakkersuisut isumaqataanngillat Aalisarnermut Siunnersuisoqatigiit tamatigut misileraalluni aalisarnermi tusarniarneqartassasut, Aalisarnermut Siunnersuisoqatigiit sammisanut tamatigoornerusunut taamaallaat tusarniaaffigineqartassammata. Aalisarnermut Siunnersuisoqatigiit ilaasortaasa amerlassusiannut inissat pingasut peqatigiiffinnut aalisarnermut susassaqarfilinnut naammaginartinneqarpoq. Maannamut KNAPK ilaasortaasimamat pingasunik sinnisoqarluni pisariaqanngitsutut nalinerneqarpoq, sinnisoq ataaseq oqaaseqaateqarnissamut naammaginartinneqarmat.

KNAPK-p tusarniaaneq naggataarpaa siunnersuutigalugu siunnersuummi aalajangersakkamik ikkussisoqassasoq aalisarnermi pisat tamarmik nunamut tulaanneqartarnissaanik.

Siunnersuutaat malinneqanngilaq, siunnersuummi § 18-mi tunngavissiisoqareermat Naalakkersuisut malittarisassiorsinnaanissaanik, pisat tamakkerlugit imaluunniit ilaannai Kalaallit Nunaanni tunisassiorfimmuit tulaanneqartarnissaanik. Piumasarissallugu pisat tamakkerlugit Kalaallit Nunaannut tulaanneqartassasut naleqqatigiinngittutut nalinerneqarpoq.

Kalaallit Nunaanni Kommunit Kattuffiat (KANUKOKA)

KANUKOKA aalisarnermut inatsisisamik nutarterinermi tunuliaquatasut ilalerpai, kisianni KANUKOKA isumaqarpoq siunnersuut pisarianngitsumik qitiusorsiortoq, aamma annertunerusumik pisariaqartitsisoqartoq kommunit ilaatinneqarnerulernissaanik pisassiissutinik, pisassanik, aalisarnissamik akuersissutinik, tulaassinermi aamma tunisassiornermi kommunit annertunerusumik akuutinneqartariaqartut. Allaffissornikkut piginnaasaqarneq kommuninut tunniunneqanngippat KANUKOKA-p siunnersuutigaa pinngitsuugassaanngitsumik kommunit tusarniaaffigineqartarnissaanik eqquissisoqassasoq.

Naalakkersuisut naliliipput pissusissamisoornerusoq pisassiisarnermi aqutsineq qitiusuminngaanniit inagerlanneqartarnissa, qulakkeerniarlugu Kalaallit Nunaat tamakkerlugu ataqqatigiissumik assigiimmillu allaffissornikkut ingerlatsineq. Naalakkersuisut isumaqataapput kommunit tusarniarneqartassasut sammisanut kommuninut ataasiakkaanut attuumassutilinnut, kisianni pinngitsuugassaanngitsumik kommunit sammisanut tamanut tusarniaaffigineqartarnissaat pisariaqanngilaq.

KANUKOKA-p maluginiarpaq siunnersuut arlalinnik Inatsisartuniit Naalakkersuisunut piginnaasitsissutinik imaqartoq, siunnersuutigalugulu tassunga atatillugu Naalakkersuisut nassuiassagaat piginnaatitsissutit qanoq atorniarnerlugu.

Piginnaasitsissutit sinaakkutaat aalajangersakkani ataasiakkaani aamma oqaaseqatini taakununnga atasuni takuneqarsinnaapput. Pisariaqartussaanngilaq amerlanerusunik nassuaasersornissaat.

KANUKOKA-p siunnersuutigaattaaq sumiissuseq tunngavigalugu pisassiisoqartarnissaa, inuussutissarsiornikkut nunap immikkoortui asssigiinngitsut pissusissamisornerusumik ineriartornissaa qulakkeerniarlugu.

Pisassiissutit maanna aalajangiunneqartarput aalisagaqatigiit sumiinneri tunngavigalugit. Sumiissuseq tunngavigalugu pisassiisarneq eqqunneqassagaluarpat pissusissamisuunngitsutut atuilluarnerunngitsutullu isummerfigineqarpoq.

Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik

Siunnersuutigineqarpoq aalajangersakkamik eqqusisoqassasoq, tunngaviliisussamik piginnaatitaaffeqartup inuiaqatigiit nammaqatigiinnissaanik aamma allanik inuiaqatigiit aningasaqaarnikkut atugarisaat pillugit isumaqatigiissusiortoqarsinnaassasoq, aalisarnermut atatillugu kalaallinik tunngavilik siuarsarniarlugu. Assiusaanik aalajangersagaq Impact Benefit Agreement, Aatsitassat pillugit inatsimmi § 78-mi nalunnginneqarpoq.

Naalakkersuisut naliliippit, siunnersuummi naammaginartumik periarfissanik peqartoq kalaallinik aalisarnermut tunngavilernissaanut siuarsassallugu.

Sulinermik Inuussutissarsiuteqartut Kattuffiat (SIK)

SIK-p siunnersuut taama isikkoqartillugu tapersersunngilaa. SIK-p siunnersuummi § 26 malillugu raajanik ukiumut pisassiissutinik avataasiorluni aalisarnermi 50 pct.-nik aamma sinerissap qanittuani aalisarnermi 50 pct.-nik immikkoortiterinissaq akerleraa. SIK-p siunnersuutigaa tulaassinissamik piumasaqaatit annertunerulernissaat, agguaqatigiisitsinermi immikkoortiterneri allanngortinnagit, sinerissap qanittuani aalisartut annertunerusumik pisassaqalerterisigut.

Tulaassinissamik piumasaqaatit annertusinerisigut sinerissap qanittuani aalisartut pisassaat annertusinavianngilaat, aamma pisassanik avataasiortuniit pisisinnaajunnaarunik, taava tulaassinissamik piumasaqaatit annertunerit sinerissap qanittuani aalisartunut iluaqutaanavianngilaq.

SIK isumaqarpoq aalisarnermut akuersissutit piffissaligaanngitsut ukiut qulit ataallugit ilimasaaruteqarnikkut piffissaligaasunngortinnejassanngitsut.

Aalajangersakkami § 15, Imm. 2 naapertorlugu siumut ilimasaaruteqarnissaq akuersissutit piffissaligaanngitsut minnerpaamik ukiuni tallimani piffissaligaasunngortinnejarsinnaapput. Taamaattumik siunnersuummi siumut ilimasaaruteqarnissaq sivisunerusinnaasoq periarfissaareerpoq.

SIK tusarniaanermi akissuteqarnermigut oqariartuitigaa annilaangassutigalugu piginnittussaanermut naatsorsueriaasip allanngortinnerasigut sinerissami pitsaanngitsumik kinguneqarsinnaanissaa, suliffissanik annaasaqartoqarsinnaanera pillugu.

Naalakkersuisut tassunga isumaalunneq paasilluarpaat, kisianni erseqqisaatigerusullugu, suli nunami suliffissanik pisariaqartitsisoqarnissaa, naak malittarisassat allanngortinneqaraluartut.

Pinngortitaleriffik

Pinngortitaleriffik inatsisilerinermut tunngasunik § 22, Imm. 3-mut aamma § 43-46-mut allanngutissanik taamaallaat siunnersuuteqarpoq.

Polar Seafood A/S

Polar Seafood A/S siunnersummut aarlerisaarivoq, isumaqarluni siunnersuut tunumut allariarnerusoq aalisarnermilu atukkanut ajorseriartitsissasoq.

Naalakkersuisut taamatut isiginninnermut isumaqataanngillat.

WWF – Pinngortitaq pillugu nunarsuaq tamakkerlugu suliniaqatigiiffiup (WWF)

WWF isumaqarpoq, siunnersuut aalisarnermik piujuartitsisumik aqutsinissamik erseqqissunik malittarisassanik imaqartariaqartoq, aamma sulissutigineqartariaqartoq piujuartitsisumik allagartalikkamik aalisagaqatigiinnut tamanut atuuttumik aalisarneq anguniartariaqartoq.

Naalakkersuisunut pingaaruteqarpoq, aalisarneq piujuartitsisuunissaa kinguaassagut pillugit. Piujuartitsisumik aqutsinissaq siunnersuummi erseqqissarneqareerpoq. Aalajangersakkanik suli amerlanerusunik ilangussinissaq pisariaqarsorineqanngilaq.

Sulisitsisut (GE)

GE akissuteqaatiminni kajumissaarutigaat Naalakkersuisut siunnersuut taama isikkoqartillugu saqqummiutissanngikkaat, aningaasaqarnikkut inatsisilerinikkullu apeqqutinik

amerlavallaanik akineqanngitsunik imaqarmat. GE isumaqarpoq ”siunnersuutip kingunissai qulaajarneqanngippallaartut”. GE-p annilaanganartippaa kingunerisassat pitsaanngitsut, siunnersummi taaneqartut, kingunissai pitsaannginneri minnaagaavallaartut.

Naalakkersuisut siunnersummik suliaqartillutik kingunissaanik misissuititsisimapput suliniutit ataasiakkaarlugit aamma ataatsimoortillugit. Kingunerisassat ataasiaakkaat aamma ataatsimoortut siunnersuutip naliginnaasumik oqaaseqaataaniipput. Taamaattumik Naalakkersuisut GE-p isummiutaanut isumaqataanngillat.

GE-p isunnartorsiorpaa siunnersuutip piareersarnerani Aalisarnermut, Piniarnermut, Nunalerinermullu Ataatsimiititaliap isumaliuutissiissutai UPA2015/19 aamma UPA2017/115. Taakkunani siunnersuutigineqarpoq, misissueqqissaarnerit tamarmik saqqummiunneqassasut, inuussutissarsiuteqartut ilaatinneqassasut, aamma sulineq aammasumik ingerlanneqassasoq. Inatsisitigut siumoortumik sulineq aamma siunnersuut namminermi isornartorsiorneqarput ersernerluppallaarnerarlugit, amigaataanerarlugulu kisitseqqissaarnermi suut tunuliaqtaasimanersut. GE-p aamma tusarniutigineqarnera sivikippallaarnerarlugu isornartorsiorpaa.

UPA2015/19-mi sammineqarpoq, Naalakkersuisut peqquneqassasut misissuinermik saqqummiusseqqullugit piffissatigut killiligaanngitsumik aalisarnissamut akuersissutit piffissatigut killilerneqarnissaannut aningaasaqarnikkut kingunissai pillugit. Una siunnersuutip kingunerisussaanngimmagut piffissatigut killiligaanngitsumik aalisarnissamut akuersissutit piffissatigut killilerneqarnissaanik kinguneqarnavianngimmat, Naalakkersuisut isumaqarput isumaliuutissiissut maanna siunnersummut attuumassuteqanngitsoq. Aalisarnermut, Piniarnermut, Nunalerinermullu Ataatsimiititaliap UPA2017/115-mut isumaliuutissiissutaa ullulerneqarsimavoq 3. juni 2017. Isumaliuutissiissut taama kingusitsigisukkut saqqummiunneqartillugu, maanna siunnersummut sulinermut ilangunnissaa periarfissaasimanngilaq. Siunnersuut tusarniutigineqarpoq aggustusip 14. 2017-miit septembarip 22. 2017-mut, tamannalu sapaatip akunnerinut arfinilinnut naapertuuppoq. Naalakkersuisut taamaattumik tusarniutigineqarnera sivikippallaarneqarneranik isornartorsiummut isumaqataanngilaq.

GE isumaqarpoq tamaat isigalugu, siunnersuutip imaa siunertaanut naapertutinngitsoq, GE malillugu siunnersuut ersernerlummat atoruminarnanilu, ilaatigut Naalakkersuisunut piginnaatissutit amerlammata, aamma siunersuut GE isumaa malillugu aalisarnermut aningaasaqarnikkut nammaqatigiissumik siunertaqanngitsoq.

Naatsorsuutigineqarpoq siunnersuutip taarsissagaa Inatsisartut inatsisaat nr. 18 1996-meersoq Aalisarneq pillugu, kinguneratigut allannguuteqarluni. Inatsisartut inatsisaannut allannguutitut inatsisit katillugit 13-niupput aalisarneq pillugu Inatsisartut inatsisaannut, aamma aalajangersakkanut ataasiakkaanut oqaaseqaatitai ikittuinnaapput. Taamaattumik Naalakkersuisut paasiuminaatsippaat maanna siunnertuut pillugu isornartorsiutaasut

erseqqarunnerarlugu atoruminaatsuunerarlugulu. Siunnersuut arlaqartunik piginnaatitsinera aamma Naalakkersuisut aalangersakkanik sukumiinerusunik saqqummiussisinnaanera atoruminarsisinjaavaa erseqqarisisinjaallugulu. Aalisarneq teknikkikkut malittarisassanik amerlasuunik imaqarpoq, tamakkisumik siunnersuummi ilanngunneqassagaluarunik siunnersuut paatsiveerunnarsisiinnassagaluarpaat.

Isornartorsiorneqarportaaq siunnersuummi sukumiinerusumik nassuaasoqanngimmat aalisartut nutaat pisassarisanik agguasseqqinnermi tunineqartussat kikkuusinnaaneri eqqaaneqanngimmat. Aamma aalisartut nutaat qanoq iliorlutik pisassiissutit utertinneqartut pissarsiarisinnaassagaat.

Paasiumpinaappoq suut pisassiissutit utertinneqartussat GE-p innersuunnerai. Raajarniarnermi Kalaallit Nunaata kitaani avataasiorluni aalisartut aamma sinerissap qanittuani aalisartut akornanni agguariaaseq GE-p innersuuppagit, taava Naalakkersuisut naatsorsuutigaat sinerissap qanittuani pisassat amerlanerulerpata aalisartut piovereersut nammineq aalisarumaaraat. Kisianni GE-p innersuuppagit pisassanik killiligaanngitsunik utertitsiniarneq, taava Naalakkersuisut naqissuserusuppaat, pisassat killiligaanngitsumik uani siunnersuummi utertinneqarnianngimmata, taamaattumik maanna pineqanngilaq aalisartut kikkut utertitanik pissarsinissaat.

GE-p taavaa, siunnersuummi aalajangersakkat 50/50-imik agguariaasedq, piginnittusaanermik naatsorsueriaaseq nutaaq aamma pisassat killiligaanngitsut utertinneqarnissaat annertuumik inuussutissarsiortuningaanniit taarsiivigineqarnissamik kinguneqarumaartoq, GE malillugu pinngitsaaliisummik taarsiissutitalimmik pigisanik piginnikkunnaarsitsinertut nalilerneqarmat. GE-p tassunga atatillugu inatsisilerituut naliliinerat tusarniummut akissuteqaammut ilanngullugu nassiuppaat.

Naalakkersuisut pissutsinut ataasiakkaanut naliliisitsinikuupput, Naalakkersuisullu tamanna tunuliaqtigalugu isumaqarput 50/50-mik agguaaqqinneq piginnittuunermullu nalileeriaaseq siunnersuummi saqqummiunneqartutut pinngitsaaliisummik taarsiissutitalimmik pigisanik piginnikkunnaarsitsinertut nalilerneqarsinnaanngitsoq, taarsiivigineqarnissamillu tunngaviusinnaanngitsoq. Siunnersuutip kingunerinavianiingimmagu pisassat piffissamik killiligaanngitsunik utertitsineq, Naalakkersuisut isumaqarput taarsiiviginiarneqarnissamik qinnuteqaatit siunnersuummi uunga attuumassuteqanngitsoq.

GE-p isornartorsiopaa nutaamik piginnittuunermik nalilersueriaasermi sukumiisumik erseqqissarneqanngimmat qanoq paasisariaqarnersut ”oqartussaaqataalluni sunniuteqarneq”, tamanna nalornilersitsisinnaammat aamma Naalakkersuisut namminneq kisimik tamanna pillugu naliliisinnaanngimmata.

Ajornakusoorluinnarpoq malittarisassanik erseqqareqqissaartunik saqqummiussissalluni, qaqugu oqartussaaqataalluni piginneqataasoqarnersoq, aalisartut ataasiakkaat

pissusissamisuunngitsumik eqqornagit. Assersuutigalugu aningaasanik atukkiisoq malittarisassatigut eqqorneqarsinnaavoq, siunnersuummi erseqqareqqissaamik ilanngunneqarpat, atukkiineq tamatigut oqartussaaqataalluni piginneqataanermik paasineqartassasoq. Kisianni pissutsit ataasiakkaat aallaavigalugit naliliisaraami, taava pinngitsoorneqarsinnaavoq malittarisassat pissusissamisuunngitsumik eqquissanngitsut. Oqaaseqaatini pissutsit tamaasa taagorneqannginneranut pissutaasoq tassaavoq, pissutsit tamakkiisut siumut naatsorsoruminaammata.

GE-p isornartorsiopaa siunnersuummut atatillugu 50/50-mut allannguinissaq, piginnittuunermut naatsorsueriaaseq aamma pisassat piffissaligaanngitsunik utertitsinissamik siumut ilimasaarineq nalornilersitsinermik kinguneqarnissaat. GE-p erseqqissarpaat ”nalornilerneq aningaasaleererusunnermut inuussutissarsiutinullu siuarsaanermut toqunartuusut”.

Siunnersuummi saqqummiineq amerlanertigut nalorninartunik imaqartarpooq. Naalakkersuisut nalunngilaat tamanna, taamaattumik 50/50-mut allannguinissaq aamma piginnittuunermut nutaamik naatsorsueriaaseq oqaaseqaatini nassuiaaserneqarsimapput. Naalakkersuisut erseqqissassavaat pisassat piffissamik killiligaanngitsunik utertitsinissamik siunnersuummi nalunaartoqanngitsoq.

Naggasiuttit GE isumaqarpoq, siunnersuummi tamatigoortumik malittarisassaqartariaqartoq politikkikkut pisassanik agguasarnikkut aalajangiinermi tunngaviit allaffissornikkut nalileeriaatsinut avissaqqanissaat, taaneqartartoq ”armslængde-princip”.

Naalakkersuisut isumaqarput, naammaginartumik siunnersuummi tunngavissaqartoq malittarisassanik pisassanut agguasarnermi ingertsinermut pilersitsinissamut. Naalakkersuisut tassunga atatillugu siunnersuummi § 23, Imm. 5 innersuussinnaavaa.

Kalaallit Nunaanni Politimesteri

Kalaallit Nunaani Politimesterip siunnersuummut §5 stk 2 atatillugu oqaatigaa Kalaallit Nunaani Politiit amerlassutsimikkut pikkorissutsikkullu inorsartut aalisarnermut nakkutilliineq akisussaaffittut tigussallugu. Taanna §5 stk 2-mut siunnersuutinut tunngatillugu oqaatigineqartuni takuneqarsinnaavoq, ”Kalaallit Nunaani Politiit Naalagaaffeqatigiillu isumaqatigiinniareerlutik soorlu illoqarfinni nunaqarfinnilu nakkutilliineq akisussaaffiglersinnaallugu”

Politimesterip eqqaavaatbaar § 58, stk. 2 aaliangiussaasimasoq eqqarsarnartoqartoq siunnersuutaasup inatsilerinerup tunngavimmigut allanngortinneqarsinnaanera – taamaalillunilu inatsimmi maleruagassat inatsilerinermittoq – atorneqartussaasoq inatsisinik unioqqutitsisoqarsinnaaneranik pasisaqartoqartillugu. Tassungalu atatillugu pillaaniarluni eqqartuussineq pinnagu pinngitsaaliilluni iliuuseqarnissaq pillugu isumaliutissiissut 1039 1985-imeersoq innersuussutigineqassaaq.

Ilanngulluguttaaq Politimesterip eqqaavaa aaliangersakkat arlallik tassani eqqaaneqartumi unioqqutitsisimaneq aqunneqassasoq akiliisitsinikkut § 58, stk. 1, nr. 1-mi aaliangersakkat malillugit tunngavissastut akiliisitsineq soorlu atorsinnaanngitsoq. Tassunga atatillugu Politimesteri siunnersuuteqarpoq inatsisini allannguutissanik siunnersuutaasup ataasiakkaarlugu aaliangerneqarnerani.

Naalakkersuisut Kalaallit Nunaanni Politimesterip siunnersuummi § 5, Imm. 2-mut atatillugu isumaanut paasinnilluarput. Naalakkersuisulli ataatsimiititaliap isumaliuutissiissutaa 1039/1985 eqqartuussisoqarnerup avataatigut pinngitsaaliissutitalimmik akuliuttarneq pillugu ima aalajangiussaqaramik:

"Akuliunnerit amerlanerpaat nakkutilliinermik tunngaveqartarput, arlaqartumik taamungaannaq tigooqqaalluni misiliilluni nakkutilliinermik. [Taanna]-rpiaq taamungaannaq tigooqqaalluni misiliineq - siumut oqaatigineq ajornartua – aaqqiissut naleqalersikkaa. Tamanna tunngavigalugu Inatsisitigut piviusutut allaatiginninneq (retsaktumbeskrivelsen) pissutsini taamaattuni eqqoteeqqissaartikkuminaattarpoq. Pinngitsaaliissutitalimmik akuliunneq paassisutissanik aallernermik tunuliaquataqarpat, taava inatsisitigut aalajangiinerit piuminartuusarput paasiuminartuusarlutillu. Inatsisitigut aalajangiinissamik piumasaqaateqartoqassappat, ataatsimiititaliap isumaa malillugu, pisariaqanngitsumik allamut saasaaneruvoq, eqqartuussivinnik pisariaqanngitsumik suliakkersusoq, saniatigullu ingerlatsinermut oqartussaasut nakkutilliinissaannik sanngiillisitsisoq, inatsisitigut isumannaatsuunermik iluaquteqanngitsumik. Siusinnerusukkut taaneqartutut ajornartorsiut tunngaveqarpoq, eqqartuussiviit imaluunniit ingerlatsinermi oqartussaasut inatsisip atuutsinnejarnissaanut qaffasinnerusumik akisussaaffeqassanersut. Ataatsimiititaliaq isumaqarpoq, pinngitsaaliissutitalimmik akuliunneq nakkutilliineq imaluunniit paassisutissanik ujarlerneq anguniarneqartillugu, taava inatsisitigut aalajangiinissamik piumasaqarnissaq pinngitoortinnejartariaqartoq. Kisianni erseqqissaatigineqarpoq ataatsimiititaliaq inatsisitigut aalajangiinissamik apeqput, periusererikkamut atortutigut pisinnaatitaanermut tunngavileriikkamut ilaareersoq. Ataatsimiititaliap isumaa imaappoq, eqqarsaatersuutigineqarpat pinngitsaaliissutitalimmik akuliunnissamik tunngaviliinissaq, taava atortutigut pisinnaatitsinissaq pisariaqarnersoq eqqarsaatigilluartariaqarpoq. Taamaassimassappat, ataatsimiititaliaq isumaqarpoq naliginnaasumik inatsisitigut alajangiinissamik piumasaqarnissaq imaqqanngilaq."

Naalakkersuisut tessunga atatillugu erseqqissarumavaat, inatsisitigut pissutsit, eqqartuussiveqarnerup avataatigut pinngitsaaliissutitalimmik akuliuttarneq, 1985-miit malunnaatilimmik allanngoriarsimanera. Tessungalu atatillugu Naalakkersuisut erseqqissassavaat, nalornissuteqarneq atorneqarunnaarmat – 1985-mitut – inatsisilerinerup avataatigut pinngitsaaliissutitalimmik akuliuttarnerup pisariaqartinnejqarneranut, atsikkutigiitsitsinermik tunngavik (proportionalitetsprincippet) ataqqineqartillugu.

Politimesterip isummerneranut Naalakkersuisut paasinnissinnaapput uani siunnersuut § 5, stk. 2 pillugu kiisalu isumalluutaasut sammisamut ilisimasaqassutsimullu tunngatillugu apeqqummut. Siunnersuummut oqaaseqaatini takuneqarsinnaasutut Naalakkersuisut

*siunertarivaat siunnersuutip atorneqalernissaa naalagaaffeqatigiit isumaqatigiinniareerpat
naleqquttumillu inernilerneqareerpat Politiit sulisoqarnersinnaanerat eqqarsaatigalugu.*

Kommuneqarfik Sermersuumut

Kommuneqarfik Sermersuup tusarniaatitsinermi taavaa tunngaviusumik siunnersuummut isumaqataallutik:

1. Aalisarneq pillugu paasiuminartumik, ullutsinnut naleqquttumik atuisunullu atoruminartumik inatsisiliornissaq
2. Nunami aalisagaqassutsip pissusissamisoortumik piujuartitsinermillu tunngaveqartumik kalaallit inuaqatigiit maleruagassinneqarnissaat qulakkiissallugu,
3. Kalaallit inuaqatigiinni naligiinnginnerujartornerup akiorneqarnissaat
4. Aalisartunut suliffeqarfinnik pitsaanerusumillu isertitaqalernissamik qulakkeerinninnissamut suliniuteqarneq

Aappaatigut Kommune isumakuluuteqarpoq raajanik pisassiissutnik piginnittuunerup maleruagassaat pillugu. Tassunga tunngatillugu Kommunep eqqaavaa nassiuuateqartoqartariaqartoq qanoq ililluni skatsikkut isertitat annikillinnginnissaat anguniassagaat naliliinerup takutimmagu Landskarsi ajunaaquteqartussaasoq.

Kommunellu siornersuutigaattaaq siunnersuutip kingunerisinnaasai annertunerusumik misissorneqassasut "inernerit kiisalu allanik periarfissarsiorneq" siunertaralugu ujartornerini, taamaatumik siunnersuut tunuartinneqartariaqartoq.

Naalakkersuisut Raajanik piginnittussaanermik nutaamik naatsorsuisalernissaq pillugu Kommuneqarfik Sermersuup isumaa paasilluarssinnaavaa. Naalakkersuisut tassunga tapiullugu oqaatigisinnaavaa, Naalakkersuisut siunnersuutip kingunerisinnaasai eqqarsaatigilluarsimagamikkit, taamaattumillu siunnersuutigaa piginnittussaanermut nutaamik naatsorsuisalernissap eqquyneqarnissannut ikaarsaarnissamik piffissaliisoqarnissaat.

Qaasuitsup Kommunia

Qaasuitsup Kommuniata eqqaavaa siunnersuut isumaqatigalugu. Kommune isumaqarpoq siunnersuutip kingunerissagaa raajarniarnerup pisassiissutaateqarnerullu ineriartoqqinnissa piginnittuunerup sinerissami aaalisartut akornanni siuariartormigut taamatullu Kommuneni isertitaqarnerulernikkut.

Kommune Kujalleq

Kommune Kujalleq tusarniaanermut akissummini allappoq: "Kommunimit Kujallermit naammagisimaarneqarpoq Naalakkersuisut maannakkut, aalisarneq pillugu inatsisip atuuttup ukiut 20-it sinnerlugit atuutereersimanerata kingorna, inatsimmik nutaternissamut piareersimalermata inatsisillu atuuttup kommuninut, sulisoqarnermut inuussutissarsiortunullu naleqquttuusimangiffii iluarsinialerlugin. Inatsisissatullu siunnersuut aamma ataatsimut naliliineq aallaavigalugu annertuumik pitsaanerusumik suliarineqartumik oqaasertalersugaarpasippoq, tassungalu ilanngunneqassalluni inatsit atuuttoq piffissap ingerlanerani allilerneqartarlunilu arlaleriarluni allanngortinneqartarsimavoq, taakkulu pissutigalugit inatsisip paasuminarnera sapermarsisimalluni. Kommuni neriuppoq immikkoortumi inatsit nutaaq ima inissaqartitsiumartoq, taamaallaat killeqartuinnarmik inatsisip allanngortittarnissaa pisariaqassalluni."

Kisiaqnnili Kommunep eqqavaa siunnersuutip qitiusorsiorpallaanerujussua kommunep isumaa malillugu pisariaqanngivikaluartumik. Illassutit oqaatigaattaaq inuussutissarsiutit allatigut Kommune perarfissarissaarnerusoq aaqqissuusseqqinnissaminut inuussutissarsitutitigut anguniakkat pitsannguutigisinnasaanik kommunimullu isertitaqarnerulernissaanut nunap immikkoortortaqarfianut kvotat pilersinnejarnissaanik pisariaqartitsisumik.

Kommune siunnersuuteqarpoq illoqarfigisami aalisarnermi atortut pitsanngorsarneqassasut Canadap Norgellu eqqarisamik ineriertortitseriaasaat malillugu kiisalu tulleriaarlukkamik illoqarfigisami pigineqaleraluttuinnarnissaa pineqartunut tamanut taamaalinikkut atortut illoqarfigisami piujuannartilerlugin.

Naalakkersuisut paasinnilluarput Kommune Kujalliup kissaataanut nunap immikkoortortaqarfiani kvotaqalernissaanut. Naalakkeruisut isumaqarputtaaq aalisarnermut atortorisat piffimi pitsanngoprsarneqassasut tamanut iluanaarfiusinnaasunut siunnersuutaareersumut tulluarluinnarmata. Ungalu ilanngullugu oqaatigisariaqarpoq Naalakkersuisut eqqarsaataaniittooq nunap immikkoortortaanni kvotanik peqalernissaq. Kvotateqalersitsinerullu nunap immikkoortorta kisiat eqqarsaatigalugu, aalisarnermik ingerlatsiviit avataasiortutut aalisartut isumalluuteqarnerat nangaatippai.

Qeqqata Kommunia

Qeqqata Kommuniata tusarniaanermi oqaatigaa siunnersummut isumaqataalluni. Kommunillu eqqaavaa "Namminersorlutik Oqartussat suli nalileeqqissasut soqutigisaqaqtigiit inuiaqatigiillu peqatigalugit Inatsisartuni aaliangiisoqannginnerani".

Kommune oqarportaaq kommunip malugisimagaa Kommunit perarfissaat Kommunini malittarisassanik pilersitsisinnaaneq siunnersuummi peerneqarsimasoq.

Tassunga atatillugu Kommune oqarpoq ikaarsaariartuaaneq siunnersuutigineqartumi § 15, stk. 2 ukiuni tallimaninngaanniit ukiunut qulinngortinneqarnissaa.

Naalakkersuisut piffissami 2014-minngaanniit 2017-mut soqutisaqaqatigiit assigiinngitsut ataatsimeqatigisaqattaarnikuuai siunnersuutip imai pillugit. Tassungalu atatillugu Naalakkersuisut ilismatitsissutigaa soqutigisaqaqatigiit tamaasa eqqarsaatigalugit.

Pineqartumi Kommunit periarfissarisaat malittarisassanik sanasinnaaneq pillugu Naalakkersuisut ilisimatitsipput tamanna siunnersuummi periarfissaammat

Killilerneqanngitsumik kvotaateqarnerup atorunnaarsinnejarnissaat pillugu Naalakkersuisut siunnersuuteqarput ikaarsaariartornissaq ukiuni 5-ni pissasoq. Taamaammallu paatsoornerusoq Kommunep siunnersuutigimmag ikaarsiaariartornissaq ukiuni 5-ni pissasoq.

GrønlandsBANKEN

GrønlandsBANKIP oqaatigaa raajanik kvotaateqarnerup agguaqjinnejarnissaat avataasiortut sinerissallu qanittuani aalisartut akornanni siunnersuut §26 malillugu piginnittuusinnaanermut akulerunnerusoq taamaaliornerullu kingunerissagaa akileraarnermi isaatitat annertuumik annaaneqarnerisigut.

Siunnersuut §31 pillugu GrønlandsBANKI oqarpoq toqqaannanngitsumik piginneqataaneq siunnersuutaasumi naatsorsuutigisariaqartoq Kvotatillik pigisamik tuniniaaneranik taamaalilluni nunami tunitsiviit tigoorasuaannarnisaannik allanngorartitsilerlutik.

GrønlandsBANKI oqarpoq kvotaatit pigisat atorunnaarsikkiartuaarnissaat ukiut 5-ni pisussatut siunnersuut piviusorsiunngitsoq. Banki isumaa malillugu siunnersuutip kingunerissavaa piffissami sivikkippalaami aningaasaliisarnerit kiisalu nammineq aningaasaliisinnaanerup sakkortunerulernissaa.

Naalakkersuisut raajanik kvotateqarnerup agguataaqjinnejarnissaata akileraarnermut isertikkat annikinnerulernissaanik kinguenarsinnaaneranut isumaqataapput .

Naalakkersuisullu isumaqatiginngilaat avataasiortut sinerissallu qanittuani aalisartut akornanni agguaaqjinnej piginnittuusinnaanermut akulerunnerunngitsoq tassani taarsiisariaqanngitsumik aalisarnermik aaqqissusseqqinnerummat.

Naalakkersuisut peqqissaarluiinnarlutik siunnersuuit §31 –p kingunerisinnasai nalilersornikuuaat. Tamannalu tunuliaqutsiullugu Naalakkersuisut siunnersuutigaat ikaarsaariartornissaq ukiuni 10-ni pissasoq taam,aaliornikkut eqqorneqartussat nutaamik niuerfiliornissaminnik periarfissinniarlugit.

Kvotatit pigisat atorunnaarsinniarnerat pillugu Naalakkersuisut siunnersuuteqarput ikaarsaariarneq ukiuni 5-ni pissasoq. Naalakkersuisut isumaqanngillat siunnersuut taaneqarsinnaasoq ”piviusorsiunngitsutut” tassami kissaatigineqarmat siunnersuutip ikinnerpaaffissalerneqarnera ukiunut 5-nut. Killilerneqanngitsumik kvotaateqarnerup atulersinnejarnissaa eqqunniarneqalermat takuneqarsinnaavoq Inuutissarsiutini ataatsimiititaliap aappassaaneerluni isumaliuutersuutitut siunnersuutaani FM1990/31-mi

amerlanerussuteqartut kissaatigigaat ikaarsaarianerup ukiuni 2-3-ni pinissaa.

Inatsisartuupput ikaarsaariarnermi piffissap atugassap aaliangerniarnerani pisussaatitaasut tassanilu inuutissarsiortut tusarniarneqassapput.

Advokatfirma Malling & Hansen Damm

Advokatfirma oqarpoq siunnersuut §7 pillugu eqqaaneqarsimasut aaliangiussamut tunngatillugu imarisai eqqarsaatigalugit nipaappallaartut. Taamaammat Advokatfirma siunnersuivoq oqaatigineqarsimasut allanngortinneqarnissaat piginnittuunissap qaammarsaavigineqarnissa eqqarsaatigalugu – piginneqatigiiffinni – angallatip nunatsinneersuuneratut nalinerneqarsinnaalerniassammat.

Advokatfirmarp oqaatigivaattaaq §7 stk2 nr2-mut tunngatillugu oqaatigineqarsimasut paatsuungasitsisinnaaneranik pilersitsisinnaasoq oqaaaseq "Nunatsinnut attuumassuteqarpoq" soorlumi eqqaaneqartuni §7 stk 2 nr 1-miittoq Kalaallit Nunaaniittutut qaammatit 6 sinnerlugit. Taamaakkaluartoq Advokatit malillugit oqaatigineqarsimasut §7 stk 2, nr 2-mi Nunatsinnut attuumassuteqarpoq ilassutaasinnaasoq isumaqalersitsilluni unioqqutitsisutut.

Naalakkersuisut §7 stk 2, nr 2-mut tunngatillugu erseqqissaatigaat taamaalilluni paatsoorneqarsinnaangitsumik sumi najugaqarnerup "Nunatsinnut attuumassuteqarpoq" – llu isumaarigaat. Taamattaaq aamma Naalakkersuisut erseqqissaatigaattaaq §7 stk 3 pillugu.

Nunatsinni Eqqartuussissuserisut Illersuisut

Nunatsinni Eqqartuussissuserisut Illersuisooqatigiit oqaatigaat siunnersuutip kingunerluutigisinnaasai ersernerunnerarlugit. Taamaattumik Illersuisooqatigiit inassutigaat siunnersuutip itisilersuinerusumik kingunerluutaasinnaasuunik suunerisa ersarissarneqarnissaat inatsisilerisut periarfissaqarluarneruniassamata naliliinissaminnik inuussutissarsiorneq ineriantornera nunallu aningaasaqarniarnerata sumut ingerlanera qinersivigineqarnissaa.

Soorlu eqqaaneqareersutut tusarmiaanermut atatillugu Aningaasaqarnermut Naalakkersuisoqarfíup Akileraarnermullu Aqutsisoqarfíup ingerlataani tunngavigalugu Naalakkersuisut suli aningaasaqarniarnerup paasiniaavigineqarnissaata itisilersoqqinissaa pisariaqannngitsutut paasiniaanerit takutereermassuk aningaasaqarniarnerup kinguneruisinnaasai.

Transparency International

Transparency International tusarniaanermi eqqaavaa tusarniaaneq septemberi 13, 2017 allannguutaasimasut kingunerisaanik siunnersuut tulluanngitsoq. Peqatigiiffiup isumaa malillugu isumasiortitsinerup sivikinnerata takutikkaa isornarsinnaasunik paasiniaasoqarsinnaanera.

Transparency International oqaatigaattaaq siunnersummi kukkuneqartoq aaliangersakkami tikkuasoqarmat Nunatta Eqqartuussiviat tassaaasoq siullerpaatut saaffigineqartussaq soorlu angallatit 75BRT/120BT eqqartuussivimmut tunniunneqassatillugit.

*Naalakkersuisut isumaqataanngillat tusarniaanermut atatillugu septemberi 13, 2017
allannguutaasimasut naleqquttuunnginnerneragaanerat tassanimi tusarniaasoqarmat
pioreersunik aaliangersakkani.*

*Aaliangersakkani suna saaffigineqaqqaarnissaa pillugu siullertut saaffigisassaq
atorunnaarsinneqareerpoq pisariaqanngitsutut nalilerneqarmat.*

Uku oqaaseqaateqanngillat:

- Naalakkersuisut Siulittaasuata Naalakkersuisoqarfia
- Ilanniartaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik
- Departementet for Sundhed
- Namminiilivinnermut, Nunanut Allanut Nunalerinermullu Naalakkersuisoqarfik
- Kommuninut, Nunaqarfinnut, Isorliunerusunut, Attaveqaqtigiainnermut Ineqarnermullu Naalakkersuisoqarfik
- Aatsitassanut Ikummatisanullu Naalakkersuisoqarfik
- NUSUKA
- SQAPK
- Royal Greenland A/S
- Halibut Greenland ApS
- EU

Aalajangersakkanut ataasiakkaanut nassuaatit

Kapitali 1
Atuuffia

§ 1-imut

Imm. 1-imut

Nr. 1

Inatsit Kalaallit Nunaata aalisarnikkut oqartussaaffigisaani inuussutissarsiorluni aamma inuussutissarsiutiginagu aalisarnernut atuuppoq. Inatsit tamassuma kingorna Kalaallit Nunaanni aalisarnermut suugaluartunulluunniit toqqaannanngitsumik oqaatigalugu atuuppoq, aliikkutaralugu sunngiffimmilu aalisarneq, misileraaneq, misissuineq ilinniagaqarnerlu siunertaralugit aalisarnertut kiisalu inuussutissarsiutigalugu aalisarnerit suugaluartulluunniit pineqaraluarpata.

Inatsimmi nassuaatit naapertorlugit Kalaallit Nunaata aalisarnikkut oqartussaaffigisaa tassaavoq sumiiffik Kalaallit Nunaata aningaasaqarnikkut oqartussaaffigisaa pillugu nalunaarummi kiisalu Kalaallit Nunaata imartap oqartussaaffigisaata killinga pillugu peqqusummi aalajangersarneqartoq.

Nr. 2

Inatsit taamatuttaaq kalaallit nunallu allat angallataasa tulassisarnerannut aamma Kalaallit Nunaata aalisarnikkut oqartussaaffigisaani usinik nuutsisarnermut atuuppoq.

Nr. 3

Inatsit aamma Kalaallit Nunaanni inuussutissarsiutigalugu aalisarnermut aamma Kalaallit Nunaata aalisarnikkut oqartussaaffigisaata avataani kalaallit angallataasa tulaassinerinut usinillu nuutsisarnerannut atuuppoq. Kalaallit Nunaata aalisarnikkut oqartussaaffigisaata avataani inuussutissarsiornikkut aalisarneq kisimi inatsimmut ilaavoq. Taamaalilluni Kalaallit Nunaata aalisarnikkut oqartussaaffigisaata avataani sukisaarsaatigalugu sunngiffimmilu aalisarneq kiisalu misileraaneq, misissuineq ilinniagaqarnerlu siunertaralugit aalisarnerit inatsimmi ilaannngillat.

Aalangersakkami aalajangersarneqarpoq inatsimmi aalajangersakkani allani anguniakkat aalajangersakkami nr. 1-miit – 3-mut allaaserineqartut naapertorlugit aqutsisoqassasoq.

Imm. 1-imut

Nr. 1

Pisuussutit pigiinnarneqarnerat amerliartornerallu, tassunga ilanngullugu aalisarnerup pinngortitami ataqatigiinnermut sunniutai, nungusaataanngitsumik annertussuseqassapput.

Aalajangersakkami tassani aalajangersarneqarpoq, aalisarnermik aqutsinermi annertuallaamik aalisarsinnaaneq sillimaffigineqassasoq aammalu pinngitsoortinniarneqassalluni killilersimaarneqarlunilu. Tamanna assersuutigalugu biologit inassuteqaataasa ilanngunnerisigut aamma Aalisarneq pillugu Siunnersuisoqatigiit peqataatinnerisigut anguniarneqarsinnaavoq.

Nr. 2

Pisarineqarsinnaasut aalisarnermilu aalisarsinnaassutsip akornanni pissutsit. Aalisarnermik aqutsinermi aalisakkat pisarineqarsinnaasut, pingartumik nr. 1 isiginiarlugu, aamma aalisarnerup nungusaataannginnissaa illuatungaani lu sulisussaqarnikkut piumassuseqarnikkullu aalisarnermi aalisarsinnaassuseqarneq oqimaaqatigiissinniarnissaat aalajangersakkakut qulakkeerneqassaaq. Tamassuma ataani mianerisassat arlallit ilanngunneqassapput, ilaatigut inuiaqatigiit aningaasatigut pissarsinissamik pisariaqartitsinerat, inuiaqatigiinnut suliffissaqartitsineq aamma aalisarneq aqqutigalugu inuiaqatigiit imminnut pilersorsinnaanerat. Akerlianik aalisarsinnaassuseq annikippallaarpat annertuumik aalisarneq aamma annikillisinneqassaaq, assersuutigalugu pissarsiaqarnissamut periarfissat annikippallaarpata imaluunniit aalisarnermi pineqartumi sumiiffinni soqutiginninneq pisariaqartitsinerluunniit naammanngippata.

Nr. 3

Inuiaqatigiit, aalisarnermik inuussutissarsiortut, tunisassiortut inuussutissarsiutillu allat taakkununnga atasut aningaasaqarnerisa inuttullu atukkat mianerinissaat. Tassani eqqarsaatigineqarpoq aalisarnermik aqutsinermi soqutigisat assigiinngiaartorpassuit aammalu isiginagassat aalisarnermut sunniuteqartartut tamassuminngalu aqutsinermi ilaasut sappingisamik isiginiarneqassasut. Aalisarneq Kalaallit Nunaanni kulturikkut kingornutat ilarujussuaraat innuttaasut amerlanerpaasa peroriartornermi qanilluinnartumik atugarisaat. Taamaalilluni aalisarnermik ingerlataqarnermut tunngatillugu innuttaasut sunngiffimminni sammisaqarnissaat siunissami aamma isiginiarneqassaaq. Aalisartut aalisarnermiluunniit suliffeqarfiiit ataasiakkaat aalisarneq aqqutigalugu imminut pilersornissamik periarfissaqarnissaasa saniatigut, inuussutissarsiutit tassunga atasut, soorlu tunisassiorfiit, aalisarnermik aqutsinermi aamma ilanngunneqassapput, taamaalilluni inuussutissarsiutit taakuu saniatigut sunniutaat aalisarnermik aqutsinermi aamma isiginiarneqassallutik. Aqutsineq taamaalilluni imatut ingerlanneqassaaq, inuttut atukkatigut aningaasaqarnikkullu pissarsiat qulakkeerneqarlutik, kisiannili nr. 1 aamma 2-mi piumasaqaatit mianeralugit.

Nassuaatit

§ 3-mut

Imm. 1-imut

Nr. 1

Nassuaat nutaajuvoq. “Aalisarneq” qanoq paasineqassanersoq inatsisini siusinnerusukkut nassuiarneqarnikuunngilaq. Nunat tamat akornanni malittarisassani isumaqatigiissutinilu

“aalisarneq” nassuiardeqarnikuuvooq. Nassuaat taanna uani nassuaammut “Unioqqutitsilluni, nalunaarutiginnitarani killilersugaanngitsumillu aalisarnerit pinaveersaartinniarlugit, pinngitsoortinniarlugit unitsinniarlugillu nunat umiarsualivillit iliuusissat pillugit isumaqatigiissutaat” annertuumik naapertuuppoq.

Nr. 2

Inuussutissarsiutigalugu aalisarnermik nassuaat matuma kingorna tassaavoq aalisarneq, tak. nr. 1-mi, pisanik tamarmiusunik ilaannilluunniit tunisinissaq siunertaralugu ingerlanneqartoq.

Nr. 3

Inuussutissarsiutiginagu aalisarnermik nassuaat, tak. nr. 1, matuma kingorna tassaavoq aalisarneq pisat inuttut nammineq atorneqarnissaat siunertaralugu ingerlanneqartoq.

Nr. 4

Kalaallit Nunaata aalisarnikkut oqartussaaffiata annertussusia matuma kingorna Kalaallit Nunaata aningaasaqarnikkut oqartussaaffia pillugu nalunaarut nr. 1020, 20. Oktobari 2001-meersoq naapertorlugu aalajangersarneqarpoq. Imartap killilerneranik suliassaq suli tiguneqarnikuunngilaq, taamaalillunilu Danmarkimi inatsisit naapertorlugit aalajangersarneqarluni. Nalunaarut atuutilersinneqarpoq Inatsit nr. 441, 22. Maaji 1996-meersoq naapertorlugu, Kalaallit Nunaata aningaasaqarnikkut oqartussaaffia pillugu, Kalaallit Nunaanni atuutilertinneqartoq peqqussut nr. 1005, 15. Oktobari 2004-meersoq naapertorlugu.

Nr. 5

Sinerissap qanittuani aalisarnerup nassuaataa matuma kingorna tassaavoq aalisarneq sinerissap aamma aalisarnikkut oqartussaaffiup tunngaviusumik killeqarfianit 3 somilit avammut ingerlanneqartoq. Nassuaat taanna angallatit angissusiisa killilerneqarnerat pillugu Aalisarsinnaanermut akuersissutit pisassiissutilu pillugit Namminersorlutik Oqartussat nalunaarutaanni nr. 8, 8. april 2016-imeersumi § 3, imm. 3-mi allanneqarsimasumut naapertuuppoq.

Nr. 6

Avataasiorluni aalisarnerup nassuaataa matuma kingorna tassaavoq aalisarneq, nr. 5-ip akerlianik, aalisarnikkut oqartussaaffimmi tunngaviusumik killeqarfifiup avataani 3 somilit avataani ingerlanneqartoq. Nassuaat taanna angallatit angissusiisa killilerneqarnerat pillugu Aalisarsinnaanermut akuersissutit pisassiissutilu pillugit Namminersorlutik Oqartussat nalunaarutaanni nr. 8, 8. april 2016-imeersumi § 3, imm. 4-mi allanneqarsimasumut naapertuuppoq.

Nr. 7

Inuussutissarsiutit immikkoortuinik nassuaat matuma kingorna tassaavoq aalisarnermik ingerlaqartunik sukumiinerusumik killiliineq, inuussutissarsiutitut pingaarnertut inuussutissarsiutigalugu aalisarnermik, saniatigooralugu aalisarnermik ingerlatsinerat

imaluunniit inuussutissarsiutiginagu aalisarnermik ingerlatsinerat malillugu immikkoortiterlugit. Nassuaatip nr. 2 aamma nr. 3 ataqatigai.

Nr. 8

”Akuerisaasumik pisarineqarsinnaasut tamarmiusut” nassuaataat. Akuerisaasumik pisarineqarsinnaasut tamarmiusut akulikitsumik taaneqartarpot TAC (Total Allowable Catch) aammalu tessani pingarnertut uumasoqatigiit imaluunniit amerlassutsit aalajangersimasut aalisarneqarsinnaasut tamarmiusut amerlassusaat ataatsimut isigalugit.

Nr. 9

”Pisassiissutit”-nik nassuaat. Pisassiissutit tassaapput ataatsimut pisarineqarsinnaasut immikkoortuisa ilaat.

Nr. 10

”Pisassiissutinit pigisat”-nik nassuaat. Pisassiissutit ilaannik atuisoqartarpot piffissamik killilingaanngitsumik akuersissutini. Akuersissutit piffissamik killilingaanngitsut amerlanertigut taaneqaannartarpot pisassiissutit ilaannik aamma paarlattuanik.

Nr. 11

”Ukiumoortumik pisassiissutit”-nik nassuaat. Ukiumoortumik pisassiissutit tassaasinnaapput assersuutigalugu aalisartut aalisakkanik ikerinnarsiortunik pisarisinnaasaattut akuersissutit, pisassat naliginnaasumik tunineqarsinnaanatik. Ukiumoortumik pisassiissutit aallaavittut ukiumut ataasinnarmut atuuttarput.

Nr. 12

”Pisassiissutinit pigisat amerlassusaat”-nik nassuaat. Pisassiissutinit pigisat amerlassusaat pisassiissutinit pigisanut atavoq. Pisassiissutinit pigisat procentinngorlugu kisitaavoq, pisassiissutinit pisigat amerlassusaat tonsinngorlugu kisitaavoq. Pisassiissutinit pigisat amerlassusaat ukiumoortumik pisassiissutit assiginngilaat.

Nr. 13

”Aalisarsinnaanermut akuersissut”-mik nassuaat. Aalisarsinnaanermut akuersissut “Licens” aalisarsinnaanermut akuersissutit nassuarneqarsinnaavoq. Aalisarsinnaanermut akuersissut pisassiissutinit, pisassiissutinit pigisanit, ukiumoortumik pisassiissutinit, pisassiissutinit pigisat amerlassusaanniit allaassuteqarpoq imatut; aalisarsinnaanermut akuersissut aalisakkanik aalajangersimasunik imaluunniit aalisagaqatigiinnut aalisarnissaanut ammaassisarpoq, pisassiissutinit, pisassiissutinit pigisanit, ukiumoortumik pisassiissutinit, pisassiissutinit pigisat amerlassusaat aalangiisuuusarput qanoq amerlatigisunik aalisartoqarsinnaanersoq. Taamatut agguaneq pingaaruteqarpoq.

Nr. 14

”Angallat”-mik nassuaat. Oqaaseqatigiit “aalisarnermut atatillugu” aalisarnermut innersuussivoq nr. 1-mi nassuaaserneqartumut.

Nr. 15

“Aalisariutit immikkoortui”-nik nassuaat. Isumasiuutaal niginnaasumik atorneqartarpoq aalisarnerup immikkoortinneranut avataasiorlutik aalisariutit immikkoortuinut imartap aalisarnikkut oqartussaaffigisap tunngaviusumik 3 somilinik killingata avataani, aamma aalisarnerup immikkoortinneranut sinerissap qanittuani aalisariutit immikkoortuinut imartap aalisarnikkut oqartussaaffigisap tunngaviusumik 3 somilinik killingatalu akornanni. “Aalisariutit immikkoortui” isumasiuutaal ataqtigiinnut allanut aamma atorneqarsinnaavoq. Isumasiuutaali inuussutissarsiutit immikkoortuinut paarlanneqassangilaq isumasiuut “Aalisariutit immikkoortui” aalisariutinut taamaallaat killiligaammatt.

Nr. 16

“Usinik nuussineq”-mik nassuaat. Pisanik taakkunangaluunniit tunisassianik suugaluartunilluunniit angallammut allamut nuussineq. Nuussineq pisinnaavoq immami imaluunniit umiarsualivimmi.

Nr. 17

Nassuaat taanna nunat tamat akornanni isumaqtigiissutini malittarisassaniluunniit nassuaatinut naapertuuppoq, soorlu NAFO Conservation and Enforcement Measures. Tunisassiornermut ilaapput tisaneq, poortuineq, aanaveersaaneq, qerititerineq, pujorineq, tarajorterineq, uutsineq, lagimut tarajulimmut immiineq, panertiterineq suliareqqiinerillu allat.

Nr. 18

Nassuaat siunnersuutip annertussusianik nalilersuinermut atuuppoq. Tassani oqaasertai § 7-imi piumasaqaatinut sanilliunneqassapput.

Nr. 19

“Nunami allamiut aalisariutaat”-nik nassuaat. Nassuaat siunnersuutip annertussusianik nalilersuinermut atuuppoq.

Nr. 20

“Tulaassineq”-mik nassuaat. Tulaassinermi pineqarpoq pisanik imaluunniit tunisassianik angallammiit nunamut nuussineq.

Nr. 21

“Pisat”-nik nassuaat. Oqaaseq: “aalisarnikkut qulakkeerneqarpoq” aalisarnermut nr. 1.-mi nassuarneqartumut innersuussivoq.

Oqartussaasut pillugit aalajangersakkat

§ 4-mut

Imm. 1-imut.

Aalajangersagaq nutaajuvoq erseqqissarneqarlunilu inatsimmi aalajangersakkanik eqqortitsinermik Naalakkersuisut nakkutilliissasut.

Imm. 2-mut.

Aalisarneq pillugu inatsisartut inatsisaata allanngortinnerra pillugu Inatsisartut inatsisaat nr. 28, 28. november 2016-imeersoq malillugu Naalakkersuisunut pisinnaatitsinermik aalajangersagaq ilaatigut atuufigaa, taanna malillugu malittarisassanik sukumiinerusunik atuutilersitsinikkut Naalakkersuisut akuersissutinik tunniussisarnermi allaffissornikkut ingerlatsinerup isumaginissaanut kommunimi ingerlatsivinnut peqqusisinnallutik. Pisinnaatitsinerli imatut annertusineqarpoq malittarisassanik aalajangersimasunik atuutilersitsinikkut inatsimmi akisussaaffit allat kommunini oqartussanut tunniussinissamik Naalakkersuisut piffissami ungasinnerusumi periarfissaqarlutik. Naalakkersuisut kommunalbestyrelsinit suliassangortitsineranni Naalakkersuisut qaffasinnerusumik naammagittaalliorfiusinnaasutut atuutissapput. Tamanna isumaqarpoq kommunalbestyrelsinit aalajangiiffigineqartut pillugit innuttaasut Naalakkersuisunut naammagittaalliuuteqarsinnaassasut.

§ 5-imut

Imm. 1-imut.

Aalajangersagaq manna tikillugu suleriaatsimik ingerlatitseqqiineruvoq, taanna malillugu Kalaallit Nunaanni Aalisarsinnaanermut Akuersissutinik Nakkutilliisoqarfik, maanna ”nakkutilliisutut oqartussatut” taaguuteqartut, kapitali 14 malillugu nakkutiginninnissamut nakkutilliinissamullu Inatsisartut inatsisaatigut peqquneqarsimallutik.

Imm. 2-imut.

Aalajangersakkami Kalaallit Nunaanni Aalisarsinnaanermut Akuersissutinik Nakkutilliisoqarfimmit allaanerusunik nakkutilliisutut oqartussanik toqqaanissamut Naalakkersuisut pisinnaatinneqarput. Inuttassaaleqineq pissutigalugu imaluunniit suliap kinguartinneqarsinnaannginnera eqqarsaatigalugu nakkutilliilluni suliaqarnermi oqartussat allat ilanngutsinneqarnissaat pisariaqalerpat atorneqarsinnaasutut aalajangersagaq ilaatigut eqqarsaatigineqarpoq.

Tamatuma saniatigut danskit naalagaaffimmi oqartussai isumaqatiginniarfigereerlugit sakkutut aalisarnermik alapernaarsuisui imaluunniit politiit nakkutilliisutut oqartussatut inissinneqarnissaat tulluarpat aalajangersagaq atorneqarsinnaavoq. Sakkutut aalisarnermik alapernaarsuisui aalisarneq pillugu inatsisip iluani immikkoortunik arlalinnik nakkutilleereerlillu nakkutiginnitooererput, taamaattumillu suleqatigiinnerup taassuma ingerlatiinnarneqarnissaa pissusissamisuussalluni. Politiit aamma nakkutilliinerni annikinnerusuni ilaatinneqarnissaat eqqarsaatigineqarsinnaavoq, assersuutigalugu illoqarfinni

mikinerusuni nunaqarfinnilu, Kalaallit Nunaanni Aalisarsinnaanermut Akuersissutinik Nakkutilliisoqarfiup piniarnermik aalisarnermillu nakkutilliisoqarfiginngisaani.

Kapitali 2

Aalisarnissamut tunngaviusumik piumasaqaatit

§ 6-imut

Imm. 1-imut.

Aalajangersakkami alajangersarneqarpoq Kalaallit Nunaata aalisarnikkut oqartussaaffiani inuussutissarsiutigalugu aalisarneq malittarisassatut aalisariutit pingaarnertut pigineqarnertik tunngavigalugu Kalaallit Nunaanni angerlarsimaffeqartut atorlugit ingerlanneqarsinnaasoq. Angallatip Kalaallit Nunaanni angerlarsimasuuneratut isigineqarnissaannut piumasaqaatit annertunerusut § 7-imi ersipput.

Kalaallit Nunaata aalisarnikkut oqartussaaffiani inuussutissarsiutigalugu aalisarsinnaanermut imm. 1 naapertorlugu aamma piumasaqaataavoq angallatit Kalaallit Nunaanni angerlarsimaffeqartutut nalunaarsorneqarsimassasut, tak. § 3, imm. 1, nr. 18 "... kalaallit angallataat...", tassani ersippoq kalaallit angallataat imatut paasineqassasut, angallatit suulluunniit Kalaallit Nunaanni angerlarsimaffeqartutut nalunaarsorneqarsimasut. Aalisariutit inuussutissarsiutigalugu aalisarnermi atorneqartut taamaalillutik Kalaallit Nunaanni angallatit normuannik ilisarnaateqassapput (GR.-nr.). Angallatit nalunaarsorneqarnissaannik piumasaqaat aalisariutinut tamanut Kalaallit Nunaanni aalisarnermi atorneqartunut atuuppoq, aamma angallatinut mikinerusut, soorlu umiatsiaaqqanut.

Nunami angallatit, aalisarnermut atatillugu atorneqartut, aamma aalajangersakkami ilaapput. Nunami angallatit taamaalillutik inuussutissarsiutigalugu aalisarnermut atatillugu taamaallaat atorneqarsinnaapput, angallatit Kalaallit Nunaanni angerlarsimaffeqartutut nalunaarsorneqarsimappata, tak. § 7. Nunami angallatit inuussutissarsiutigalugu aalisarnermut atatillugu atorneqartut nalunaarsorneqartarnerat pillugu Naalakkersuisut sukumiinerusunik malittarisassiussapput, tak. imm. 5.

Imm. 2-mut.

Aalajangersakkami aalajangersarneqarpoq, Kalaallit Nunaata aalisarnikkut oqartussaaffigisaani kalaallit angallataat atorlugit inuussutissarsiutigalugu aalisarnermi atorneqarnissaannut, angallatit Søfartsstyrelsimi Angallatinik Allattuiffimmi imaluunniit Umiarsuarnik Nalunaarsuiffimmi nalunaarsorneqarsimanissaat piumasaqaataasoq. Angallatit aalisariutitut nalunaarsorneqarsimassapput. Nunami angallatit assersuutigalugu ATV-t, qimussit snescooterillu inuussutissarsiutigalugu aalisarnermut atatillugu atorneqartut, aalajangersakkami ilaanngillat, tassa angallatit taakku Søfartsstyrelsip nalunaarsuiffiini nalunaarsorneqarsinnaanngimmata, tak. oqaaseqatigiit aappaat.

Siunnersuutigineqarpoq angallatinik nalunaarsuisarneq pillugu malittarisassat aalisarneq pillugu inatsimmut ilannguneqassasut, tassa nakkutilliineq eqqarsaatigalugu aalisarnermi angallatit tamarmik nalunaarsorneqartussaatitaanerisa atuutilersinneqarnissaa pisariaqarmat. Aalajangersagassatut siunnersuutip atuutilersinneqarnerani sunniutissaq tassaavoq umiatsiaaqqat GR-normulerlugit nalunaarsorneqartarnissaat.

Imm. 3-mut.

Aalajangersagaq imm. 1-2-mik saneqqutsinertut ilanngunneqarpoq, tassani aalajangersarneqarluni Kalaallit Nunaata aalisarnikkut oqartussaaffiani inuussutissarsiutigalugu aalisarnermi kalaallit angallataat kisimik atorneqarsinnaasut. Siunnersuummi aamma nunani allamiut angallataannik atuinissamik periarfissiisoqarmat, aalajangersagaq aalajangersakkanut Kalaallit Nunaata aalisarnikkut oqartussaaffiani nunat allamiut angallataat atorlugit inuussutissarsiutigalugu aalisarsinnaanermik malittarisassanut innersuussineruvoq.

Imm. 4-mut

Paasissutissat, imm. 1-3-mi piumasaqaatit eqqortinnejarsimanerannik aalajangiinissamut atorneqartussat, tassunga ilanngullugit paasissutissat piginnittuunermi pissutsinik paasisaqarnissamut atorneqartussat, Naalakkersuisut aalisarnermik ingerlatsisunut piumasarisinnaavaat. “Aalisarnermik ingerlatsisut” eqqarsaatigineqarpoq tassaasut inuit ataasiakkaat, suliffeqarfiiit peqatigiiffillu angallatinik piginnittuusut.

Aammattaaq inuit ataasiakkaat suliffeqarfiiillu aalisarsinnaanermut akuersissutiniik pigisaqartut, suliffeqarfimmili kingusinnerusukkut piginnittuunermi pissutsit allanngorsimallutik, piginnittuunermi pissutsinik nutaanik paasissutissiinissamik piumasaqaateqarfingeqartassapput.

Aalajangersakkami pinerluuteqarsimasut oqaaseqaateqannginnissamik pisinnaatitaaffeqarnerat allanngortinnejanngilaq.

Imm. 5-imut

Nunami angallatinik inuussutissarsiutigalugu aalisarnermut atatillugu atorneqartussanik nalunaarsuisarneq pillugu malittarisassiornissamik Naalakkersuisut aalajangersakkami tassani pisussaatinneqarput.

§ 7-mut

Aalajangersagaq inuussutissarsiortuni aalisarnerup kalaallit angallataat atorlugit pinissaanik § 6, imm. 1-imut piumasaqaatinut atatillugu isigneqassaaq.

Imm. 1-imut.

Aalajangersagaq angallatinut assigiinngitsunut tamanut § 3, nr. 14-imik ilanngunneqartunut atuuppoq. Assersuutigalugu qimussit inuussutissarsiutigalugu qaleralinniarnermi atorneqartut aamma ilanngunneqarput.

Aalajangersakkami aalajangersarneqarput angallatit Kalaallit Nunaanni angerlarsimaffeqartutut isigineqarnissaannut piumasaqaatit. Aalajangersagaq imm. 2 aamma 3-mut atatillugu isigineqassaaq, tassani piginnittuunermut piumasaqaatit aalajangersimasut allaqqapput.

Siunnersummi nr. 1-imik inuit ataasiakkaat kattuttut ilanngunneqanngillat, taamaallaalli inuit ataasiakkaat ilannguneqarlutik. Tamassumunnga pissutaavoq, inuit ataasiakkaat kattuttut inuttut nammineq, assigimmik pisussaaffeqarlutik toqqaannartumillu akisussaaffeqartut suliffeqarfittut isigineqartariaqarnerat, soorlu interessentskabitut (soqutigisaqaqatigiiffittut). Interessentskabit nr. 2-mi suliffeqarfinnut ilanngunneqarput, tak. imm. 3, nr. 1. Suliffeqarfifit tamarmik, inuussutissarsiutigalugu aalisarnermk ingerlataqartut, imm. 3-mi piumasaqaatit eqqortissavaat, tassunga ilanggullugit qularnaveeqqutigineqartut qularnaveeqqutillu allat pillugit piumasaqaatit.

Aalajangersakkami immikkoortut pingasut allaqqapput:

- 1) Inuit ataasiakkaat
- 2) Suliffeqarfifit peqatigiiffiillu
- 3) Suliffeqarfifit peqatigiiffiillu pisortanit pigineqartut imaluunniit suliffeqarfifit peqatigiiffiillu Namminersorlutik Oqartussanit peqataaffigineqartut.

Inuit ataasiakkaat imm. 2-mi piumasaqaatit eqqortissavaat.

Suliffeqarfifit peqatigiiffiillu imm. 3-mi piumasaqaatit eqqortissavaat, tak. nr. 2.

Nr. 3 naapertorlugu Kalaallit Nunaanni suliffeqarfik peqatigiiffilluunniit pisortanit pigineqartoq imaluunniit suliffeqarfik peqatigiiffilluunniit Namminersorlutik Oqartussanit peqataaffigineqartoq Kalaallit Nunaanni angerlarsimaffeqartutut isigineqarput.

Imm. 2-mut.

Nr. 1

Taaguut “aalajangersimasumik attuumassuteqarneq” imatut paasineqassaaq, inuk qaammatisiutit malillugit ukiumi ataatsimi sivikinnerpaamik qaammatini arfinilinni najugaqartoq, Kalaallit Nunaanni akileraartussaatitaasoq kiisalu Kalaallit Nunaanni aalajangersimasumik najugaqarluni angerlarsimaffeqartoq

Nr. 2

Kalaallit Nunaata nunami aalisarnikkullu oqartussaaffigisaani inuussutissarsiutigalugu aalisarnermi inuit Kalaallit Nunaannut attuumassuteqartut kisimik ingerlatsisinnaapput. Siunertaq tassaavoq Kalaallit Nunaanni inuussutissarsiorluni aalisarnerit suugaluartulluunniit inunnit Kalaallit Nunaanni inuaqatigiinnut aalajangersimasumik attuumassuteqartunit ingerlanneqarnissaasa qulakkeerneqarnissaa. Taamaammat ilaatigut ukiuni kingullerni imminnut atasuni marlunni kingullerni inunniq nalunaarsuiffimmi Kalaallit Nunaanni najugaqartutut nalunaarsorneqarsimanissaq pillugu piumasaqaat aalajangersarneqarpoq.

Kalaallit Nunaanni najugaqarfitt akornanni nuussimagaanni Kalaallit Nunaanni ukiuni marlunni najugarisap allannginnissaanik piumasaqaateqartoqanngilaq.

Saneqqutsisoqarsimaneranik pasitsaassaqartoqarpat piumasaqaat “Kalaallit Nunaanni inuaqatigiinnut aalajangersimasumik attuumassuteqarneq” immikkut isumaqalissaq.

Taamaattoqarpat inuk Kalaallit Nunaanni inuaqatigiinnut aalajangersimasumik attuumassuteqarnersoq aalajangerneq pineqartoq Kalaallit Nunaanni inuaqatigiinnut ilaavingersoq apeqqutaassaaq, tassa ilaatigut pineqartoq Kalaallit Nunaanni najugaqavingersoq najugaqartuusaaginnannginnersorlu isiginiarneqassaaq.

Nr. 3

Piumasaqaataavoq pineqartoq Kalaallit Nunaanni tamakkiisumik akileraartussaatitaanissa qaammatisiutillu malillugit ukiuni kingullerni marlunni siuliini akilerartussaatitaasimanissa. Qaammatisiutit malillugit ukioq tassaavoq piffissaq 1. januarimiit 31. decembarimut. Assersuutigalugu angallat 1. novembari 2017-imiit inuussutissarsiutigalugu aalisassappat, piginnittooq Kalaallit Nunaanni tamakkiisumik akileraartussaatitaassaaq, piffissamilu 1. januari 2015-imiit 31. decembari 2016-imut Kalaallit Nunaanni tamakkiisumik akileraartussaatitaasimassalluni.

Imm. 3-mut.

Nr. 1

Suliffeqarfik aalisariummik piginnituuppat, suliffeqarfik aktieselskabiussaaq, anpartsselskabiussaaq, andelsselskabiussaaq, interessentskabiussaaq imaluunniit partsrederiussalluni. Kommanditselskabit ilaatinneqanngillat. Interessentskabini peqataasut, inuttut nammineq, assigiimmik pisussaaffeqarlutik toqqaannartumillu akisussaaffeqartoqarlutik, maannakkut aalajangersakkami tassani ilangunneqarput. Interessentskabit Kalaallit Nunaanni angerlarsimaffeqartutut isigineqassagunik suliffeqarfinnut piumasaqaatit atussavaat, taamaalillunilu taamaallaat piginneqataassutit tunniunnissaannut suliffeqarfitt suunissaannut allanut akuerineqartut annertoqataannik, tak. imm. 3, nr. 3, interessentskabini piginneqataassutit pigisassanngorlugit quaternaveeqquitulluunniit tunniunneqarnissaat akuerisaavoq.

Nr. 2

Aalajangersakkap piumasaqaatigivaa ingerlatseqatigiiffiup 2/3-ii inunniq ataasiakkaanik piginneqassasut, imm. 2-mi nr.1-3-mut naammassinnissimasut.

Kalaallit Nunaanni aalisariutinik piginnittut Kalaallit Nunaannut attuumassuteqarnissaat aalajangersakkami qulakkeerneqarpoq.

Arlariinnik assigiinngitsunik aalisarneq pineqartillugu aalisarnernut sorlernut aalisarneq apeqqutaatillugu nalilersuineq pissaaq, ingerlatseqatigiiffiup pineqartup piumasaqaatit naammassisimaneranut nalilersuinermi.

Erseqqissarneqarpoq ingerlatseqatigiiffimmi piginneqataassutit “assinganik taasisinnaatitaaneq assigisaallu aqqutigalugit sunniuteqaqataassutigineqassasut”.

Piumasaqaatit eqqortinneqarnerannut uppermarsaatit naammassineqarsimanersut pillugit, tak. § 6, imm. 4, Naalakkersuisut qaqugukkulluunniit piumasarisinnaavaat.

Nr. 3

Ingerlatseqatigiiffiit malittarisassaannut piumasaqaatit sukumiinerusut aalajangersakkami aalajangersarneqarput. Kalaallit Nunaanni aalisariutinik piginnittut qularnaveeqqusiiiffigineqartullu ingerlatseqatigiiffinni qularnaveeqquteqartut Kalaallit Nunaannut attuumassuteqarnissaat aalajangersakkami qulakkeerneqarpoq.

Piumasaqaatit eqqortinneqannginnerisa kingunissaa tassaavoq ingerlatseqatigiiffiit inuussutissarsiutigalugu aalisarsinnaatitaannginnerat. Ingerlatseqatigiiffiit inuussutissarsiutigalugu aalisarnermut akuersissummik pigisaqartut imm. 3-mi aalajangersakkat eqqortinngippatigit pisinnaatitaaffiup utertinneqarneranik kinguneqassaaq, tak. § 21, imm. 1.

Imm. 4-mut

Aalajangersagaq imm. 3, nr. 2-mut atavoq unali aalajangersagaq taamaallaat raajarniarnermut tunngavoq. Aalajangersakkap siunertaraa raajarniarneq tamarmi inunniit Kalaallit Nunaanni najugaqartunit pigineqalernissaa.

§ 8-mut

Immikkut akuersisarnermut malittarisassanut tunngavik tassaavoq, pissutsinit allassimasunit immikkorluinnarlu ittunit immikkut akuersissuteqartoqassappat aalisarnermik inuussutissarsiornarerup piffissamut sivisuumut ineriartortinneqarnissaanut iluaqutasut siuarsarneqarnissaannik mianerinninnissaq, taamaattoqanngippat piumasaqaatit tamanut tunngasut aalisarnerup piffissamut sivisuumut ineriartortinneqarnissaanut killiliisussaappata.

Imm. 1-imut

Nr. 1

§ 7, imm. 2, nr. 1-3-mi piumasaqaatinit Naalakkersuisut immikkut akuersissuteqarnermik nalunaaruteqartarnissaannik siunnersummi periarfissiisoqarpoq. Tassa Kalaallit Nunaanni inuiaqatigiinnut aalajangersimasumik attuumassuteqarnissaq akileraartussaatitaanerlu pillugit piumasaqaatit tamanut tunngasut eqqarsaatigalugit.

Nr. 2

Inuit nunani allani ilinniagaqarnermik ingerlataqarsimasut, pingaartumillu inuit nunani allani aalisarnermut attuumassuteqartumik ilinniagaqarsimasut aalajangersagaq naapertorlugu immikkut akuerineqarnissaasa anguneqarnissaanut aalajangersagaq periarfissiivoq.

Aalisarnermik inuussutissarsiummi ineriertortitsinermik siuariartornermillu inunnilli tamatumunnga immikkut piginnaasaqartut pilerisutsilernissaat siunertalarugu inuit taakku aalisarnermi namminersortutut ingerlatsilernissaannut periarfissinneqarput, naak taakku akileraartarnermut pisussaaffimmik aamma ukiuni kingullerni marlunni Kalaallit Nunaanni inuit nalunaarsorsimaffianni najugaqarnissamut piumasaqaammik naammassinninngikkaluartut.

Tassunga atatillugu ”najugaqarallarnermi” pineqartup Kalaallit Nunaata avataani piffissami qanoq sivisutigisumik najugaqarsimanera aalajangiisutut pingaartinneqanngilaq, kisiannili pineqartup ilinniagaqarsimanera imaluunniit assingusunik piginnaasaqalernissaq siunertalarugu Kalaallit Nunaannit qimagussimanera pingaartinneqarluni. Pineqartoq taamaattumik ilinniarsimasinnaavoq, sulifimmik misiliisimasinnaavoq il.il.

Ilinniagaqarnerup aalisarnermut attuumassuteqarsimanissa piumasaqaatigineqanngilaq, kisianni aalisarnerup iluani ilinniagaqarneq, imaluunniit aalisarnerup iluani atorneqarsinnaasoq, immikkut akuersisoqarnissaanik nalilersuinermi pingaartinneqassalluni.

Imm. 2-mut

Aalajangersagaq nutaaajuvoq. Imm. 2 nutaajusoq naapertorlugu aalisariummik aamma aalisarsinnaanermut akuersisummit piginnittup akornanni kinaassuseq pillugu piumasaqaammi immikkorluinnaq pisoqartillugu immikkut akuersisoqarsinnaavoq (saneqqutsoqarsinnaavoq). Tamanna tassaasinnaavoq aalisariutip aserornera, sivisunerusumik siumullu naatsorsuutiginngisamik amutsivimmiinnera aamma pissutsit allat tamatumunnga assingusut. Taamatut immikkut pisuni piffissami aalisariummik allamik utaqqiisaasumik attartortoqarsinnaavoq.

Aalisariummik allamik attartornermi aallaaviatigut aalisariut Kalaallit Nunaanni nalunaarsorneqarsimasoq, Kalaallit Nunaanni angerlarsimaffeqartoq attartorneqassaaq. Aalisariummik atorneqarsinnaasumik Kalaallit Nunaanni nassaartoqarsinnaanngippat, tassunga ilanngullugu aalisariut pisariaqartitanut atorneqarsinnaasoq, qinnuteqartup aalisariummik nunamit allameersumik attartorsinnaaneranut akuersisoqarsinnaavoq. Aalisarnermi pineqartumi ilaatigut pisariaqartitsinermik aamma Kalaallit Nunaanni aalisarnermut pineqartumut usitussutsimik pissarsinissamut periarfissanik atuuttunik aalajangersimasumik naliliinermik aalajangiineq tunngaveqassaaq. Taamaattorli Kalaallit Nunaanni angerlarsimaffeqartumik aalisariummik atorneqarsinnaasumik pissarsinissaq ajornartoq qinnuteqartup upternarsartussaavaa.

Akuersisoqassappat qinnuteqaammik nalilersuinermi attartornissamut isumaqatigiissut ilanngunneqassaaq.

Piffissamut attartorfiusumut pisut aalajangersimasut apeqqutaapput, soorlu aalisariutip taartissap ataavartussap pissarsiarineqarnissaanut piffissaq qanoq sivisutiginersoq. Immikkut akuersinissap sivisussusaa ulloq aallartiffik naanissaalu ilisimatitsissutigalugu aalajangersarneqassaaq.

Aalisariummik akuersisummillu piginnittup akornanni kinaassutsimut piumasaqaammit immikkut akuersisoqarnera nalunaarutigineqarpat akuersisummit piginnittup § 6 aamma § 7-imi piumasaqaatit naammassissavai.

Aalajangersagaq manna malillugu attartornermi pisassiissutinik nammineq pigisanik aamma ukiumoortumik pisassiissutinik niuernermut piumasaqaatit nalinginnaasut kiisalu pisassiissutinik attartornissamut inerteqqussut suli malinneqassapput.

Imm. 3-mut

Aalajangersagaq akiitsoqarfigisap qularnaveeqqusiiiffigisamik aalisariummik tigusisariaqarsimanagerani immikkut pisunut tunngasuuvvoq. Tassani Inatsisartut inatsisaanni piumasaqaatinik naammassinnittumik piginnittumik nutaamik nassaartoqarnissaata tungaanut piffissami killeqartumi aalisarnerup ingerlatiinnarnissaanut akiitsoqarfiusumut immikkut akuersinermik nalunaaruteqarnissaq pisariaqarsinnaavoq.

Aamma taamaappoq akiitsoqarfigisap, taarsigassarsianut qularnaveeqqusiiineq tunuliaqutaralugu pisassiissutinik niuerutigineqarsinnaasunik nammineq pigisanik tigusisimappat. Piffissami utaqqiisaagallartumi pisassiissutini pineqartuni aalisarnerup ingerlatiinnarnissaai inuiaqatigiit soqutigisaraat, akiitsoqarfigisap pisassiissutinik nammineq pigisanik tunisinissaata tungaanut.

Piffissaq qanoq sivisutigissanersoq pisut aalajangersimasut aallaavigalugit aalajangerneqassaaq, tassunga ilanngullugu pisassiissutit nammineq pigisat imaluunniit aalisariutip tunineqarnissaanut piffissaq qanoq sivisutiginissaanik naatsorsuuteqarneq aamma tunisinissaq ajornannnginnersoq eqqarsaatigalugit. Immikkut akuersinerup sivisussusaa ulloq aallartiffik naanissaalu ilisimatitsissutigalugit aalajangersarneqassaaq.

Imm. 4-mut

Naalakkersuisut immikkut akuersineq piffissamut killeqartissinnaavaat aamma piumasaqaatit erseqqinnerusumik allassimasut piumasarisinnaallugit.

Naalakkersuisut assersuutigalugu immikkut akuersinissaq sioqqullugu piumasarisinnaavaat aalisariummik imaluunniit ingerlatseqatigiiifimmik piginnittup kinguaariit nikinnissaat eqqarsaatigineqartoq tamanut ammasutut tuniniaanertut nalunaarutigissagaat, taamaalillunilu § 6-7-imik piumasaqaatinik naammassinnittumik Kalaallit Nunaanni pisisussamut periarfissat qulaajarneqarlutik.

Immikkut akuersinissamut aamma Naalakkersuisut piumasarisinnaavaat aalisariummut imaluunniit ingerlatseqatigiiifimmut pineqartumut utertitsilluni pisinissamut pisinnaatitaaffimmik Naalakkersuisut angusaqassasut. Immikkut akuersineq taamatut pisoqartillugu taamatut utertitsilluni pisinissamik pisinnaatitaaffimmi piumasaqaatit erseqqinnerusumik allanneqarnerinik imaqassaaq.

Immikkut akuersinissamut piumasaqaatinik Naalakkersuisut aalajangersaasinnaanerannut periarfissat taaneqartut tamakkiisuunngillat.

§ 9-mut

Imm. 1-imut

Aalajangersagaq taamaallaat Kalaallit Nunaanni aalisarnermut atuuppoq. Aalajangersakkami siunertaq tassaavoq isumalluutinut atorneqarsinnaasunut sanilliullugu aalisarsinnaanermut piginnaasanik annertuallaartunik sanaartortoqarnissaanut pinngitsoortitsinissaq.

Inuussutissarsiutigalugu aalisarnermut aalisariutinik pisinerni akuersisummik piumasaqaateqarnissamut malittarisassanik Naalakkersuisut aalajangersaasinnaanerannut

aalajangersakkami pisinnaatitsisoqarpoq. Aalajangersagaq naapertorlugu malittarisassanik aalajangersaaneq aalisarnissamut periarfissanut aalisariutit Kalaallit Nunaanneersut aalisariutaanni aalisarsinnaassutsimik naleqqussaanissaq siunertaralugu pissaq, tak. § 6, imm. 1. Aalajangersagaq naapertorlugu malittarisassanik aalajangersaaneq taamaalluni aalisarnermi pineqartumipisaqarnissamut aalisarsinnaassuseq aamma pisat amerlassusaat periarfissaasut eqqarsaatigalugit pissaq, taamaallunilu aalisariutit nutaat pillugit aningaasaqarnikkut eqqarsaatigisassat, aalisariutit pioreersutut eqqarsaatigalugit aningaasaqarneq kiisalu aalisarnermi isumalluutit allanngutsaaliornissaannik eqqarsaatiginnineq ilaatinneqarlutik. Tamanna pillugu § 2-mut nassuaatit takukkit.

Imm. 2-mut

Aalajangersagaq taamaallaat Kalaallit Nunanni aalisarnermut atuuppoq. Aalajangersagaq imm. 1-imi mianerisassat assigalugit siunnerfeqarpoq, aalisariutinut nutaanut takkuttunut aningaasarliornissap, aalisariutini pioreersuni aningaasaqarnerup ajorseriannginnissaa kiisalu aalisakkat isumalluutit sinneqartumik iluaqtigineqarnissaasa pinngitsoortinnissaat.

Mianerisassat taakku isumaginiarlugit Kalaallit Nunaanni aalisarnermut malittarisassanik Naalakkersuisut aalajangersaasinnaapput, taamaalluni aalisarsinnaanikkut piginnaasamik annertunerulersitsisumik aalisariutip allanngortinnissaanut akuersissuteqarnissamik piumasaqaateqartillugu.

Imm. 3-mut

Aalajangersagaq malillugu piumasaqaatit pisariillisaanissaq siunertaralugu kiisalu aalisarnermi imminut akilersinnaassuseq allanngortinniarnagu imaluunniit annertusiniarlugu aalajangersarneqarput.

Tamanna assersuutigalugu pisinnaavoq aalisariut nutaaq takkuttoq taamaallaat aalisakkanik aalajangersimasuinnarnik aalisarnissamut atorneqarnissaa piumasaqaatigalugu, imaluunniit aalisariut ataaseq amerlanerilluunniit erseqqinnerusumik piginnaasaqartutut aalajangersarneqartut aalisarnermiit anissasut, aalisariummik nutaamik ingerlluarnerusinnaasumillu ikkussisoqarluni.

Aalajangersakkap siunertaa aamma tassaavoq aalisarnermi ataatsimi sinneqartumik aalisarsinnaassuseqarnissap pinngitsoortinnissa. Aalajangersakkami pissutsit taaneqartut piumasaqaatigalugit akuersissutinik atuutilersitsinikkut aalisariummik nutaamik ingerlluarnerusinnaasumillu atulersitsisoqarneratigut sinneqartumik piginnaasanik ikkussisoqannginnissaa qulakkeerneqassaaq.

Aalisarsinnaassutsip taamaaqataa aalisarunnaarsitsisoqartinnagu aalisariutinik nutaanik aalisalertsisoqarnissaanik piumasaqaatinik saqqummiussisoqarnissaanut aalajangersagaq tunngavissanik periarfissiivoq, taamaalluni tonnageanik annertunerusunik inerisaasoqarnani. Aalajangersagaq aamma tonnageap appartinnissaanut atorneqarsinnaavoq.

*Aalisariutit nunanit allaneersut atorlugit Kalaallit Nunaata aalisarnikkut
oqartussaaffigisaani inuussutissarsiutigalugu aalisarneq*

§ 10-imut

Imm. 1-imut

Aalajangersagaq taamaallaat aalisariutinut Kalaallit Nunaannit pisuunngitsunut atuuppoq aamma aalisarnissamut periarfissanut erseqqinnerusumik isumaqatigiissutaasunut nunat allamiut aalisariutaasa Kalaallit Nunaata aalisarnikkut oqartussaaffigisaani inuussutissarsiuutigalugu aalisarsinnaanerannut periarfissiilluni.

Pisassiissutinik aalisariutit aalisarsinnaasaannik Naalakkersuisut aalajangersaassapput.

Imm. 2-mut

Tunngaviusumik killeqarfik aalisarnermi killigititap naatsorsorneranut tunngaviuvoq. Tunngaviusumik killeqarfik Kalaallit Nunaata imartaata killilerneqarnera pillugu 27. maj 1963-imi ileqqoreqqusami aalajangersarneqarpoq, kingusinnerusukkut allannguutilik.

Tunngaviusumik killeqarfimmiit 12 somilit iluanni aalisarnissamut nunat allamiut aalisariutaannut immikkut akuersisummik Naalakkersuisut tunniussisinnaapput. Immikkut akuersinissamut periarfissaq siunnersuutigineqarpoq pingaartumik Kalaallit Nunaanni nunami tunisassiorfinnut tulaassisinnaanerat periarfissaqartinniarlugu nunat allamiut ingerlateqatigiiffiinut isumaqatigiissusiornissaq periarfissaatinniarlugu.

Pissutsit assingusut allat assersuutigalugu tassaasinnaapput ukiumi ataasiinnarmi aalisariutit Kalaallit Nunaanneersut aalisarsinnaasaannik amerlanerusunik 12 somilit iluanni pisassiissutit amerlaneruner. Pisassiissutinik taamatut sinneruttunik nunat allamiut aalisarutaatileqatigiiffiannut tunisinissaq Naalakkersuisut kissaatigissappassuk biologit siunnersuinerat isumaginiarlugu tunngaviusumik killeqarfiup iluani taakku aalisartinneqarnissaat pisariaqarsinnaavoq.

Tunisassiassanik pilersuinermit allaanerusumik pissutsini allani 12 somilit iluanni nunat allamiut aalisariutaasa aalisarnissaannut akuersisummik tunniussisoqarsinnaanersoq naliliinermik aalajangersimasumik tunngaveqassaaq. Taamatut aalajangiinermi inatsimmi siunertaq malinneqassaaq aamma inuussutissarsiuutigalugu aalisagaqassutsikkullu piujuartitsinermik tunngaveqarluni aalisarnermk isumaginnittoqassalluni kiisalu siunissamut ungasinnerusumut inuiaqatigiit aningaasaqarnikkut iluanaaruteqartitsisoqassalluni nungusaataanngitsumillu aalisartoqassalluni.

Kalaallit Nunaata aalisarnikkut oqartussaaffigisaani inuussutissarsiuutiginagu aalisarneq

§ 11-imut

Aalajangersakkami inuussutissarsiuutiginagu aalisarneq pillugu malittarisassaliortoqarpoq.

Imm. 1-imut

Danskit naalagaaffianni innuttaasut Kalaallit Nunaanni aalajangersimasumik najugaqartut aalajangersagaq malillugu Kalaallit Nunaata nunami aalisarnikkullu oqartussaaffigisaani inuussutissarsiuutiginagu aalisarsinnaapput.

Aamma nunat allat naalagaaffiini innuttaasut Kalaallit Nunaanni aalajangersimasumik najugaqartut aamma ukiuni ataqatigiissuni marlunni najugaqarsimasut danskit naalagaaffianni innuttaasutulli taamatut pisinnaatitaaffeqarput.

Imm. 2-mut

Takuneqarsinnaavoq inuit tamarmik, imm. 1-im i aalajangersakkamut ilaannngitsut, inuussutissarsiutiginagu aalisarsinnaanermut akuersissuteqassasut, tamatumalu kingunerisaanik assersuutigalugu takornarissat inuussutissarsiutiginagu aalisarnermik ingerlatsisinnassaagunik aalisarnissamut allagartaqassasut.

Imm. 3-mut

Aalajangersakkami imm. 2 malillugu aalisarnermut akuersissutinik tunniussisarneq, pissarsisarneq annasaqaqtarnerlu pillugit malittarisassanik aalajangersaanissamut Naalakkersuisunut pisinnaatisisoqarpoq. Aalajangersagaq taanna malillugu malittarisassanik aalajangersaanermi assersuutigalugu Inatsisartut inatsisaanni matumani siunertatut aalajangersakkat kiisalu takornariaqarnikkut inuussutissarsiutip taassumalu ineriartortinneqarnera Naalakkersuisunit pingartinneqarsinnaapput.

§ 12-imut

Imm. 1-imut

Aalajangersakkami Naalakkersuisut malittarisassanik aalajangersasinnaanermut pisinnaatinneqarput, taakkunani aalisakkanik aalajangersimasunik inuussutissarsiutiginagu aalisarnermik malittarisassanik. Malittarisassanik aalajangersaaneq imm. 2-mi allassimasut naapertorlugit pissaaq. Assersuutigalugu aalisakkanik aalajangersimasunik aalisarneq peqassutsimut iluaqtaanngitsumik ineriartorpat imaluunniit aalisarsinnaanermi inuussutissarsiortut immikkoortuisa aalajangersimasut salliutinnissaat tunngavissaqarpat malittarisassanik aalajangersaasoqarsinnaavoq.

Kapitali 3

Inuussutissarsiutigalugu aalisarneq pillugu malittarisassaliorneq Malittarisassatigut aaqqiinerit

§ 13-imut

Imm. 1-imut

Aalajangersagaq inuussutissarsiutigalugu aalisarnerup malittarisassiorneranut, taamaalillunilu tamanna pillugu ukiumoortumik nalunaarutit atulersinnerinut tunngaviuvoq. Malittarisassat taakku salliutillugu pisuussutinik aalisariutit Kalaallit Nunaanneersut aalisarsinnaasaannik atuinermut tunngasuupput, tak. nr. 1-6. Aammattaaq imm. 1-im i pisinnaatisissut atorlugu pisuussutit nunat allamiut aalisariutaasa aalisarsinnaasaannik atuineq pillugu malittarisassanik aalajangersaasoqarsinnaavoq. Nr. 1-6-im i malittarisassat tassaagajupput pisassat amerlassusaat, ukiup nikikkiartornerani aalisakkanik pisassiissutit agguarneri assigisaalu. Manna tikillugu pisartut assigalugit malittarisassat sappingisamik ataatsimoortillugit atuutilersinneqassapput.

Pilersaarusiornissamik periarfissaqarnissaq pillugu siunertap saniatigut, aalisarneq imatut ineriartorpat allatut atuinissamik Kalaallit Nunaannit kissaateqartoqarluni, allannguiteqartitsinikkut sukkasuumik iliuuseqarnissamut periarfissiisunik malittarisassiorissamik pisariaqartitsinermik malittarisassiornermut takussutissaavoq.

Iliuutsit aalisarnermik malittarisassiornermi atorneqarsinnaasut arlallit allaqqapput. Soorlu inatsisip oqaasertaani ersittoq, iliuutsit inatsisini allani aalajangersakkat naapertorlugit aalajangersarneqartut pisuussutinut aalisarneqarsinnaasunut tunngatillugu inuussutissarsiortuni aalisarnermik naleqquttumik aaqqissuussinissaq siunertaralugu aamma

atorneqarsinnaapput. Tamanna assersuutigalugu aalisakkanik piffissani tunineqarsinnaannginneranni eqqissisimatitsinermik atuutilersitsinermi atuuppoq.

Aalisarnerit immikkuullarissut eqqarsaatigalugit pisuussutinik aningaasaqarnikkut oqimaaqtigiissumik atorneqarnissaat isumagineqarpoq aamma naammattumik mianerinnilluni aalisarnissap qulakteernissaanut sukumiinerusunik malittarisassiortoqarluni.

Kapitali 4
Aalisarsinnaanermut akuersissuteqartarneq
Akuersissutit

§ 14-imut

§ 14-imi aalajangersagaq Kalaallit Nunaata aalisarnikkut oqartussaaffigisaani inuussutissarsiutigalugu aalisarnernut tamanut atuuppoq.

Imm. 1-3 aalajangersakkani aalajangersarneqarpoq aalisarsinnaanermut akuersissuteqartinnani inuussutissarsiutigalugu aalisarneq inerteqquaasoq.

Imm. 1-imut

Aalajangersagaq nutaaajuvoq, aalajangersarneqarlunilu taamaallaat aalisariut inuussutissarsiutigalugu aalisarsinnaanermut akuersissuteqarpat aalisariut atorlugu inuussutissarsiutigalugu aalisartoqarsinnaasoq.

Siunnersuutigineqarpoq aalisariut aalajangersimasoq atorlugu aalisarsinnaanermut akuersissuteqarnissaq piumasaqaatigalugu inuussutissarsiutigalugu aalisartoqarsinnaanera aalajangersakkakut erseqqissaasoqassasoq.

§ 14, imm. 1 kinguneqarpoq inuussutissarsiutigalugu aalisarnermut piumasaqaatit imarisaalu inatsisit tunngavigalugit aalisarsinnaanermut akuersissummit peqarluni ingerlanneqartassasoq. Tunniussisarneq suli allaffissornikkut pisassaaq.

Naalakkersuisut aalisagaqtigiinnik ataasiakkaanik aalisarnermut malittarisassiornissamut suli periarfissaqassasut kisiannili aalisarsinnaanermut akuersissuteqarani inuussutissarsiutigalugu aalisarsinnaaneq pillugu Naalakkersuisut malittarisassiorsinnaanngillat.

Aalajangersakkami naggataatigut aalajangersarneqarpoq aalisarsinnaanermut akuersissutinut piumasaqaatinik aalajangersaasoqarsinnaasoq.

Imm. 2-mut

Aalajangersakkami aalajangersarneqarpoq aalisarsinnaanermut akuersissutini minnerpaamik aalisariutip piginnittua, aalisariutip aqqa aalisariutillu ilisarnaataa pillugit aalisarsinnaanermut akuersissummi aallaqqasoqassasut. Aalisariutip piginnittua pillugu paassisutissat imatut erseqqratisigissapput cpr. normuata najukkallu allaqqanerisigut piginnittoq kinaanersoq ersarissumik paasineqarsinnaalluni.

Imm. 3-mut

Aalajangersakkap kinguneraa inuussutissarsiutigalugu aalisarneq taamaallaat inuussutissarsiutigalugu aalisarsinnaanermut akuersissummit peqartumit ingerlanneqarsinnaasoq, tak. 2, aamma inuussutissarsiutigalugu aalisarsinnaanermut

akuersissut aalisariutip piginnittuanut tunniunneqassasoq, tak. 1. Piginnittooq inuusinnaavoq imaluunniit inatsisitigut inuttut isagineqarsinnaasuulluni.

Kalaallit Nunaata aalisarnikkut oqartussaaffiani inuussutissarsiutigalugu aalisarneq taamaalluni taamaallaat aalisariutip piginnittuanit ingerlanneqassaaq taamaallaallu aalisarsinnaanermut akuersissummik tunniussisoqarsimappat, tak. imm. 1 aamma imm. 2.

Ingerlatseqatigiiffiup sulisui ingerlatseqatigiiffimmut naligiisinneqarput, taamaalluni ingerlatseqatigiiffik sinnerlugu aalisartoqarpat sulliffeqarfillu Kalaallit Nunaata aalisarnikkut oqartussaaffigisaani inuussutissarsiutigalugu aalisarsinnaanermut akuersissummik pigisaqarpat ingerlatseqatigiiffiup sulisui aalisariut ingerlatseqatigiiffiup pigisaa atorlugu aalisarsinnaanerat akuerisaalluni.

Imm. 4-mut

Aalajangersakkami aalajangersarneqarpoq taamaallaat aalisarsinnaanermut akuersissut aalisariummut tunniunneqartup atorneqarnissaa akuerisaasoq.

Aalisariut “akuersissummi allassimassaaq”, aalisariut imatut allanneqarsimappat aalisariutip sorliunera takuneqarsinnaalluni aalisariullu allanit immikkoortinnejarsinnaalluni.

§ 15-imut

Imm. 1-imut

Kalaallit Nunaanni aalisarnermut akuersissutit assigiinngitsut uku pingasuupput:

- 1) Piffissamut killilikkamut akuersissutit, pisarineqarsinnaatitaasut amerlanerpaaffissalerlugit.
- 2) Piffissamut killililigaanngitsunut akuersissutit, pisarineqarsinnaatitaasut amerlanerpaaffissalerlugit.
- 3) Piffissamut killilikkamut akuersissutit, pisarineqarsinnaatitaasut amerlanerpaaffissalernagit.

Akuersissutit piffissamut killineqarsimasut amerlanertigut pisassiissutinik niuerutigineqarsinnaasunik pigisaqartitsisarput. Akuersissutit piffissamut killiligaasunngikkaluarlutik taamaattoq paasineqassanngilaq akuerissutit naassaanngitsumut pigineqassasut. Piffissamut killilerneqannginnerat ima paasineqassanngilaq akuersissut piffissamut aalangerneqarsimasoq.

Akuersissutit piffissamut killilerneqarsimasut akuerisaasumik aalisarneqarsinnaasunik pisassiissutitallit paggatassiinermik aalisarnermut atorneqarsinnaasarput. Tassa imaappoq akuersissutilik killeqanngitsumik aalisarsinnaasoq, aalisarneqarsinnaasulli pisassiissuteqarnikkut killilersorneqarsinnaasarput.

Imm. 2-mut

Aalajangersakkami aalajangersarneqarpoq aalisarsinnaanermut akuersissutit piffissamut killiligaanngitsut ukiunut tallimanut siumut nalunaaruteqarluni piffissamut killiligaasunngortinnejarsinnaasut. Tamanna Inatsisartut inatsisaatigut nutaakkut aalajangersarneqassaaq, tassani piumasaqaatit sukumiinerusut aalajangersarneqassallutik taamaalluni siunnersummi uani pisinnaatitsinkut pisinnaanani.

Akuersissutit piffissamut killigaanngitsut atuutilertussangormata erseqqissaassutigineqarpoq akuersissutit piffissamut killeqartinneqartut piffissamut killiligaanngitsumut kalerreernikkut atorneqarsinnaalissasut, tamatumani erseqqissaassutigineqarluni akuersissutit piffissamut killiligaanngitsut tassaammata naassaanngitsumik atorneqartussaanngitsut. Tamanna Inatsisartut UKA 2015/19-imni upernaakkut ataatsimiinneranni isumaliutissiissutaani ima allassimasoqarpoq:

"Naammaginartumik piffissaqartitsilluni ilimasaaruteqarneq" qanoq paasineqassanersoq Inatsisartut siusinnerusukkut oqaluuserisimavaat. UPA1990/31-mut saqqummiussisummi ukiunik 5-7-inik piffissaqartitsilluni ilimasaarineq taaneqarpoq. Inuussutissarsiornermulli Ataatsimiititaliap inatsisissatut siunnersuutip aappassaaneerneqarnissaanut ilassutitut isumaliutissiissutaata aappaani allassimavoq ataatsimiititaliam Amerlanerussuteqartut – Siumumeersut Atassummeersullu – isumaqartut ilimasaarineq taaneqartoq ukiunit tallimanit sivisunerusariaqanngitsoq, ikinnerussuteqartulli – Inuit Ataqatigiit – isumaqarlutik piffissaqartitsilluni ilimasaarineq ukiunut marlunnut-pingasunut killilerneqartariaqartoq.

UPA1990/31-p oqaluuserineqarneranut atatillugu immikkut taasisitsinikkut Inatsisartut aalajangeraat ukiunik tallimanik piffissaqartitsilluni ilimasaarisarnissaq naammaginartutut isigineqartariaqartoq Aalisarnermut, Piniarnermut Nunalerinermullu Ataatsimiititaliap isumaliutissiissutaani (UKA2003) allassimavoq. Inatsisartut aalajangigaat tamatuma kingorna ileqqutut akuerineqarsimasorineqarpoq, taamaalillunilu "naammaginartumik piffissaqartitsilluni ilimasaaruteqarneq" ukiunut tallimanut sanilliunneqarnissaa ullumikkut politikkut isumaqatigiifflulluni."

Pilersaarummik ilusilersuinissamut pisassanik akuersissutit piffissamik killiligaanngitsut utertinneqarnissaannut kingunerisaanillu pisassiissutit agguateeqqinnissaat assigiinngitunik ilusilersorneqarsinnaavoq, pissutsit ataasiakkaat sillimaffigalugit aamma aalisartunut ataasiakkaanut ajoquissai millisarlugit.

§ 16-imut

Aalisarsinnaanermut akuersissummi aalisarnermik ingerlatsinermut piumasaqaatit tamarmik allaqqassapput. Kisianili aalisarsinnaanermut akuersissummi allaqqasariaqanngitsunik ataasiakkaanik tamanut atasunik immikkut akuersisoqarsinnaavoq.

Aalisariummik nakkutilliinermi, aalisakkamik sumik imaluunniit aalisakkanik sunik aalisariut aalisarnissamut akuersissuteqarnersoq, akuersissummi sumi aalisarsinnaanermik killiliinersoq aamma aalisarnermi piumasaqaatit erseqqinnerusut Nakkutilliinermi Oqartussat aalisarsinnaanermut akuersissummi atuarsinnaassavaat. Aalisarsinnaanermut akuersissutip piffissaq atuuffia aamma akuersissummi takuneqarsinnaassaaq.

§ 17-imut

Imm. 1-imut

Aalajangersagaq tassaavoq aalisarnermut akuersissutinik atulersitsineq attatiinnarnissaalu pillugit malittarisassanik sukumiinerusunik aalajangersaanissamut Naalakkersuisunut tamanut tunngasumik pisinnaatitsissut.

Aalisariutit aalisarsinnaassusiat aamma nunap aalisarnissamut periarfissaasa akornanni pissutsinik killilersuinissamut pisariaqartitsisoqarpal aalajangersagaq taanna naapertorlugu malittarisassat aalajangersarneqassapput.

Naalakkersuisut aalajangersagaq taanna malillugu malittarisassiorsinnaapput, tassani aalisarsinnaanermut tunniussisoqarneranut attatsitsiinnarnermullu piumasaqaataassalluni, qinnuteqartoq aalisarsinnaanermut akuersissutip assinganik ukiup siuliani peqarsimassaaq qinnuteqartorlu aalisarsinnaanermut akuersisummik ukiup siuliani atuismassasoq.

Sumiiffimmi pineqartumi aalisarnissamut periarfissat tamatumunnga pissutissaqartitsippata malittarisassanit nalinginnaasuniit, aalajangersagaq taanna malillugu aalajangersarneqartuniit immikkoortut aalajangerneqartut Naalakkersuisut atuutsinngissinnaavaat.

Imm. 2-mut

Naalakkersuisut imm. 1 malillugu sinerissap qanittuani aalisarneq pillugu malittarisassiorsinnaapput, assersuutigalugu akuersinermut piumasaqaataassasoq qinnuteqartut aalisarsinnaanermut akuersisummik siusinnerusukkut peqarsimassasut qinnuteqartullu aalisarsinnaanermut akuersissut ukiup siuliani atorsimassagaat.

Imm. 3-mut

Naalakkersuisut imm. 1 aamma 2-mi aalajangersakkat malillugit malittarisassiornikkut aalisarnermik ingerlatsisut inuussutissarsiorluni aalisarnissamut siusinnerusukkut akuersissuteqarsimasut akuerineqannginnissaat pitissinnaavaat.

§ 18-imut

Aalajangersakkap Naalakkersuisut pisinaatitippai Kalaallit Nunaannut nunamut tulaassuisinnaatitaanermut tamatumunnga inatsisit naapertorlugit akuersissutinik tunisisinnaatitaasut. Naalakkersuisut aalajangersinnaapput Kalaallit Nunaanni tunisassiorfinnut tunisinermut pisat aalajangersimasumik amerlassuseqarnissaannik, aalasakkat suussusiiniik aalajangersinnaallutik tunisinermilu pitsaassutit assiginngitsut tunngavigalugit tunisisoqarsinnaaasoq.

Kalaallit Nunaata aalisarnikkut oqartussaaffiani aalisarsinnaanermut akuersisummik pissarsarneq pillugu sukumiinerusunik malittarisassiornissamut Naalakkersuisut aalajangersakkakut pisinnaatinneqarput, tassunga ilanggullugit pisat tamaasa taakkuluunniit ilaat, annertussutsit aalajangersimasut, aalajangersimasumik pitsaassusillit pisallu aalajangersimasumik katitikkat Kalaallit Nunaanni tunisassiorfinnut taaneqartunut piffissani aalajangersimasuni tunineqartassasut.

§ 19-imut

Imm. 1-imut

Aalisagaqatigiit ilaannik piumasaqaatinik aalajangersaanissamut Naalakkersuisut aalajangersakkakut pisinnaatinneqarput. Pisuuussutinik allanngorartunik sunniuteqartumik nungusaataanngitsumillu tunngaveqarluni aqtsinermi Naalakkersuisut malittarisassakkut pisariaqartumik allanngorartitsisinnaatinneqassapput.

Aalajangersagaq taanna malillugu aalisakkanik aalajangersimasunik aalisarnissamut periarfissanut tunngasunik malittarisassanik kiisalu aalisariutit angissusaannut tunngasunik

malittarisassanik, sumiiffiit aalisarfigineqarsinnaasut aamma piffissami sorlermi aalisarnerup ingerlanneqarnissaanut malittarisassanik aalajangersaasoqarsinnaavoq.

Aalajangersagaq taanna pisassat pisarineqarnerinut tunngatillugu sukumiinerusunik piumasaqaateqarnissamut aamma periarfissiivoq. Assersuutigalugu aalajangersagaq taanna saattuarniarnermi atorneqarpoq, tassani aalisarnermut piffissanik piumasaqaateqartoqarluni aamma aalisarnermi tassani aalisarsinnaanermut akuersissutit pillugit immikkut piumasaqaateqartoqarluni.

Naalakkersuisut aalisarnerit suut aalisarsinnaanermut akuersisummit peqarnissamik piumasaqaateqarfiusarnersut kiisalu aalisarsinnaanermut akuersissutinik tunniussinissamut aalisariutit angissusaannut aalajangersimasunut atuunnissaannik piumasaqaatit pillugit aamma malittarisassiorsinnaapput. Naalakkersuisut aamma aalisariummik ingerlatseqatigiiffiup pigisaanik pigittuunermut pissusiviit aalisariummik pignittuunermik nalunaaruteqarnermut naapertuunnerat pillugu nalilersuinissaq siunertaralugu paasissutissiisarneq pillugu malittarisassanik aalajangersaasinnaapput.

Imm. 2

Aalisakkanik aalajangersimasunik aalisarnerup unitsinneqarnissaa pillugu inuussutissarsiummi ingerlataqartunut piffissaq sivikitsoq atorlugu kalerriilluni nalunaaruteqarnissamut pisariaqartitsinerup malitsigisaanik aalajangersagaq 2002-mi atuutilersinneqarpoq. Taamatut nalunaaruteqarneq tamanut nalunaaruteqarnertut isigineqarpoq, taamaattumillu tamanut saqqummiussineq avammullu nalunaaruteqartarneq pillugit piumasaqaatit nalinginnaasut tunngaviatigut naammassineqassallutik.

Tamanut saqqummiussisarneq avammullu nalunaaruteqartarneq pillugit malittarisassat Inatsisartut Naalakkersuisullu pillugit Inatsisartut inatsisaat nr. 26, 18. november 2010-imeersumi kingusinnerusukkut allannguuteqartumi aalajangersarneqarput. Inatsimmi tassani malittarisassat malittarisassaapput sameqquunneqarsinnaasut, tassa tamanut saqqummiussisarnerni avammullu nalunaaruteqarnerni periutsit Inatsisartut inatsisaanni imaluunniit Inatsisartut inatsisaat malillugu tunngaveqartumik aalajangersarneqarsimappat pisuni immikkut ittunni sameqquunneqarnissaat aporfissaqartutut isigineqanngimmat.

Aalajangersakkami tassani taamaalilluni pisinnaatinneqarnissamik piumasaqaat naammassineqarpoq. Avammut saqqummiusseriaaseq pillugu aalajangersakkat sukumiinerusut nalunaarutini tamakkununnga tunngasuni pineqartuni allaqqassapput, kisiannili aallaaviatigut nalunaarutit, aalajangersagaq una tunuliaqtaralugu nalunaarutigineqartut, Naalakkersuisut nittartagaanni www.nanoq.gl-imi takuneqarsinnaassallutik.

Avammut saqqummiussinerit nittartakkami www.naalakkersuisut.gl-imi elektroniskimik pinissaat pillugu pingaarnertut malittarisassamiit aalajangersakkami sameqquunneqarpoq, taamaalilluni piffissamut killeqartumut allannguutit nalunaarutit tusagassiuutinut nalunaarutit nalunaarutigineqartassallutik nittartakkamilu avammut nalunaarutigineqassallutik kiisalu tusagassiuutit aqqutigalugit nalunaarutigineqarlutik. Taamaaliornikkut aalisarnermi allannguutit sukkasuumik nalunaarutigineqarsinnaapput.

Erseqqissarneqassaaq avammut saqqummiussinerit immikkut ittut nalunaarutillu aalajangersakkami taaneqartut atuutilernissaat pillugit malittarisassat taamaallaat atorneqartassasut nalunaarutit ikitsuinnarnut kikkuuneri naluneqanngitsutut ippata, aamma

aalisarnerup ingerlanneqarneranut piffissamut killeqartumut allannguinerit kiisalu aalisarnerup piffissami qaqugukkut aallartinnissaanut aalisarnerullu qaugu unitsinneqarnissaa nalunaarutini pineqarpat.

§ 20-mut

Imm. 1-imut

Imm. 1-imi "akuersissut" ilannngunneqarpoq. Tamatumunnga pissutaavoq aalisarnermut akuersissutit aammali usinik nuutsinissamut akuersissutit il.il. kisiisa pinnagit aalajangersagaq annertusineqassasoq.

Aammattaaq aalisarneq pillugu Inatsisartut inatsisaannik aalajangersakkani imaluunniit inatsit taanna naapertorlugu malittarisassanik unioqqutitsineq pisinnaatitaaffimmik killilersuinermik imaluunniit atorunnaarsitsinermik kinguneqarsinnaanera erseqqissarneqarpoq.

Aalajangersakkami aalisarneq pillugu piumasaqaatinik malittarisassanillu unioqqutitsisoqarnerani allaffissornikkut aalajangiinikkut kingunissai aalajangersarneqarput.

Qisuariaat annertunerpaq tassaavoq piginnittut pisinnaatitsisumminnik imaluunniit akuersissumminnik iluaquteqarnissamut pisinnaatitaaffiannik atorunnaarsitsineq. Akuersissummiik imaluunniit aalisarsinnaanermut akuersissummiik atorunnaarsitsinissamut piumasarineqarpoq iliuutsitigut pisoqarsimanissa. Annertuumik unioqqutitsinerit annertuunik kinguneqartussatut pisutut isigineqarput.

Annertuumik unioqqutitsinerit ukuninnga allaaserinninneq tamakkiisuunngilaq:

- Unioqqutitsilluni aalisarneq.
- Piaaraluni annertuumillu ukiumoortumik pisassiissutinik sippuineq.
- Aaqqissugaasumik nalunaaruteqarnermi il.il. peqquserluuteqarneq.
- Aalisariut nalunaarsugaanngitsoq atorlugu inuussutissarsiutigalugu aalisarneq, tak. § 6, imm. 2.
- § 7-imi piginnittuunermut pissutsinut piumasaqaatinik unioqqutitsineq.

Aammattaaq ingasannginnerusumik unioqqutitsinerit arlallit aalajangersimasumik tamanik nalilienerup kingorna pisutut annertuumik kinguneqartussatut isigineqarput, pisinnaatitaaffimmik atorunnaarsitsinermik kinguneqarsinnaallutik. Aammattaaq unioqqutitseqqinnerit pisinnaatitaaffimmik atorunnaarsitsinissamut tunngaviusinnaapput.

Pisinnaatitaaffimmik killilersuisoqassanersoq imaluunniit aalisarsinnaanermut akuersissut atorunnaarsinneqassanersoq pillugu suliami pissutsinik nalilersuivinnermi tunngaveqassaaq, aamma pisinnaatitaanermik killilersuinermik aamma aalisarsinnaanermut akuersissutinik atorunnaarsitsinerit ingerlatsinermut inatsisit tunngavigalugit akuliunnerummata, aalajangiinerit ingerlatsinermut inatsisit tunngavigalugit iliuuserineqartartunik nalinginnaasunik eqortitsisoqassaaq, tassunga ilanngullugu pisunik suliallu naammassineqarnissaanik naleqqiussinermik tunngavik.

Akuersissummiik imaluunniit aalisarsinnaanermut akuersissummiik atorunnaarsitsinermiit qisuarirneq sakkukinnerusoq tassaavoq akuersissutip atorunnaarsikkallarnera imaluunniit aalisarsinnaanermut akuersissutip sumiiffimmut aalajangersimasumut atuutilersinneqarnera. Taamatut pisoqartillugu piginnittup ukiumoortumik pisassiissut pigisani imaluunniit

ukiumoortumik pisassiissutimi pisami ilaa piginnittup aalisarsinnaunnaakkani tunisinnaangilaa. Aammattaaq piginnittooq aalisarneq pillugu annertunerusunik piumasaqaateqarfingeqarsinnaavoq.

Imm. 2-mut

Aalajangersakkami siunertaq tassaavoq akiligassanik akiliinerit, tak. § 21, Aalisarnermut Piniarnermullu Naalakkersuisoqarfiup akiliisitsiniarnermut allaffissornikkut nukippassuarnik atuisariaqartinnagu akiliisoqarnissaata qulakteerneqarnissaa, aamma akiliinngitsoqarnera pisinnaatitaaffimmik killiliinernik kinguneqarsinnaalluni imaluunniit akuersissut imaluunniit aalisarsinnaanermut akuersissut tunngavigalugit pisinnaatitaaffinnik atorunnaarsitsisoqarsinnaalluni.

Naalakkersuisut taamaalillutik akuersissummik imaluunniit aalisarsinnaanermut akuersissummik atuisinnaatitaanermik killiliisinnaapput, kiisalu annertuumik pisoqartillugu, tak. imm. 1-imut oqaaseqaatit, imaluunniit uteqqittumik pisoqartillugu, akiliutinik akiliisimannginnerup imaluunniit kingusinaarluni akiliisimanerup malitsigisaanik akuersissut imaluunniit aalisarsinnaanermut akuersissut atorunnaarsissinnaallugu.

Imm. 1-ip assigisaanik akuersissut imaluunniit aalisarsinnaanermut akuersissummik imaluunniit aalisarsinnaanermut akuersissummik atuisinnaatitaanermik killiinissamik aalajangiisoqartillugu kiisalu akuersissummik imaluunniit aalisarsinnaanermut akuersissummik atorunnaarsitsisoqartillugu ingerlatsinermi inatsisitigut tunngaviiit nalinginnaasut Naalakkersuisut malissavaat, tassunga ilanngullugu aalajangiinermi pineqartumi pisunik suliallu naammassineqarnissaanik naleqqiussillutik oqimaaqatigissitsissallutik.

Akiliutit

§ 21-mut

Imm. 1-imut

Aalajangersakkami aalajangersarneqarpoq sinerissamut qanittumi aamma avataasierluni aalisarnernut aalisarsinnaanermut akuersissutinik akuersissutinillu tunniussinermut akiliutinik akiliisitsisarneq pillugu Naalakkersuisut sukumiinerusunik malittarisassiorsinnaasut. Ilaatigut aalisarnernut assigiinngitsunut akiliutit akiliisitsarnerillu akuttussusaat pillugit malittarisassiorqarsinnaavoq.

Akiliutit atuisut akiliutaattut, Kalaallit Nunaata aalisarnermik aalisarsinnaanermullu akuersissutinik nakkutiliinermi sulianut aningaasartuutinut matussutissat aalajangersarneqassapput.

Imm. 2-mut

Aalajangersakkami tassani inuit inatsisitigullu inuttut isigineqarsinnaasut akiliutinik akiitsunik tamakkiisumik akiliisimanngitsut aningaasat akiitsut, akiliisimannginnermullu erniat akilerneqarsimatinnagut Inatsisartut inatsisaat una naapertorlugu akuersissutinik imaluunniit aalisarsinnaanermut akuersissutinik pissarseqqissinaannginerat pillugu Naalakkersuisut malittarisassiorqarsinnaavoq.

Imm. 3-mut.

Aalisarneq pillugu inatsit naapertorlugu akitsuutinik akilinngisat aningaasat akiitsorineqartut pillugit akiliisitsiniarnermut nukippasuarnik Naalakkersuisut atuisimapput.

Naalakkersuisut taamaammat kissaatigaat piffissaq eqqorlugu akiliisoqartinnagu akiliutinut akilerneqarsimanngitsunut ernialiisarnissaq pillugu aalajangersaasoqassasoq.

Taamaammat siunnersummi aalajangersakkami erniat pillugit inatsit innersuussutigineqarpoq. Erniarititaq taamatut piumasaqaatinut atuuttoq erniat pillugit inatsit naapertorlugu aalajangerneqarpoq tassaasoq pisortatigoortumik diskonto qaqugukkulluuniit aalajangerneqartoq 7 procentimik ilallugu. Erniat pillugit inatsit Kunngip peqqussutaatigut nr. 991, 14. oktobari 2011 Kalaallit Nunaanni 1. novembari 2011 atuutilersinneqarpoq.

Kapitali 5

Pisarineqarsinnaasumik aalajangersaaneq agguassinerlu Pisarineqarsinnaasutut akuerisaasut

§ 22-mut

Imm. 1-imut

Kalaallit Nunaata aalisarnikkut oqartussaaffigisaani aalisakkat pillugit pisarineqarsinnaasutut akuerisaasunik Naalakkersuisut aalajangersaasunerat aalajangersakkami aalajangersarneqarpoq.

Kalaallit Nunaata aalisarnikkut oqartussaaffigisaani aalisakkanik pisarineqarsinnaasutut akuerisaasunik aalajangersaanermut aallaaviusut tassaapput NAFO-miit aamma ICES-imiit ilisimatuussutsikkut inassuteqaatit. Pinngortitaleriffik NAFO-miit aamma ICES-imiit inassuteqaatit Naalakkersuisunut saqqummiuttarpaat. NAFO-miit aamma ICES-imiit inassuteqaatit amerlanertigut ukioq inassuteqateqarfiusoq sioqquillugu aasap ingerlanerani pigineqalersarput. Aalisagaqtigiinnut ataasiakkaanut soorlu raajanut inassuteqaatit aatsaat ukiakkut pisarput ukioq inassuteqateqarfiusoq sioqquillugu.

Imm. 2-mut

Aalajangersakkami siunertaq tassaavoq Kalaallit Nunaata aalisarnikkut oqartussaaffigisaata avataani aalisakkat siaruarsimatillugit pisarineqarsinnaasutut akuerisaasunik tamarmiusunik sumiiffiup aalajangersaaffiusup annertusineqarnissaa. Imaani pisinnaatitaaffit pillugit isumaqatigiissut naapertorlugu pisussaaffiuvoq aalisagaqarfik naalagaaffinnik allanik ataatsimooruffiillugu, pisarineqarsinnaasutut akuerisaasunik tamarmiusunik aalajangersaanermi tassunga Kalaallit Nunaata mianerinninnissaa.

Imm. 3-mut

Aalajangersakkami siunertaq tassaavoq Kalaallit Nunaata aalisarnikkut oqartussaaffigisaani aalisakkanik pisarineqarsinnaasutut akuerisaasunik aalajangersaanermi NAFO-miit aamma ICES-imiit inassuteqaatinik Naalakkersuisut malinninnissaat aallaaviusumik qulakkeerneqarnissaa.

Aalisagaqassutsimi mianerisassat saniatigut allanik mianerisassaqarsinnaammat pisarineqarsinnaasutut akuerisaasut tamarmiusut aqutsinermi pilersaarutit akuerineqartut naapertorlugit aalajangersarneqassapput. Taamaattumik imaanngilaq Kalaallit Nunaata aalisarnikkut oqartussaaffigisaani aalisakkat pisarineqarsinnaasutut akuerisaasuni tamarmiusuni biologit siunnersuinerat tamakkiisumik malinneqassasut.

Aalisagaqassutsimi mianerisassat saniatigut mianerisassat allat eqqaaneqarsinnaasut:

1) Inuttut atukkat pillugit mianerisassat

- 2) Suliffissaqartitsinermi mianerisassat
- 3) Sunngiffimmi sammisassaqaarneq pillugu mianerisassat

Aalisagaqassutimi mianerisassat saniatigut mianerisassanik allanik nalunaarsuineq tamakkiisuunngilaq.

Naalakkersuisut aqutsinermut pilersaarutinik akuersisartuupput.

Imm. 4-mut

Kalaallit Nunaata aalisarnikkut oqartussaaffigisaani aalisakkat pisarineqarsinnaasutut akuerisaasunik tamarmiusunik aalajangersaaneq pillugu Inatsisartunut nassuaammik tunniussinissamik Naalakkersuisut aalajangersakkami pisussaaffilerneqarput.
Nutaatut nassuaammik Inatsisartunut tunniussinissamut piffissaliussamik aalajangersakkami ilanngussisoqarpoq. Piffissaliussamik ilanngussinermi siunertaq tassaavoq Kalaallit Nunaata aalisarnikkut oqartussaaffigisaani aalisakkat pisarineqarsinnaasutut akuerisaasut tamarmiusut pillugit Naalakkersuisut aalajangersaareernerisa kingunitsiannguagut nassuaatip suliarineqarnissaata erseqqissarneqarnera. Taamaalilluni pisarineqarsinnaasutut akuerisaasut tamarmiusut aalajangersarneqarnerinut isummernissamut Inatsisartut periarfissinneqarput, tamannalu pisarineqarsinnaasutut akuerisaasut tamarmiusut aalajangersarneqarneri pillugit nassuaat aatsaat ukiup tulliani pigineqalissappat periarfissaanavianngilaq.

Kalaallit Nunaata aalisarnikkut oqartussaaffigisaani aalisakkanik pisarineqarsinnaasutut akuerisaasunik tamarmiusunik aalajangersaaneq pillugu nassuaat pisassiissutinik aamma ukiumoortumik pisassiissutinik agguaaneq pillugu nassuaat peqatigalugu tunniunneqarsinnaavoq, tak. siunersummi § 23, imm. 2.

Imm. 5-imut

Kalaallit Nunaata aalisarnikkut oqartussaaffigisaanni aalisakkanik pisarineqarsinnaasunik tamarmiusunik allannguinissamut Naalakkersuisut aalajangersakkatigut periarfissinneqarput, Naalakkersuisut naassuaammik Inatsisartunut tunniussinissaat tassani piumasaqaatigalugu.

Tulluarnerpaajussaaq pisarineqarsinnaasutut akuerisaasut tamarmiusut taamaallaat ukiumut ataasiarlutik aalajangersarneqartarpata, aamma pisarineqarsinnaasutut akuerisaasut tamarmiusut ukiup aallartinnerani imaluunniit qaammatisiutit malillugit ukioq pineqartoq sioqqullugu aalajangersarneqarpata. Taamaattorli pisarineqarsinnaasutut akuerisaasunik tamarmiusunik allannguinissamut Naalakkersuisut periarfissaqarnissaat pisariaqarpoq. Pisarineqarsinnaasutut akuerisaasunik tamarmiusunik allannguinissamut piissuteqarsinnaapput soorlu biologit siunnersuinerat nutaaq imaluunniit pitsaanerusoq, aalisakkat ataatsimoorussat pillugit nunanik sanilinik isumaqatigiinniarnerit, EU-mik imaluunniit nunani tamani peqatigisanik allanik isumaqatigiinniarnerit imaluunniit Kalaallit Nunaanni aalisarsinnaassutsip siumut naatsorsutigineqarsinnaanngitsumik ineriartortoqarnera pillugit allannguuteqartoqarpat.

Aalisarneq kalaallinut inuiaqatigiinnut pingaaruteqartorujussuuvoq. Taamaattumik aalajangersakkami qulakteerniarneqarpoq innuttaasut tamarmik inuiaqatigiit pisuussutaasa allaffissornikkut aqunneqarnerinut malinnaatinniarneqarnissaat. Aalajangersakkap allaffissornikkut aqutsineq kikkunnilluunniit isertuaatsumik malinnaavigineqarsinnaasunngorlugu qulakteernearneqarpoq.

Pisarineqarsinnaasutut akuerisaasut tamarmiusut Naalakkersuisunit pisassiissutigineqartussatut aalajangerneqareraangata innuttaasunut tusagassiutitigut nalunaarutigineqartassapput.

Tamanna aalajangersakkami atuarneqarsinnaavoq, pisarineqarsinnaasutut akuerisaasut tamarmisut amerlassusissaannik aamma kingusinnerusukkut taakkuninnga allannguisoqarpat innuttaasunut nalunaarutigineqartassasut.

Pisassiissutit ukiumoortumullu pisassiissutit

§ 23-mut

Imm. 1-imut

Aalisariutit immikkoortuinut aalisarnermillu ingerlataqartunut assigiinngitsunut pisassiissutinik ukiumoortumillu pisassiissutinik Naalakkersuisut agguassisartuunerat aalajangersakkami aalajangersarneqarpoq. Agguassisinermi aalisagaqatigiinnik ataasiakkaanik pisassinneqarsinnaasutut akuerisaasut tamarmiusut Naalakkersuisut aallaavigissavaat. Pisarineqarsinnaasutut akuerisaasut tamarmiusut taamaalillutik aalisariutinut aalisarnermillu ingerlataqartunut pisassiissutinik ukiumoortumillu pisassiissutinik agguassisinermi sinaakkutigineqassapput.

Aalisagaqatigiinnik ataasiakkaanik pisarineqarsinnaasunut akuerisaasunut sinaakkusiussat sinnerlugit pisassiissutinik ukiumoortumillu pisassiissutinik Naalakkersuisut agguassisinnaanngillat.

Aalisagaqatigiinnik ataasiakkaanik pisariaqarsinnaasutut akuerisaasunik pisassiissutinik ukiumoortumillu pisassiissutinik agguassisinermi aalisariutit immikkoortuinut aalisarnermillu ingerlataqartunut assigiinngitsunut agguassisinermi aalisarneq pillugu EU-mut isumaqatigiisummut aamma nunanut tamanut peqatigisanut allanut isumaqatigiisutit assigisaat Naalakkersuisut mianerissavaat. Aalisagaqatigiinnik ataasiakkaanik pisarineqarsinnaasut akuerisaasut nunat tamat akornanni isumaqatigiisutit naapertorlugit pisassiissutit ilanngullugit siningaatsiarlugit Naalakkersuit pisassiissutinik ukiumoortumillu pisassiissutinik amerlanerusunik agguassanngillat.

Imm. 2-mut

Aalisagaqatigiinnik ataasiakkaanik tamanut pisarineqarsinnaasutut akuerisaasunik aalisariutit immikkoortuinut aalisarnermillu ingerlatsisunut assigiinngitsunut pisassiissutinik ukiumoortumillu pisassiissutinik agguassineq pillugu nassuaammik tunniussinissamut Naalakkersuisut aalajangersakkami pisussaaffilerneqarput.

Nassuaammik Inatsisartunut tunniussinissamut piffissaliineq aalajangersakkami nutaatut ilanngunneqarpoq. Piffissaliussamik ilanngussinermi siunertaq tassaavoq aalisagaqatigiinnik ataasiakkaanik pisarineqarsinnaasutut akuerisaasunik tamarmisunik aalisariutit immikkoortuinut aalisarnermillu ingerlatsisunut assigiinngitsunut pisassiissutinik ukiumoortumillu pisassiissutinik Naalakkersuisut agguassereernerisa kingunitsiannguagut nassuaatip tunniunneqarnissaata erseqqissarneqarnissaa. Taamaalilluni pisassiissutit ukiumoortumillu pisassiissutit pillugit oqaaseqaateqarnissamut Inatsisartut periarfissinneqarput, tamannalu pisassiissutit ukiumoortumillu pisassiissutit agguuaannerat pillugu nassuaat aatsaat ukiup tulliani tunniunneqarpat periarfissaassanngilaq.

Aalisagaqatigiinnik ataasiakkaanik pisarineqarsinnaasutut akuerisaasunik tamarmiusunik pisassiissutinik ukiumoortumillu pisassiissutinik agguassineq pillugu nassuaat Kalaallit Nunaata aalisarnikkut oqartussaaffiani aalisakkat pisarineqarsinnaasutut akuerisaasut tamarmiusut aalajangersarneqarnerat pillugu nassuaammut ilanngullugu tunniunneqarsinnaassaaq, tak. siunnersummi § 22, imm. 4.

Naggasiullugu aalajangersakkamik ilanngussisoqarpoq pisassiissutinik ukiumoortumillu pisassiissutinik aalisariutit immikkoortuinut assigiinngitsunut agguassineq pillugu nassuaat Naalakkersuisunit avammut saqqummiutissagaat. Aalajangersakkami siunertaq tassaavoq pisassiissutinik ukiumoortumillu pisassiissutinik agguassineq annertuumik paasiuminartuunissaata qulakkeerneqarnissaa.

Imm. 3-mut aamma 4-mut

Aalisagaqatigiinnik ataasiakkaanik pisarineqarsinnaasutut akuerisaasunik tamarmiusunik pisassiissutinik ukiumoortumillu pisassiissutinik aalisariutit immikkoortuinut aalisarnermillu ingerlataqartunut assigiinngitsunut agguassinerik allannguisinnaanermut aalajangersakkami Naalakkersuisunut periarfissiisoqarpoq, Inatsisartunut nutaamik nassuaammik Naalakkersuisut tunniussinissaq piumasaqaatigalugu. Aalajangersakkami siunertaanngilaq pisassiissutit ukiumoortumillu pisassiissutit agguanneqareersimasut agguateqqinnissaat siunertalarugu Naalakkersuisut utertitsisinnaassasut.

Tulluarnerpaajussaaq pisassiissutinik ukiumoortumillu pisassiissutinik agguassineq taamaallaat ukiumut ataasiarluni aalajangersarneqartarp, agguassinerlu qaammatisiutit malillugit ukiup aallartinnerani imaluunniit qaammatisiutit malillugit ukioq pineqartoq sioqqullugu aalajangersarneqartarp. Taamaattorli pisariaqarpoq aalisakkanik pisarineqarsinnaasutut akuerisaasut tamarmiusut allannguiteqarneranni Naalakkersuisut agguassinerik allannguinissamik periarfissaqarnissaat. Pisassiissutinik ukiumoortumillu pisassiissutinik agguassinerik allannguisinnaanerup pisariaqarneranut pissutaasinnaapput biologit siunnersuinerat nutaaq imaluunniit pitsaanerusoq, aalisakkat ataatsimoorussat pillugit nunanut sanilerisanut isumaqatigiinniarnerit, EU-mut isumaqatigiinniarnerit, nunat tamat akornanni peqatigisanut allanut isumaqatigiinniarnerit imaluunniit Kalaallit Nunaanni aalisarsinnaassutsip siumut naatsorsuutigineqanngitsumik ineriertortoqarnera pillugu allanngutaasinnaasut.

Imm. 5-imut

Pisassiissutit ukiumoortumillu pisassiissutit agguannerinut piumasaqaatit pillugit Naalakkersuisut erseqqinnerusunik malittarisassiorsinnaanermut pisinnaatinneqarnissaat aalajangersakkami aalangersarneqarpoq. Pissutsit arlallit pisassiissutit ukiumoortumillu pisassiissutit agguanneqartarnerinut piumasaqaatinik aalajangersaanermi Naalakkersuisut mianerisinnaasaat aalajangersakkami aamma allaaserineqarput.

Aalisarneq kalaallinut inuiaqatigiinnut pingaaruteqartorujussuuvoq. Taamaattumik aalajangersakkami qulakkeerniarneqarpoq innuttaasut tamarmik inuiaqatigiit pisuussutaasa allaffissornikkut aqunneqarnerinut malinnaatinniarneqarnissaat. Aalajangersakkap allaffissornikkut aqtsineq kikkunnilluunniit isertuaatsumik malinnaavigineqarsinnaasunngorlugu qulakkeerneqarpoq.

Pisarineqarsinnaasutut akuerisaasut tamarmiusut Naalakkersuisunit pisassiissutigineqartussatut aalajangerneqareraangata innuttaasunut tusagassiutitigut nalunaarutigineqartassapput.

Tamanna aalajangersakkami atuarneqarsinnaavoq, pisarineqarsinnaasutut akuerisaasut tamarmisut amerlassusissaannik aamma kingusinnerusukkut taakkuninnga allannguisoqarpat innuttaasunut nalunaarutigineqartassasut.

§ 24-mut

Imm. 1-imut

Takuneqarsinnaappat ingerlataqartoq ukiumoortumik pisassiissutigineqartut tamaasa aalisarsinnaanngippagut, aalajangersagaq pisassiissutigineqartut utertsinnejqarsinnaanisaannut pisinnaatitsivoq.

Imaassinjaavoq ingerlataqartoq ukiumoortumik pisassiissutigineqartut aalisariuteqanngitsoq imaluunniit aalisariumminik aserortoorsimasoq, assigisaannilluunniit pisoqarsimasoq.

Pisuussutit asuliinnartikkumanagit Naalakkersuisut aalajangiisinjaapput, tak.

aalajangersagaq, ukiumoortumik pisassiissutigineqartut utertissinjaallugit allanullu aalisarsinnaasunut pisassiissutigisinjaallugit.

Aalajangersagaq aamma atorneqarsinnaavoq ingerlataqartoq ukiumoortumik pisassiissutigineqartunik aalisarusussimannngippat, ingerlaqartoq qularutissaanngitsumik ukiumoortumik pisassiissutigineqartut tamaasa ukioq naatinngagu aalisarsinnaanngippagut.

Tamannali nalilersugassaavoq, ingerlataqartup ukioq naatinngagu, januaarimit decembarimut, ukiumoortumik pisassiissutigineqartut aalisarsinnaannginnerinut:

- ingerlataqartoq ukiumoortumik pisassiissutigineqartut aalisarlugit aallartissimanera, ukiumoortumik pisassiissutigineqartunit qanoq amerlatigisut sinnerussimanersut
- ingerlataqartoq nammineerluni aalisariuteqanersoq ukiumoortumillu pisassiissutigineqartut tamaasa aalisarneqarnissaannut naleqquttunik aalisaateqarnersoq,
- ingerlataqartoq ukiumoortumik pisassiissutigineqartut tamaasa aalisassallugit soqtiginnissuteqarnersoq
- ingerlataqartoq allanik ukiumoortunik pisassaqarnersoq.

Ukiumoortumik pisassiissutigineqartut utertinneqarsimasut agguaaqqinnerini ingerlataqartut isumagineqassapput, assingisunik ukiumoortumik pisassinnejqarsimappata, ukiumoortumillu pisassiissutaasut tamaasa aalisarneqarnissaannut soqtiginnippata.

Aalangersagaq taanna taamaallaat ukiumoortumik pisassiissutigineqartunut atuutsinnejqarpoq pisassiissutigineqartut piffissamut killiligaanngitsumut pigineqartut utertsinnejqarnissaannut atuunnani.

§ 25-mut

Imm. 1-imut

Pisarineqarsinnaasutut akuerisaasunit pisassiissutinit akuersissutinut ilaannginnginnerat pisassiissutini utertinneqartuni ilaqrstinnaapput. Inuiqatigiit kalaallit eqqarsaatigalugit tulluarnerpaajussaaq pisarineqarsinnaasutut akuerisaasut tamakkerlugit Kalaallit Nunaanni iluaqutigineqarpata. Taamaattumik pingaarluinnarpoq pisassiissutit ilai atorneqanngitsut aalisarnermut Naalakkersuisunit agguanneqarpata.

Nr. 1

Tulluarnerpaajussaaq pisassiissutinit pigisat ilaatut pisassiissutinik Naalakkersuisut tunisippata, tassa pisassiissutinit pigisanik niuerutigineqarsinnaasunik aaqqissuussinermi pisariaqanngitsumik Naalakkersuisut akuliunnissaat kissaatigineqanngimmat. Pisassiissutinit pigisat ilaatut pisassiissutit tunineqarnerisigut pisassiissutit ilaannut atasumik sapinngisamik annikinnerpaamik Naalakkersuisut allaffissussapput. Taamaattorli pisassiissutinit pigisanut aaqqissuunneqarsimasumi aalisarnermut pisassiissutit ilai ilaappata aatsaat pisassiissutinit pigisatut tunisisoqarsinnaalluni.

Niuernermi akigitinneqartoq ukuninnga pingartinneqarluni akeqartinneqarsinnaavoq:

- 1) niuernermi pissutsit,
- 2) tunisassiorissamut pisinnaatitaaffiit,
- 3) nunap immikkoortuinut atassuteqarneq, imaluunniit
- 4) piginnittuunermik annertusaaneq.

Tunitsivissanut tunngasut

Nuerfimmi pissutsit niuerfimmi nalit saniatigut tassaasinnaapput pissutsit soorlu tunitsivinni aqqukit, nassiuussuinissamut periarfissat imaluunniit unammilleqatigiinnermi pissutsit.

Tunisassiornermi pisinnaatitaaffiit

Tunisassiorissamut pisinnaatitaaffinni pineqarput pisisartuusinnaasoq tunisassiorsinnaanermut pisinnaatitaaffeqareernersoq. Pisassiissutinit pigisanut imaluunniit ukiumut pisassiissutinut tunisassiorsinnaanermut pisinnaatitaaffik ilaatinneqarpal pingaaruteqarsinnaavoq.

Sumiiffimmut attuumassuteqarneq

Pisassiissutit nunami immikkoortumi erseqqinnerusumik aalajangersarneqarsimasumi aalisarneqassappata Naalakkersuisunit pingartinneqarsinnaavoq pisisinnaasoq nunap immikkoortuani tassani ingerlataqareerpat. Pissutsimi tassani aamma nunap immikkoortuani erseqqinnerusumik aalajangerneqartumi sulisoqarnerup attatiinnarnissaata pingartinneqarpoq.

Piginnittuunermik annertusaaneq.

Aalajangersagaq aalisarnermi killilorsorneqartumi piginnittuunerup siaruartinneranut atorneqarsinnaavoq. Tamanna ilaatigut ingerlataqartut pioreersut pisassiissutinit pigisanut imaluunniit ukiumut pisassiissutinut neqerooruteqarsinnaannginnerannik kinguneqarsinnaavoq.

Nr. 2

Pisassiissutit ilai ukiumut pisassiissutit Naalakkersuisunit tunineqarsinnaapput. Tamanna imatut sunniuteqarpoq ukiumut pisassiissutit Naalakkersuisunit ukiukkaartumik tuneqqinneqarsinnaallutik, tamannalu nr. 1-imut naleqqiullugu annertunerusumik allaffisornermic kinguneqassalluni.

Niuernermi akigitinneqartoq ukuninnga pingartinneqarluni akeqartinneqarsinnaavoq:

- 1) niuernermi pissutsit,
- 2) tunisassiorissamut pisinnaatitaaffiit,
- 3) nunap immikkoortuinut atassuteqarneq, imaluunniit
- 4) piginnittuunermik annertusaaneq.

Tunitsivissanut tunngasut

Niuerfimmi pissutsit niuerfimmi nalit saniatigut tassaasinnaapput pissutsit soorlu tunitsivinni aqquitit, nassiuussuinissamut periarfissat imaluunniit unammilleqatigiinnermi pissutsit.

Tunisassiornermi pisinnaatitaaffiit

Tunisassiornissamut pisinnaatitaaffinni pineqarput pisisartuusinnaasoq tunisassiorsinnaanermut pisinnaatitaaffeqareernersoq. Pisassiissutinit pigisanut imaluunniit ukiumut pisassiissutinut tunisassiorsinnaanermut pisinnaatitaaffik ilaatinneqarpat pingaaruteqarsinnaavoq.

Sumiiffimmut attuumassuteqarneq

Pisassiissutit nunami immikkoortumi erseqqinnerusumik aalajangersarneqarsimasumi aalisarneqassappata Naalakkersuisunit pingartinneqarsinnaavoq pisisinnaasoq nunap immikkoortuani tassani ingerlataqareerpat. Pissutimi tassani aamma nunap immikkoortuani erseqqinnerusumik aalajangerneqartumi sulisoqarnerup attatiinnarnissaata pingartinneqarpoq.

Piginnittuunermik annertusaaneq.

Aalajangersagaq aalisarnermi killilersorneqartumi piginnittuunerup siaruartinneranut atorneqarsinnaavoq. Tamanna ilaatigut ingerlataqartut pioreersut pisassiissutinit pigisanut imaluunniit ukiumut pisassiissutinut neqerooruteqarsinnaannginnerannik kinguneqarsinnaavoq.

Nr. 3

Misileraalluni aalisarneq aningaasarsiornikkut nalorninartoqarpoq. Taamaattumik tulluassalluni pisassiissutit ilai misileraalluni aalisarnermut taarsiissutit Naalakkersuisunit tunniunneqarsinnaappata.

Nr. 4.

Tulluassaaq pisarineqarsinnaasutut akuerisaasunik iluaqtigineqanngitsunik EU-mut imaluunniit peqatigisanut isumaqatigissuteqarfigisanut allanut Naalakkersuisut tunniussisinnaappata.

§ 26-mut

Imm. 1-imut

Aalajangersakkap Kitaani raajarniarnermi raajartassat pillugit agguaasinermut aalajangersaaffigivaa. Sinerissap qanittuani raajartassat pisassiissutigineqartunit 50 procentiussallutik avataani aamma 50 procentiusut. Ukiumoortumik akuerisaasunik pisassiissutinik agguaassinermi tamanna aalajangersavagineqarpoq, § 23-mi imm.1-imu allassimalluni. Kitaani raajartassiissutit sinerissap qanittuani avataanilu procentinngorlugit amerlassusaat allangortinneqarsinnanngillat, tamanna §23 imm. 1-mi erseqqissarneqarpoq.

Avataasiorluni aalisariutiniit sinerissamut qanittumut aalisariutit akornanni Kitaanut raajanut pisassiissutit agguaattarnerannut allannguut Aalisarnermut, Piniarnermut Nunalerinermullu Ataatimiititaliami UA2017/115-imu siusinnerusukkut suliarineqarpoq. UA2017/115-imut ataatimiititaliamit isumaliuussisummit takuneqarsinnaavoq, aalisariutini immikkoortut taakku marluk akornanni 50/50-imut agguaassisarnermut agguaassisarnermik allanguineq ataatsimiititaliap tapersorsorpaa.

50/50-imik aaqqissuussinerup annerusumik siunertaa tassaavoq sinerissap qanittuani raajarniutit qularnaatsumik amerlanerusunik raajarniarsinnaalernissaat. Sinerissap qanittuani

raajarniarnermi amerlanerusunik aalisartoqalissalluni nunamilu suliffissuarni sulisut amerlanerit aamma piumaneqalissallutik. Naatsorsuutigineqarsinnaassalluni sineriammi suliffissat amerlanerusut pilersinneqarsinnaanissaat.

§ 27-mut

Imm. 1-imut

Aalajangersagaq § 26-mut ataqatigiilluinnarpoq. Pisassiissutini ukiumullu pisassiissutini pisarineqarsinnaatitaasutut akuerisaasut agguarneqarnerisa, Naalakkersuisut sularisimasaasa avaqqunneqarsinnaannginneri aalajangersakkami qulakkeerneqarpoq. Raajarniarneq aamma qaleralinniarneq sinerissamut qanittumut avataasiorlunilu aalisariutinut agguarsimavoq aalisariutini immikkoortut assigiinngitsut akornanni pisassiissutit aalajangersimasumut agguarsimallutik. Aalajangersakkap agguaanerup taassuma ersernerlunnginnissaa ilaatigut qulakkiissavaa.

Pisassiissutinit nammineq pigisat aamma ukiumut pisassiissutit immikkoortup atassuteqarfiusup avataani aalisarneqarsinnaanerinut aalajangersagaq akornusiivoq. Pisassiissutinit nammineq pigisat killilersorneqanngitsumik niuerutigineqarsinnaanerit suli atuupput, kisianni una tunngavagineqarluni pisassiissutinit nammineq pigisat taamaallaat aalisariutini immikkoortut aallaqqaammut tunngavigisaasa iluanni iluaqutigineqarsinnaallutik.

Imm. 2-mut

Sinerissamut qanittumi aalisariutit tassani aalisariutinit immikkoortunit pisassiissutit tamakkerlugit aalisarneqartilerlugit, aamma avataasiorluni aalisariutit suli pisassiissutit sinnerik peqartillugit aalajangersagaq atorneqassaaq. Nunami suliffissuit ukiup ilaani matuneqarnissaat, sinerissami qanittumi aalisariutit pisassiissutinik aalisarsinnaajunnaarnerisa kingunerisaanik tassunga atasut sulisut soraarsinnejarnissaat pinngitsoortinniarlugu imm. 1-imiit immikkut akuersinissamut Naalakkersuisut periarfissaqarput, taamaalilluni avataasiorluni aalisariutiniit pisassiissutit sinerissamut qanittumi aalisariutinut nuunneqarsinnaallutik.

Pisassiissutini ukiumullu pisassiissutini pisarineqarsinnaasutut akuerisaasut Naalakkersuisunit agguaanneqartarput, tak. § 23, imm. 1. Naalakkersuisut akuerisimasaannik pisassiissutit ukiumullu pisassiissutit agguaanerannik avaqqutaarinermik avaqqutaarinermut siunnersuummi imm. 2-imi aalajangersakkap atorneqannginnissaa pinngitsoortinniarlugu aalajangersagaq immikkut pisuni ilungersunartuni taamaallaat atorneqartariaqarpoq. Imm. 1-imiit immikkut akuersinissamut periarfissaq nunami suliffissuarnik tunisassiassanik pilersuinerup qulakkeerneqarnissaanut taamaallaat atorneqarsinnaaneranut killilerneqarpoq, aamma aalajangersagaq pissutsinut allanut allilerneqassanani.

Aalajangersakkamut allannguuteqarpoq, taamaalilluni siunissami taamaallaat pissutsini immikkut pisuni immikkut akuersisoqarsinnaalluni. Tassani pineqarpoq immikkut akuersinissamut periarfissamik killiliineq.

Aammattaaq aalajangersagaq allanngortinnejarpooq, taamaalilluni piffissami sivisuumi tunisassiassanik pilersuinissaq ajornartillugu pisuni immikkut akuersinissamut periarfissaq taamaallaat atuussinnaalluni. Tassani pineqarpoq immikkut akuersinissamut periarfissamik erseqqissumik killiliineq, aamma allannguut ilanngunneqarluni, piffissami sivikitsuinnarmi tunisassiassanik pilersuineq taamaallaat ajornartillugu pisuni aalajangersakkap atorneqarnissaa pinngitsoortinniarlugu.

§ 28-mut
Aalisarnermik unitsitsineq

Imm. 1, nr 1-2

Kalaallit Nunaanni aalisakkani pisarineqarsinnaasutut akuerisat tamakkerlugit aalisarneqarsimalertillugit aalisakkanik tamakkerlugit aalisarneqartunik aalisarneq unitsinneqassaaq. Tamanna aamma pisassiissutinik pigisanik, pisassiissutinit pigisat annertussusaat imaluunniit ukiumut pisassiissutit piginnittunit ataasiakkaanit pigineqartut pisassiissutit pigineqartut, pisassiissutinit pigisat annertussusaat imaluunniit ukiumut pisassiissutit tamakkerlugit aalisarneqarsimannngikkaluarpataluunniit atuuppoq. Taamatut pisoqarsinnaavoq ingerlataqartoq ataaseq pisassiissutit pigineqartut, pisassiissutinit pigisat annertussusaat imaluunniit ukiumut pisassiissutit sinnerlugit aalisarneqarsimatillugit. Taamatut pisumi inunniq eqqartuussuserinikkut taarsiisoqarnissaanut eqqartuussiviup akerleriissinnaaneq aaqqiiffigissavaa.

Imm. 2-mut

Pisassiissutinik nuussisinnaaneq pillugu malittarisassanik erseqqinnerusunik Naalakkersuisut aalajangersaasinnaanerannut aalajangersagaq tunngavissiivoq. Pisassiissutinik nuussisinnaanermik aaqqissuussinermi siunertaq tassaavoq aalisakkani ataatsini pisarineqarsinnaatitaasut akuerisaasut pitsaanerpaamik iluaqtigineqarnissaasa qulakkeerneqarnissa. Pisassiissutinik nuussisinnaanermik aaqqissuussineq tulluarpoq avataaneersumik akornuserneqarneq pissutigalugu ingerlataqartoq ataaseq pisassiissutinit pigisat annertussusaat tamakkerlugit aalisarnissaannut akornuserneqarpat. Aammattaaq pisassiissutinik nuussisinnaanermik aaqqissuussineq ukiup tulliani pisassiissutinit pigisat annertussusiini aalisarnerup aallartinnissaanut periarfissiivoq. Tamanna ukiuni pisassiissutinit pigisat annertussusii ukumi siusissukkut tamakkerlugit aalisarneqarsimatillugit, taamaalillutillu inuttat soraarsinnejarfissaanni aalisarnerup unitsinnejarnissaanut angallatip pisariaqartitsinnginnissaanut iluaqutaassaaq.

Pisassiissutinik nuussisinnaanermik aaqqissuussinermi siunertaq tassaanngilaq pisassiissutinit pigisat amerlassusii aalisarniaqqaartinnagit pisassiissutinit pigisat amerlassusii ingerlataqartumit siumut nuunneqarnissai. Pisassiissutinit pigisat amerlassusaat ukiup tullianut nuunneqarnerisigut pisassiissutinit pigisat amerlassusiinik ingerlataqartoq aalisarnermik ingerlatsinnginnissa tassa siunertaanngilaq, ingerlataqartorlu taarsiullugu akuersissutini allani aalisarluni. Tamanna aalisarnikkut isumalluutinik maangaannartitsinermik kinguneqassaaq aamma nunatta karsianut annasaqarnermik kinguneqarluni.

Kapitali 6
Pisassiissutit nammineq pigisat nioqqutigineqarsinnaasullu
Pisassiissutinit pigisat

§ 29-mut

Imm. 1-imut

Aalajangersakkap Naalakkersuisut pisinnaatippai pisassiissutit pigineqartussat tunniunneqarnerisa immikkoortitsinerini agguanneqarnerinilu akuersissutinut allanut

malittarisassaliuussisinnaassallutik. Aammattaaq aalisakkanut allanut, manna tikillugu pisassiissutinit pigisaqarfiusimanngitsunut pisassiissutinit pigisat eqqunneqarsinnaallutik.

Aalajangersakkap Naalakkersuisut periarfissaqartippai pisassiissutinik pigineqartussanik agguasseqqinnermut maleruagassiorsinnaassasut, piffissamut killiligaanngitsumut akuersissutinut attuumassutilinnut, Inatsisartunit piffissamut killilerneqarsimasunut. Tak. §15, imm. 2.

Kiisalu pisassiissutinit pigisat annertussusaat pisassiissutinit pigisanut atasut pillugit malittarisassanik erseqqinnerusunik Naalakkersuisut aalajangersaanissaat periarfissaalerluni.

§ 30-mut

Imm. 1-imut

Aqtsivinni Upernavimmi, Uummanni aamma Qeqertarsuup Tunuani sinerissamut qanittumik qaleralinniarnermut taamaallaat pisassiissutit niuerutigineqarsinnaapput.

Aalajangersakkami erseqqissarneqarpoq pisassiissutinit pigisat tamarmiullutik aamma ilaannakuullutik tunniunneqarsinnaasut.

Pisassiissutinit pigisanik piginnittup taarsigassarsinermut qularnaveeqquitut pisassiissutinit pigisani tamaasa ilaannaaluunniit atorsinnaavai.

Imm. 2-mut

Aalajangersagaq aalisarneq pillugu inatsisartut inatsisaat nr. 18, 31. oktober 1996-imeersumi § 17-imik ingerlatitseqqinneruvoq. Inuussutissarsiutigalugu aalisarneq pillugu inatsisartut inatsisaat nr. 17, 22. oktober 1990-imi pisassiissutinit pigisat niuerutigineqarsinnaasut eqqunneqarmata pissusissamisoortumik nalilerneqarpoq pisassiissutinit pigisat kingornunneqarsinnaassasut. Taamaattorli imaattuarsimalluni, sulilu piumasaqaataalluni kingornussisoq inatsimmi piumasaqaatinik allanik naammassinnissasoq.

Imm. 3-mut

Aalajangersakkap imarisaa aalisarneq pillugu inatsisartut inatsisaat nr. 18, 31. oktober 1996-imeersumi § 15, imm. 2-mut naapertuuppoq. Pisassiissutinit pigisanik tunniussineq inatsimmi aalajangersakkanik avaqqussinermik imaluunniit pikkunaallinerannik kinguneqassanngitsoq aalajangersakkami qulakkeerneqassaaq.

Imm. 4-mut

Pisassiissutinit pigisatik tamaasa tunineqarnissaat toqqarsimappassuk ingerlataqartut inuussutissarsiutigalugu aalisarnermiit ilaajunnaarnissaat piffissami sivisumi eqqarsaataasimavoq. Ingerlataqartup pisassiissutinit pigisaminik tunniussinerminit iluanaaruteqareernermi kingorna paggatassiilluni aalisarnermut ilaalernissaat naammaginanngitsutut nalilerneqarpoq. Pisassiissutinit pigisat eqqunneqarnerini ingerlataqartut pisassiissutinit pigisat akilernagit pissarsiaraat, taamaattumik naammaginartutut isigineqarnani aalisarnermut allamut iserniarlutik taakku iluanaaruteqarfigalugit tunisinnaassappatigit.

Inuussutissarsiorsinnaatitaanermut, tak. Inatsisini tunngaviusuni § 74, akuliunnerusinnaanera eqqarsaatigalugu naleqqiussuineq pillugu tunngavik malillugu inuussutissarsiutigalugu

aalisarnermiit inuit ilaatinnginnissaannut periarfissani killiliisoqarpoq. Taamaattumik taamaallaat malittarisassatigut inunniq sivisunerpaamik ukiuni tallimani mattussisoqarsinnaavoq. Tassa ingerlataqartup piffissami kingusinnerusumi aalisarnermut iseqqissinnaanera periarfissaavoq. Ingerlataqartoq ataavartumik ilaatinneqarunnaassappat tamanna annertuumik akuliunnerussaaq.

§ 31-mut

Imm. 1-imut

Aalajangersakkami siunertaq tassaavoq pisassiissutinit pigisat ingerlataqartunut ikitsuinnarnut eqiterunnissaat pinngitsoortinniarlugu pisassiissutinit pigisat niuerutigineqalersinnanerisa kingunerisaannik pisassiissutinit pigisat eqiterunnerannik malittarisassaliornissaq.

Manna tikillugu pisassiissutinit pigisanik pisiortornikkut piginnittunut killiliussap qaangerneqarnissaanut inerteqquteqarsimavoq. Aalisartut taamaalillutik periarfissaqarsimapput piginneqataassutimut annertunerusumut, toqqaannanngitsumik piginneqataanikkut imaluunniit aalajangeeqataasinaasumik sunniuteqarnikkut suliffeqarfinni aalisartup pineqartup annertuneruffigalugu piginneqataaffigisaanut, taamaattumillu aalisartoq pineqartup naliginnaasumik suliffeqarfik tamakkiisumik oqartussaaffiginiarnagu.

Siunnersummi matumani pisassiissutinit pigisanik pigisaqartunik ingerlatseqatigiiffimmi piginninneq ilanggullugu naatsorsorneqassaaq, naak piginneqataaneq 50 pct.-init appasinnerugaluartoq.

Siunnersuut taanna atorlugu pisassiissutinit pigisanik toqqaannanngitsumik piginninneq aamma pisassiissutinit pigisanut aalajangiisumik sunniuteqarneq ilanggullugit naatsorsuutigineqassapput. Ingerlataqartoq piginnittuunermut killiliussanik qanoq qaangiitigineranik naatsorsuinermi siunnersuut naapertorlugu siunissami toqqaannartumik, toqqaannanngitsumik aamma aalajangiisumik sunniuteqarneq tamakkiisumik ilanggullugit naatsorsorneqassapput.

Ingerlataqartoq pisassiissutinit pigisanik qanoq annertutigisunik nakkutiginnilluni toqqaannanngitsumik piginnittuuneq qanoq annertutigisoq naatsorsuinermut ilaassaneranut apeqquaavoq toqqaannanngitsumik piginnittuuneq qanoq annertuginersoq. 50 pct.-imik taassuminngaluunniit annikinnerusumik toqqaannanngitsumik piginnittuunermi toqqaannanngitsumik piginnittuunerup annertussusianut naleqqiullugu pisassiissutinit pigisat ilanggunneqassapput. Piginnittoq assersuutigalugu 4 pct.-imik pisassiissutinit pigisanik pigisaqartumi ingerlatseqatigiiffimmi allami 25 pct.-inik pigisaqarpat taava taamaallaat 1 pct.-it ingerlataqartup pisassiissutinit pigisaanut tamarmiusunut ilanggunneqassapput. 51 pct.-imik taakkuminngaluunniit amerlanerusunik toqqaannanngitsumik piginnittuunermi toqqaannanngitsumik piginnittuunerup naatsorsornerani pisassiissutinit pigisat tamarmik ilanggunneqassapput. Tamatumunnga pissutaavoq 50 pct.-imik taakkuluunniit sinnerlugit toqqaannanngitsumik piginnittuunermi ingerlatseqatigiiffik pillugu tamakkiisumik nakkutiginnittoqnereratut nalilerneqarmat, taamaattumillu pisassiissutinit pigisat aamma tamakkiisumik nakkutigisaralugit.

Pisassiissutinit pigisanik aalajangiisumik sunniuteqarnermi pisassiissutinit pigisat tamarmiusut naatsorsornerini pisassiissutinit pigisat tamarmik ilaatinneqassapput. Tamanna isumaqarpoq ingerlataqartoq ingerlataqartumut allamut, pisassiissutinit pigisanik 4 pct.-inik pigisaqartumut aalajangiisumik sunniuteqartoq, ingerlataqartup pisassiissutinit pigisaanut tamarmiusunut 4 pct.-it pisassiissutinit pigisat tamarmik ilaatinneqassapput. Naliliisoqarpat ingerlataqartumut allamut, pisassiissutinit pigisanik piginnittumut ingerlataqartoq aalajangiisumik sunniuteqartoq ingerlatseqatigiiffiup naatsorsornerani pisassiissutinit pigisat tamarmik ilaatinneqassapput. Tamatumunga pissutaavoq ingerlatseqatigiiffimmi aalajangiisumik sunniuteqarnermi ingerlatseqatigiiffik pillugu tamakkiisumik nakkutiginnittuunera nalilerneqarmat, taamaattumillu pisassiissutinit pigisat aamma tamakkiisumik nakkutigalugit.

Aalajangiisumik sunniuteqarnerani naliliisut tassaapput Naalakkersuisut.

Pisassiissutinit pigisanut ingerlataqartoq aalajangiisumik sunniuteqarneranik naliliinermi pissutsit uku ilaassapput:

1. Aktiaateqarluni imaluunniit piginneqatigiilluni ingerlatseqatigiiffimmi ingerlataqartoq taasisinnaatitaasuni amerlanerussuteqarpa.
2. Ingerlataqartoq ingerlatseqatigiiffimmi aktiaateqarpa imaluunniit piginneqataassuteqarpa, aamma ingerlataqartoq ingerlatseqatigiiffiup siulersuisuini imaluunniit qullersaqarfiani ilaasortat amerlanersaannik toqqaanissamut imaluunniit tunuartitsinissamut pisinnaatitaaffeqarpa.
3. Ingerlataqartoq aktiaateqarpa imaluunniit piginneqataasuua, aamma ingerlataqartoq malittarisassat imaluunniit allatigut ingerlatseqatigiiffimmik isumaqatigiissut tunngavigalugu ingerlatseqatigiiffimmut aalajangiisumik sunniuteqarnissamik ingerlataqarnissamut pisinnaatitaaffeqarpa.
4. Ingerlataqartoq aktiaateqarpa imaluunniit piginneqataava aamma aktiaateqartunik imaluunniit piginneqataasunik allanik isumaqatigiissuteqarneq tunngavigalugu ingerlatseqatigiiffimmi taasisinnaatitaasunik amerlanerussuteqartunut oqartussaava.
5. Ingerlataqartoq ingerlatseqatigiiffimmi aktiaateqarpa imaluunniit piginneqataassuteqarpa, aamma ingerlataqartoq tamanna pillugu aalajangiisumik sunniuteqartuua.

Nalunaarsukkat tamakkiisunngillat, aamma aalajangiisumik sunniuteqarneq qulaani allassimasut saniatigut ilaatigut pilersuisutut isumaqatigiissutit, taarsigassarsinermi isumaqatigiissutit allallu isumaqatigiissutini pissutsit, taakku allat apeqqutaanerinut pissutsinut takutitsisuuneri tunngavigalugit pisinnaalluni.

Piginnittuunermut killiliussat aalisarnermi piginnittuunerit siuarneqarnissaasa anguneqarnissaat pillugu Nalaakkersuisut kissaateqarnerannit aalajangersarneqarput, peqatigisaanillu ingerlataqartoq annertuumik ingerlatsinermit iluaqutinik suli pissarsisinnaalluni.

Naalakkersuisut siunnersuut iluaqtsiullugu aalisakkat inunnit amerlanerusunit aalisarneqartalernissaat kissaatigaat, taamaaliornikkullu inuit ikittuinnarnit inuiaqatigiinni aalisagassat aalisarneqartarnissaat annikillisarniarlugu. Naalakkersuisuts isumaqarput taamatut siammarsaaneq aalisarnermi suliffissaqarnerulersitsissasoq.

Imm. 2-mut

Aalajangersakkap qulakkeerniarpaq aalisarnermik inuussutissarsiuteqarneq kikkunnilluunniit isertuussaqanngitsumik malinnaavigineqarsinnaassasoq. Ingerlataqartut namminneerlutik uppernarsassavaat imm. 1 naapertorlugu iliuuseqarnerlutik. Ingerlataqartut sukkulluunniit aalajangersagaq naapertorlugu iliuuserisimasatik uppernarsarsinnaassavaat.

Imm. 3-mut

Aalajangersagaq eqqunneqarpoq malittarisassat nutaat piginnittussaanermut tunngasut sunniutaat millisarniarlugit, aalisartut ataasiakkaat naliginnaanngitsumik sakkortuumik eqqugaaqqunagit aalajangersakkami § 31, Imm. 1.

Tamanna pissagaluarpat Naalakkersuisut malittarisassaniit immikkut akuersissuteqarsinnaapput, aalisartut naliginnaanngitsumik eqqugaasussatut nalilerneqartut, malittarisassaniit mininneqarsinnaassallutik.

Siumoortumik nalunarsinnaammat malittarisassat nalinginnaanngitsumik aalisartut ataasiakkaat sakkortuumik eqqorsinnaagaat, qanolu aalisartut taakku eqqorneqassanersut, immikkut akuersissuteqarsinnaanermi tamanna ilanngunneqarpoq. Immikkut akuersisinnaanerup periarfissippaa pissutsit ataasiakkaat aallaavigalugit naliliisoqartarsinnaanera.

Immikkut akuersissut assersuutigalugu periarfissiisinnaavoq piginnittussaatitaanermi killigititat § 31, Imm. 1 nr. 1-3 imaluunniit sivisunerusumik piffissaliussisinnaaneq, aalisartoq piginnittussaanermut killigititaasunut nalimmassarnissaanut periarfissiisumik.

Immikkut akuersissummik tunineqarnissamik periarfissap najoqqtaraa qinnuteqartoq malittarisassanut naliginnaasunut taarsiutaasumik saqqummiussinersoq, Naalakkersuisut akuerisinnaasaannik. Immikkut akuersineq aalisartunut ataasiakkaanut tunniunneqartassaqaq, tamanut tunniunneqarani, aajangiussap siunertaa taamaallaat aalisartunut ataasiakkaanut naliginnaanngitsumik sakkortuumik eqqugaasussanut sammimmatt.

§ 32-mut

Imm. 1-imut

Aalajangersagaq § 31-imut atalluinnarpoq aamma ingerlataqartoq § 31, imm. 1-imi piginnittuunermut killiliussanik qaangiisimaneranik nalilersuinermi toqqaannanngitsumik aalajangiisumillu sunniuteqarnerup ilanngunneqarnissaata malitsigisaanik pilersinneqarsimalluni. Piginnittuunermut killiliussat pillugit aalajangersakkat allanngortinneqarnerisa kingunerisinnaavaat ingerlatseqatigiiffit ataasiakkaat piginnittuunermut killiliussat ataanut inissinniarlutik pisassiissutinit pigisanik imaluunniit piginnejataassutinik tunisinissamut pinngitsaalineqarnerat. Ingerlatseqatigiiffit sivikitsumik piffissalerneqarlutik pisassiissutinit pigisanik imaluunniit piginnejataassutinik pinngitsaaliniikkut ingerlatseqatigiiffit tunisissappata tulluassanngilaq. Aalajangersakkanut siunnersuut manna taamaattumik inatsisip atuutilerneranniit ukiut qulit iluanni piginnittuunermut killiliussat iluannut ingerlataqartut aalajangersakkamik pisussaaffilernerisigut piffissami sivisunerusumi ingerlataqartut taamaattumik tulluarsarnissaminnut periarfissinneqarput. Naliliisoqarpoq ukiunik qulinik kalerriilluni

pisassiissutinit pigisanik imaluunniit piginneqataassutinik annertuumik annaasaqarnermik kinguneqanngitsumik tunisisariaqarnermut ingerlataqartut naammattumik tulluarsarsinnaasut.

Imm. 2-mut

Aalajangersagaq nutaajuvoq.

Nalilerneqarpoq aalajangiussami Imm. 1-mi pissusissamisoortumik malitsigisaanik, aalisartoq pisassiissutinik pigisanik amerlanerusunik pissarsisinnaanngippat ukiuni qulini ikaarsaariarfiusuni, aalisartoq killigititaasut § 31, Imm. 1-mittut qaanginngikkunigit. Ikaarsaariarneq § 32, Imm. 1-miittup siunertaaraa aalisartut piffissamik periarfissinneqassasut toqqaannartumik toqqaannanngitsumillu piginneqataanertik pisassiissutinik pigisanik aamma oqartussaassuseqartumik sunniuteqarnerminnik nalimmassaassallutik. Taamaattumik ukiuni qulini ikaarsaarnermi piffissaq akerlianik pisassiissutinit pigisanik suli allanik pissarsinissamut atorneqassapput tulluartutut isigineqanngilaq.

§ 32-imut

Imm. 1-imut

Aalajangersagaq § 31-imut atalluinnarpoq aamma ingerlataqartoq § 31, imm. 1-imu piginnittuunermut killiliussanik qaangiisimaneranik nalilersuinermi toqqaannanngitsumik aalajangiisumillu sunniuteqarnerup ilanngunneqarnissaata malitsigisaanik pilersinneqarsimalluni. Piginnittuunermut killiliussat pillugit aalajangersakkat allanngortinneqarnerisa kingunerisinaavaat ingerlatseqatigiiffiit ataasiakkaat piginnittuunermut killiliassat ataanut inissinniarlutik pisassiissutinit pigisanik imaluunniit piginneqataassutinik tunisinissamut pinngitsaalineqarnerat. Ingerlatseqatigiiffiit sivikitsumik piffissalerneqarlutik pisassiissutinit pigisanik imaluunniit piginneqataassutinik pinngitsaaliniikkut ingerlatseqatigiiffiit tunisissappata tulluassanngilaq. Aalajangersakkanut siunnersuut manna taamaattumik inatsisip atuutilerneranniit ukiut qulit iluanni piginnittuunermut killiliussat iluannut ingerlataqartut aalajangersakkamik pisussaaffilernerisigut piffissami sivisunerusumi ingerlataqartut taamaattumik tulluarsarnissaminnut periarfissinneqarput. Naliliisoqarpoq ukiunik qulinik kalerriilluni pisassiissutinit pigisanik imaluunniit piginneqataassutinik annertuumik annaasaqarnermik kinguneqanngitsumik tunisisariaqarnermut ingerlataqartut naammattumik tulluarsarsinnaasut.

Imm. 2-mut

Aalajangersagaq nutaajuvoq. Nalilerneqarpoq aalajangersakkap Imm. 1-mi pissusissamisoortumik malitsigisaasut, aalisartoq ukiuni qulini ikaarsaarfiusumi pisassiissutinik pigisanik amerlanerusunik pissarsisinnaanngitsoq, aalisartoq § 31, Imm. 1-mi killigititaasut malinngippagit. § 32, Imm. 1-mi ikaarsaarfittut piffissaliinerup siunertaraa aalisartoq toqqaannartumik toqqaannanngitsumillu pisassiissutinik pigisaqarnini aamma aalajangiisinaasuseqartumik pisassiissutinik pigisaqarnerminut nalimmassassalluni. Taamaattumik ukiuni qulini ikaarsaarnermi piffissaq akerlianik pisassiissutinit pigisanik suli allanik pissarsinissamut atorneqassapput tulluartutut isigineqanngilaq.

Pisassiissutinik nammineq pigisanik niuerutigineqarsinnaasunillu utertitseqqusineq tuniniaanerlu

§ 33-mut

Imm. 1-imut

Aalajangersakkami siunertaavoq pisassiissutini pigisat taamaallaat ingerlataqartunit ingerlatsisunit pigineqarnissaasa qulakkeerneqarnissaa. Aalajangersakkami matumani kissaatigineqarpoq pisassiissutinit pigisanik aalisarnissaq misileeqqaarnagu ingerlataqartup pisassiissutinit pigisanik piginnittuunissaata pinngitsoortinnissaa. Ingerlataqartunik ingerlatsinngitsunik, taamaallaat pisassiissutinit pigisanik annertussutsinik ingerlataqartunut allanut, pisassiissutinit pigisat annertussusiinik aalisartunut attartortitsinissaat kissaatigineqanngilaq. Aalajangersagaq § 35, imm. 2-imut aamma 3-mut atalluinnarpoq, tassani aalajangersarneqarluni pisassiissutinit pigisat annertussusaat imm. 2-imi pissutsit nalunaarsorneqartut malitsigisaannik taamaallaat tunniunneqarsinnaasut, aamma pisassiissutinit pigisat annertussusaannik tunniussineq attartornertut iluseqassanngitsoq.

Imm. 2-mut

Siunnersummi imm. 1-imi aalajangersakkamik naammassinninnissaq ajornassappat pisassiissutinit pigisanik piginnittooq pisassiissutinit pigisaminik tunisinissaanut aalajangersagaq pisussaaffiliivoq. Aalajangersakkami erseqqissarneqarpoq siunnersummi imm. 1-imi aalajangersakkamik naammassinninnissamut pisassiissutinit pigisanik piginnittut ataasiakkaat akisussaasuusut.

Imm. 1 aalajangersagaq naapertorlugu tunisineq qaammatit 18-init qaangiutsinnagit pissaaq.

Imm. 3-mut

Allannguiteqarnermi siunnersummi imm. 1-imik naammassinninngitsut pisassiissutinit pigisanik Naalakkersuisut utertitsinissamut pisussaaffiat eqqunneqarpoq. Siunertaq tassaavoq pisassiissutinit pigisanik piginnittut ingerlatsinngitsut pisassiissutinit pigisanik tunisinngitsoorissaasa pinngitsoortinnissaa, tamanna inuiaqatigiinnut kalaallinut ajortumik kinguneqartillugu.

Pisassiissutinit pigisat, aalajangersagaq naapertorlugu Naalakkersuisunit utertinneqartut, piginnittooq sinnerlugu tunineqassapput. Pisassiissutinit pigisat Naalakkersuisunit utertinneqaannartullu pisassiissutinit pigisanut piginnittooq taamaalluni oqartussaajunnaassaaq. Pisassiissutinit pigisanik utertitsineq ingerlataqartut ataasiakkaat pisassiissutinit pigisanut pisinnaatitaaffianni sakkortuumik akuliunnerummat pisassiissutinit pigisat ingerlataqartoq sinnerlugu tunineqassapput, taamaalluni ingerlataqartoq pisassiissutinit pigisanut utertinneqartunut qanillattortumik taarsiiffigineqarluni.

Pisassiissutinit pigisat Naalakkersuisunit utertinneqartut § 25 naapertorlugu tunisassangortinneqassapput.

Imm. 4-mut

Aalisariutip umiunerani imaluunniit pissutsit immikkut illuinnartut atuunnerini imm. 2-miit Naalakkersuisut immikkut akuersisinnaanerannut aalajangersakkami periarfissaalerpoq.

Aalisarneq pillugu inatsisartut inatsisaanni atuuttumi maannakkut periusiusoq tassaavoq ingerlataqartup qaammatinik pingasunik immikkut akuerineqarneranik nalunaarfigineqartarnera. Imm. 1-imik qaammatit pingasut ingerlaneranni ingerlataqartoq naammassineqarsinnaanngippat sivitsuinermik nalunaaruteqartoqarsinnaavoq. Immikkut

akuersinerup sivitsorneqarnerata nalunaarutiginissaa sioqquullugu pissutsit qaqgu aqqinnejarnissaannik ilimagineqarneri pillugit ingerlataqartoq nassuaasiussaaq. Piffissami killeqartumi immikkut akuersinerup iluani imm. 1 suli ingerlataqartumit naammassineqarsinnaanngippat imm. 2 aamma imm. 3 atorneqalissapput.

§ 34-imut

Imm. 1-imut

Aalajangersagaq nutaajuvoq. Aalajangersakkami siunertaq tassaavoq isersinnaanermut aporfitt peerneqarnissaat taamaalillunil ingerlataqartut nutaat aalisarnermi isersinnaanerat ajornannginnerulersillugu. Aalisarnermi piginnittut siaruarnissaannik kissaateqarneq tunngavigalugu ingerlataqartut nutaat isersinnaanerisa ajornannginnerulernissaa pisariaqarpoq.

Ingerlataqartup aalajangersakkami qaqgu atuilersinnaaneranut aalajangersakkami piumasaqaatit sisamat saqqummiunneqarput. Siullit marluk nutaat aalisarnermut isersinnaanerisa ajornannginnerulernissaa pillugu siunertanut innersuussipput. Aalajangersakkat avataaneersunut piumasaqaatinik aalajangersaapput. Piumasaqaatit kingulliit marluk ingerlataqartup nutaap pisassiissutinit pigisanik pisisinnaaneranut qummut killiliippit peqatigisaanillu suli aalajangersagaq atorsinnaallugu. Annertunerusumik nalorninartut aamma pisassiissutinit pigisanut niuerfimmi akornutit pinngitsoorniarlugit qummut killiliussaq 5 procentinut aalajangersarneqarpoq.

Imm. 2-mut

Aalajangersagaq nutaajuvoq. Aalajangersakkami siunertaq tassaavoq piffissami qaammatini 48-ini pisassiissutinit pigisat annertussusaat tamaasa ilaannaaluunniit ingerlataqalersup tunisisinnaaneranut ammaassinissaq. Pisassiissutinit pigisat aalisarnissaannut ingerlataqalertoq nutaaq aalisariuteqanngippat tulluassaaq ingerlataqartup pisassiissutinit pigisat annertussusaannik ingerlataqartunut allanut tunisisinnaanera, taamaalilluni pisassiissutinit pigisat annertussusaat inuiaqatigiinnut kalaallinut iluaqutaallutik. Tamatumma saniatigut pisassiissutinit pigisat annertussusaannik tunisinissamut periarfissaq ingerlataqalertumut aalisariummik tulluartumik pisinermik arlaatigut aningaasalersuisinnaalersippai.

Imm. 3-mut

Siunnersuummi imm. 1-imi aalajangersakkamik naammassinninnissaq ajornassappat pisassiissutinit pigisanik piginnittoq pisassiissutinit pigisaminik tunisinissaanut aalajangersagaq pisussaaffiliivoq. Aalajangersakkami erseqqissarneqarpoq siunnersuummi imm. 1-imi aalajangersakkamik naammassinninnissamut pisassiissutinit pigisanik piginnittut ataasiakkaat akisussaasuusut.

Aalajangersagaq taamaalilluni ima paasineqassaaq siunnersuummi imm. 1-imi aalajangersakkamik naammassinninnissaq ajornassappat pissarsiarineriniit qaammatit 48-t naanissaat sioqquullugit pisassiissutinit pigisanik piginnittup pisassiissutinit pigisani tunisimassagai. Piginnittoq taamaalilluni pissarsinermiit qaammatit 48-t naanissaanut pisassiissutinit pigisanik piginnittup tunisinissamik eqqarsaateqarnissaq utaqqissanngilaa.

Imm. 4-mut

Aalajangersagaq nutaajuvoq. Aalajangersakkami siunertaq tassaavoq imm. 1-imik aamma 3-mik piginnittooq naammassinninngippat pisassiissutinit pigisanik Naalakkersuisut utertitsinissamut pisussaaffeqarnerat. Siunertaq tassaavoq pisassiissutinit pigisanik piginnittut ingerlatsinngitsut inuiaqtigiiinnut kalaallinut ajortumik kinguneqartumik pisassiissutinit pigisanik tunisinngitsoornissaasa pinngitsoortinneqarnissaa.

Pisassiissutinit pigisat, aalajangersagaq naapertorlugu Naalakkersuisunit utertinneqartut, piginnittooq sinnerlugu tunineqassapput. Pisassiissutinit pigisat Naalakkersuisunit utertinneqaannartullu pisassiissutinit pigisanut piginnittooq taamaallilluni oqartussajunnaassaaq. Pisassiissutinit pigisanik utertitsineq ingerlataqartut ataasiakkaat pisassiissutinit pigisanut pisinnaatitaaffianni sakkortuumik akuliunnerummatt pisassiissutinit pigisat ingerlataqartoq sinnerlugu tunineqassapput, taamaallilluni ingerlataqartoq pisassiissutinit pigisanut utertinneqartunut qanillattortumik taarsiiffigineqarluni.

Pisassiissutinit pigisat Naalakkersuisunit utertinneqartut § 25 naapertorlugu tunisassangortinneqassapput.

Pisassiissutnik nammineq pigisaqarnermi niuerutigineqarsinnaasunillu pigisaqarnermi pisassiissutinit pigisat annertussusaannik tuniniaasinnaaneq

§ 35-mut

Imm. 1-mut aamma 2-mut

Pisassiissutinit pigisat annertussusaanik tunisinissaq aallaaviatigut akuerisaanngilaq. Malittarisassaq taanna equnneqarpoq pisassiissutinit pigisanik pigittoq pisassiissutinit pigisanik aalisartuunissaq qulakteerniarlugu. Pisassiissutit niuerutigineqarsinnaasut nammineq pigisat equnneqarnerini pisassiissutinit pigisat taamaallaat aningaasaliinermi sammineqarnissaat siunertarineqanngilaq. Pisaassiissutinit pigisat annertussusiisa tunniunneqarnissaannut inerteqqussutip attatiinnarneratigut pisassiissutinit pigisat aalisartuniiginnarnissaat qulakteerneqassaaq. Pisassiissutinit pigisat annertussusiisa ingerlateqqinnejarnissaat akuerisaalissappat, pisassiissutinit pigisat annertussusaanik aalisartunut attartortitsinissaq siunertalarlugu taamaallaat pisassiissutinit pigisanik piginnittut ingerlataqartut pilersinnejassapput. Aalisartut taamaallilluni aalisarnermik nakkutiginninnertik annaassavaat aamma pisassiissutinit pigisanik piginnittut annertuumik isumallutigilerlugit.

Tamanna Inatsisartut upernaakkut 1990-imi ataatsimiitsillutik oqaluuserisaasa 30-anni saqqummiussissummi tamanna atuarneqarsinnaavoq. Taamanikkut Inatsisartuusut ilisimaarillunnarpaat pisassiissutit pigineqartut niuerutigineqartussat ingerlataqartup nammineerluni tamaasa aalisarsinnaanngikkuniget aaqqissuussamik allanut attartutsinnginnissaanik qularnaarinnittooqarsimassasoq. Saqqummiussami ima allassimasoqarpoq:

"Aamma periarfissaalerpoq pisassiissutigineqartut ilaat allanut piffissami sivikitsumi attartortinnejarsinnaassasut, taamaallilluni aserortoorsimatilluni amutsivimiitsillunilu pisassanik annaasaqarsinnaagluarnermut taarsiussisoqarsinnaalissaaq.

Erseqqissarneqassaaq malittarisassat sukaterneqassammata, taamaattumillu ukiumiit ukiumut pisassiissut tunniunnejarsimasoq "attartortinnejarsinnaanngimmatt", taamaallilluni inuussutissarsiortuni attartortitsisartuinnartut peqataanissaq periarfissanngitsoq.

Pisassiissutinit pigisat niuerutigineqarsinnaammata pisassiissutinit pigisat annertussusaannik tunniussisinnaanermut periarfissap kingunerissavaa pisassiissutinit pigisat niuerutigineqarsinnaasut killeqalerneri. Tamatumunnga pissutaavoq piginnittup pisassiissutinit pigisat tigummiinnassammagit akerlianillu pisassiissutinit pigisat annertussusaannik tunisinikkut iluanaaruteqarnissaq anguniassallugu. Pisassiissutinit pigisat niuerutigineqarsinnaasunngortinnerini iluaqtut taamaalillutik sunniuteqarunnaassapput. Pisassiissutinik niuerutigineqarsinnaunik siunissami ungasissumik aaqqissuussinermut apeqquaavoq pisassiissutinit pigisat annertussusaannik tunniussinissamut periarfissap annertuumik killeqartinnera. Tamanna pisassiissutinit pigisat kingornunneqarsinnaasunngortinnerinik nukitorsarneqaqqippoq.

Pisassiissutinit pigisat annertussusaannik tunniussinissaq immikkut pisuni akuerineqarnissaanut aalajangersagaq taanna ammaassivoq, pisassiissutinit pigisanik piginnittooq pisassiissutinit pigisat annertussusaannik aalisarnissamut akornuserneqarluni. Pisassiissutinit pigisat annertussusaannik tunniussinissamut akuersisut pissutsit marluk aalajangersakkami eqqaaneqarput. Pissutsit taakku marluk killiliisumik nassuiardeqassapput.

Nr. 1

Umiiarnermi sivisunerusumilluunniit amutsivimmieinermi pisassiissutinit pigisanik piginnittooq pisassiissutinit pigisat annertussusaannik aalisarnissaanut periarfissaqanngilaq, taamaattumik pisarineqarsinnaatitaasut akuerisaasut pitsaanerpaamik iluaqtutigineqarnissaat eqqarsaatigalugu pisassiissutinit pigisat annertussusaasa tunniunneqarnissaasa akuerineqarnissaat pisariaqarpoq.

Umiiarnermi paasineqarpoq angallatip pissutsini isumannaatsuni pisassiissutinit pigisat annertussusaannik aalisarnissamut atorneqarsinnaajunnaarnera, imaluunniit aalisarnermi atortut aalajangersarlugit ikkunneqarsimasut ima ajoquusersimatigalutik atorneqarsinnaanatik.

Sivisunerusumik amutsivimmieinermi paasineqarpoq amutsivimmieeq annikitsumik iluarsaassineriit imaluunniit nakkutiliinermiit, ullualuit ingerlaneranni naammassineqarsinnaasunit annertunerusoq. Sivisunerusumik amutsivimmieinnerup pineqarnera pillugu aalajangiinermut tunngavigneqartariaqarpoq angallat ukiup naanissaa sioqqullugu pisassiissutinit pigisat annertussusai tamakkerlugit aalisarsinnaanngorluni atorneqaaqqilersinnaanersoq.

Aalisariutip Kalaallit Nunaanni amutsivimmieitinnissaanut killeqartumik periarfissaqarneq eqqarsaatigineqassaaq, taamaattumillu tamanna piffissami sivisunerusumi angallatip atorneqarsinnaannginneranik kinguneqarluni.

Nr. 2

Aalajangersagaq sukaterneqarpoq, taamaalilluni sikutut ittunik pissusissamisoortumik naatsorsuutigineqartunillu akornutit pineqarneri naammakkunnaarlutik. Siunnersuummi immikkut ittut aamma pissusissamisoortumik akornutit naatsorsuutiginngisat pineqarput. Pisassiissutinit pigisanik piginnittooq, immikkoortumi ukiukkut sikusarfiusumi, pissutsit taamatut ittut patsisigisinnanngilai, tassa immikkut ittut aamma pissusissamisoortumik akornutit naatsorsuutiginngisat pineqanngimmata.

Soorlu ingerlataqartup najugarissaani illoqarfimmi nunaqarfimmiluunniit immikkut naatsorsuutiginngisamik tassaarsuaqartillugu imaluunniit qarsutsisoqartillugu, pisassiissutigineqartut taamaasa aalisarsinnaatinngagit. Taanna taamaallaat atulersinnaassaaq "force majeure"-mut assingusunik pisoqartillugu.

Imm. 3-mut

Aalajangersagaq piviusumik aalisarnissaannik suliniuteqanngitsunut ingerlataqartunut pisassiissutinit pigisat annertussusaannik tunniussisartunut unitsitsinissamut periarfissiivoq. Pisassiissutinit pigisanik niuerutigineqarsinnaasunik aaqqissuussinermi tunngaviousumik isuma tassaavoq pisassiissutinit pigisanik pisiortornikkut tunisisarnikkullu niuerfik nammieq tulluarsaassasoq, taamaalilluni inuiaqatigiit aningaasarsiornikkut sapinngisamik annertunerpaamik iluanaaruteqarnerat anguneqarluni. Killilersorneqanngitsumik pisassiissutinit pigisat annertussusaannik attartortitsinissamut imaluunniit tunisinissamut periarfissap aaqqissuussineq taanna kimeerutsissavaa.

Pisassiissutinit pigisat niuerutigineqarsinnaammata pisassiissutinit pigisat annertussusaannik tunniussisinnaanermut periarfissap kingunerissavaa pisassiissutinit pigisat niuerutigineqarsinnaasut killeqalerneri. Tamatumunnga pissutaavoq pignittup pisassiissutinit pigisat tigummiinnassammagitt akerlianillu pisassiissutinit pigisat annertussusaanik tunisinikkut iluanaaruteqarnissaq anguniassallugu. Pisassiissutinit pigisat niuerutigineqarsinnaasunngortinnerini iluaqutit taamaalillutik sunniuteqarunnaassapput. Pisassiissutinik niuerutigineqarsinnaasunik siunissami ungasissumik aaqqissuussinermut apeqqutaavoq pisassiissutinit pigisat annertussusaannik tunniussinissamut periarfissap annertuumik killeqartinnera. Tamanna pisassiissutinit pigisat kingornunneqarsinnaasunngortinnerinik nukitorsarneqaqqippoq.

Pisassiissutinit pigisat annertussusaannik tunniussinerup pisassiissutinit pigisanik attartortitsinertut iluseqarnersoq pillugu nalilersuinermi pisassiissutinit pigisat annertussusaanik siusinnerusukkut tunniussisoqarsimanersoq, aamma pisassiissutinit pigisanik pignititoq pisassiissutinit pigisat tamakkerlugit aalisarnissannut qanittukkut suliniuteqarsimanersoq isiginiarneqassapput.

Imm. 4-mut

Tunniussineq attartortitsinertut ilaatigut pissuseqannginnissaa qulakteerniarlugu pisassiissutinit pigisat annertussusaannik tunniussineq Naalakkersuisunit akuerineqassaaq.

Kapitali 7

Kalaallit Nunaata aalisarnikkut oqartussaaffigisaata avataani aalisarneq

§ 36-mut

Imm. 1-imut

Kalaallit Nunaata aalisarnikkut oqartussaaffigisaata avataani Kalaallit Nunaata aalisarnera naalagaaffiit allat imaluunniit naalagaaffiit akornanni aalisarnikkut oqartussaaffigisaanni imaluunniit nunat tamalaat imartaanni ingerlanneqarsinnaasoq eqqarsaatigineqarsinnaavoq. Pisumi siullermi aalisarneq naalagaaffiit ataasiakkaat

imaluunniit naalagaaffiit akornanni isumaqatigiissuteqarnikkut ingerlanneqassaaq, taakku aalisarnermut malittarisassat annertunersaannik aalajangersaassallutik. Pisup tulliani aalisarneq amerlanertigut nunarsuup ilaani aalisarnikkut suleqatigiiffinnit soorlu NAFO-p aamma NEAFC-ip isumaqatigiissutaannit malittarisassiorneqartarpoq.

Imm. 2-mut

Aalajangersakkami siunertaq tassaavoq Kalaallit Nunaata aalisarnikkut oqartussaaffigisaata avataani, aamma nunat tamalaat isumaqatigiissutaannut ilaasumi, aalisarnermik malittarisassaliornissaq.

Kapitali 8 Aalisariutini inuttat

§ 37-mut

Imm. 1-imut

Aalajangersakkap Naalakkersuisut pisinnaatippai aalasariutini inuttanut nalunaarusiamut aalajangersaasinnaallutik, soorlu inuttanik nunatsinnut attuumassuteqartunut atorfinititsinermi ikinnerpaaffiliisinnaallutik.

Aalajangersakkami siunertarineqarpoq kalaallit sulisinnaasut inuussutissarsiutigalugu aalisarnermi isumagineqarnissaasa qulakkeerneqarnissaa. Peqatigisaanik aalajangersakkap qulakkiissallugu kalaallit nunaanni inuiaqatigiit inuussutissarsiutigalugu aalisarnermi nassaarineqarsinnaasunik ilinniartitaanermut periarfissanik iluaquaqarnissaat.

Aalajangersakkamut tassunga tunuliaqutaasoq tassaavoq umiarsuaatileqatigiiffit inunnik Kalaallit Nunaanni ilinniarsimasunik atorfinititsinissamut ilinniartitsinissamullu taarsiullugu nunanit allaneersunik inunnik misilittagaqartunik atorfinititsinissaq suli pilerigisaraat takuneqartarmat. Pissutsip kingunerisimavaa Kalaallit Nunaanneersunit allanut naleqqiullugu inuit nunani allaneersut amerlasoorujussuit peqataalersimanerat peqatigisaanillu imarsiortut kalaallit akornanni suliffissaqannginnikkut ajornartorsiortitsilluni.

Kapitali 9 *Usilersoqqinneq, tunisineq suliareeqqiinerlu* *Usilersoqqinneq*

§ 38-mut

Imm. 1-imut

Aalajangersakkami pineqarput kalaallit nunallu allamiut angallataat aamma § 1, imm. 1, nr. 2 aamma 3 naapertorlugit Kalaallit Nunaata aalisarnikkut oqartussaaffigisaani aamma Kalaallit Nunaata aalisarnikkut oqartussaaffigisaata avataani usilersoqqinnerit.

Usilersoqqinnermik, usilersoqqinnernik tulaassinernillu malittarisassaliornermi siunertaq tassaavoq nunani tamalaani isumaqatigiissutit naapertorlugit Kalaallit Nunaata pisussaaffiinik

naammassinninnissaq. Pingaartumik unioqqutitsisumik, nalunaarutigineqanngitsumik malittarisaasaqartinneqanngitsumillu aalisarnermut naleqqiullugu pingaarpooq usilersoqqinnernik tulaassinernillu nakkutiliisoqarnissaa.

Usilersoqqinneq tulaassinerillu pissutsit tassaapput nunani tamalaani annertuumik isiginiarneqartut. NEAFC assersuutigalugu ilaatigut tulaassinerit usilersoqqinnerillu pillugit malittarisassanik akuersisimavoq, Kalaallit Nunaanni inatsisini atulersinneqarsimasut.

Usilersoqqinnissamut akuersinermi angallatini suliareqqiineq pillugu malittarisassat sillimaffigineqassapput.

Imm. 2-mut

Aalajangersakkap Naalakkersuisut pisinnaatitippai Kalaallit Nunaata aalisarnikkut oqartussaaffigisaani avataanilu tulaassinermut usilersornermullu aalajangersaliortissinnaallugit, sumi usilersuisoqarsinnaanersoq tulaassisooqarsinnaanersorlu aalajangiisinjaallutik, umiarsualivinnik fabrikkinillu ilaannillu innersuussaqarsinnaallutik.

Tunisineq

§ 39-mut

Imm. 1-imut

Aalajangersagaq marlunnik immikkoortoqarpoq aalajangersarlugillu:

- a) Tunitsiviit tunisassiorfiillu nutaat Naalakkersuisunit akuerineqaqqaartinnagit pilersinneqassanngitsut.
- b) Tunisassiorfioereersoq aalisakkanik allanik tunitsivimmut imaluunniit tunisassiornermut allanngortinnejassappat Naalakkersuisut aamma akuersissuteqassapput.

Tunitsivinnik tunisassiorfinnillu nutaanik pilersitsinermut taakkulu allanngortinnissaannut akuersineq isiginninnerit (pingarnerit) uku marluk aallaavigalugit akuerineqarnissaannik tunngaveqassapput:

- aningaasaqarnikkut piginnaasat imminullu akilersinnaaneq, aamma
- inuussutissalerinikkut isigisassat.

Tamatuma malitsigisaanik tunitsivik imaluunniit tunisassiorfik aningaassarsiornikkut isiginninnerit aallaavigalugit nalilerneqassaaq, kiisalu Uumasut Nakorsaannit Inuussutissalerinermullu Oqartussaniit akuersissummik peqassalluni. Allatut oqaatigalugu akuersisoqarnissaanut ingerlatsiviit marluk akuersinissaat apeqquataassaaq (aalisarnermut oqartussat kiisalu inuussutissalerinermi oqartussat).

Aalajangersakkap siunertaraa inuussutissarsiutigalugu aalisarnerup, suliareqqiilluni suliffissuit allallu taakkununnga atasut inuussutissarsiutit iluanni aningaassarsiornikkut suliffissaqarnikkullu eqqarsaatigisassat pisariaqartut qulakteerneqarnissaat.

Eqqarsaatigisassat taakku, tunitsiviit tunisassiorfiillu eqqarsaatigalugit, aningaasaatitigut tunngavinnik pisariaqartunik peqarneranut, sumiiffimmi innaallagissamik imermillu pilersuinissamut naammattumik periarfissaqarneranut, inuussutissarsiutigalugu aalisartut pisaminnik tunisinissamut naammattumik periarfissaqareernerannut kiisalu sumiiffimmi pineqartumik sulisoqarnikkut isumalluuteqarneranut atassuteqarput.

Taakku saniatigut tunitsivinnik tunisassiorfinnillu pilersitsinissamut kiisalu taakku allanngortinnissaannut tunngalluinnartumik piumasaqaataavoq, Kalaallit Nunaanni Uumasut Nakorsaanit Inuussutissalerinerullu Oqartussanit imaluunniit avammut tuniniaanermi tunisassiorfiit pineqarpata Danmarkimi Fødevarestyrelsimit inuussutissat pillugit inatsisini tamanna pillugu malittarisassat naapertorlugit akuerineqarnissaat.

Naatsumik oqaatigalugu inuussutissarsiornikkut, niuernikkut kiisalu inuussutissat isumannaatsuunissannut tunngaviit nalinginnaasut, kiisalu pisuussutinik nalinginnaasunik aamma pisuussutinik nalinginnaasunik suliffeqarfii tungavigisaannik piffissamut sivisuumut nungusaataanngitsumik atuinissamik qulakkeerininnissaq mianerineqartariaqarpoq.

Aalisakkanik allanik tunitsivimmik imaluunniit tunisassiorfimmik pioreersumik allanngortitsinermut tunngatillugu Naalakkersuisut akuersissuteqarnissaat aamma pisariaqarpoq. Aalajangersagaq taanna siusinnerusukkut atuuttumut sanilliullugu allanngortinneqarpoq, tassani assersuutigalugu imermik innaallagissamilluunniit pilersuisinnaassutsip annertusineqarneranut imaluunniit attaveqaatitigut allatigut soorlu aqquserniornernut, talittarfiliornernut assigisaannullu pisortat aningaasaliisoqarnissaannik allanngortitsinermut pisariaqartitsiviuppat akuersisummik pissarsiniarnissaq taamaallaat pisariaqarluni. Tamannali kukkuneruvoq, tassa suliffeqarfimmik inuussutissalerisumik allannguinerit tamarmik inuussutissalerinermut oqartussaniit akuersisummik piaqartitsiviummata. Akuersissut Kalaallit Nunaanni Uumasut nakorsaanit inuussutissalerinerullu oqartussaniit pissarsiarineqassaaq, taamaallaat nunatsinni niuerfinnun tunisassiorneq pineqarpat, imaluunniit avammut tuniniaanissaq siunertaralugu tunisassiorneq pineqarpat Danmarkimi Fødevarestyrelsenimiit.

Kisiannili allannguinissaq pillugu qinnuteqaateqarnermut atatillugu aningaasaqarnikkut isumaliutit aamma ilanngunneqarnissaat suli pisariaqarluni.

Kisiannili pisortat aningaasaliinerannik Naalakkersuisut illersorneqarsinnaasumik aqtsisinnaasariaqarmata kiisalu piffissani piginnaasakkut ajornartorsiorfiusinnaasuni umiarsuarnik tunitsivilinerit pillugit inuiaqatigiit aningaasaqarneranni tunngavilersorluakkanik aalajangiisinjaasariaqarmata inuiaqatigiit aningaasaliissutaat tunisassiorfiup allanngortinneqarnerani inuiaqatigiit iluanaarutissaannut sanilliullugit nalilersuisoqarsinnaasariaqarpoq.

Imm. 2-mut.

Aalajangersagaq siusinnerusumut sanilliullugu allanngortinneqanngilaq. "Peqataasut attuumassuteqartut" aamma "peqataasut attuumassuteqartut tamarmik" akornanni immikkoortitsisoqarpoq. Naalakkersuisut aalajangiinissaat sioqqullugu peqataasut attuumassuteqartut tamarmik oqaaseqaateqarnissaat utaqqiniarlugu, suliamik sularinninnermi aningaasatigut annertuunik kinguneqartumik kinguaattoornermik kinguneqarsinnaavoq

piumasarineqartumik attuumassuteqartunik tamanik tusarniaaneq
pisusissamisuunngitsuuusoq paasinarsippat.

Taamaattumik taamaallaat taagut ”peqataasut attuumassuteqartut” atorneqarpoq.
Siusinnerusukkut aalisarneq pillugu inatsimmik piareersaanerni takuneqarsinnaavoq sulisut
sulisitsisullu kattuffii eqqarsaatigineqarsimasut. Tamanna suli atuuppoq. Taakku saniatigut
kommunit eqqorneqartut tusarniaanermi ilaatinissaat pisusissamisoortutut isigineqarpoq.
Ilimagineqarporli tunitsivinnik tunisassiorfinnillu nutaanik pilersitsinermut atatillugu
amerlanerusut tusarniarerni ilanngunneqartassasut, akerlianilli naammassisqaqsinnaassuseq
piiffissami pineqartumi aalisarnermi pissutsit aallanngornerannut sukkasuumik
naaleqqussarsinnaajumallugu allannguineq sioqqullugu ikinnerusunik
tusarniaasoqarsinnaasariaqarluni.

Imm. 3-mut.

Aalajangersagaq pingaarnersamigut aalisarneq pillugu inatsisartut inatsisaat nr. 18, 31.
oktober 1996-imeersumut sanilliullugu pingaarnersaatigut allanngortinneqanngilaq, aamma
tunisivinnik aammalu tunisassiorfinnuk nutaanik pilersitsineq kiisalu pioreersunik
allanngortitsineq pillugu sukumiinerusunik malittariassiorinissamik atulersitsinissamut
Naalakkersuisunut pisinnaatisisoqarluni. Umiarsuarnik tunitsiviliisarneq pillugu
Naalakkersuisut aamma malittarisassiorsinnaanerannik ilanngussisoqarpoq.

Aalajangersagaq nutaajuvoq. Umiarsuarnik tunitsivilinerit pillugit Naalakkersuisut
malittarisassiorfigisinnaasaattut oqaatigineqarsinnaapput:

- 1) sumiiffik pisiortorfissaq,
 - 2) nunami sulifimmik pilersitsinissaq pillugu piumasaqaat,
 - 3) pisanik tunisinissamut periarfissat,
 - 4) angallammut teknikkikut piumasaqaatit,
 - 5) aalisakkat suuneri annertussusaallu,
 - 6) piiffissamik killiliineq, aamma
 - 7) kikkut tamaarmik pisanik tunisisinnaanerat.
-
- 1) Sumiiffimmi killeqartumi taamaallaat tunitsiviup ingerlataqarnissaanut Naalakkersuisut
killiliisinnaanerat pingaaruteqarpoq. Pingartumik umiarsuarmik tunitsivilisoqartillugu
taakku nunami sulifissuarnik ingiaannginnissaat pingaaruteqarluni.
 - 2) Sulifissaqartitsineq eqqarsaatigalugu pisanik tunisisarnerup nunami tunisassiorfinnut
pinissaa kissaatigineqarmat nunami tunisassiorfimmik pilersitsinerup aningaasalersornissaa
eqqarsaatigalugu tunitsiviliinissamut akuttunngitsumik akuersissuteqartoqartarpoq.
 - 3) Sumiiffinnit pisanik tunisinissamut periarfissanik amigaateqarfiusuni sumiiffinni
angallatinik tunitsivinnik ikkussinernik akuersisunik malittarisassananik aalajangersaanissaq

periarfissaassaaq. Aamma sumiiffimmi killeqartumi unammilleqatigijittoqanngippat angallatinik tunitsivinnik ikkussisoqarnissaanut akuersineq tulluarsinnaavoq.

- 4) Pisiortornissamut teknikkimut piumasaqaatinik Naalakkersuisut aalajangersaasinnaanissaat pingaaruteqarpoq. Assersuutigalugu taamatut pisoqarsinnaavoq suliareqqiinermi imaluunniit pisanik tulaassanik qerititerinermi.
- 5) Pisiortornissamik akuersissummi Naalakkersuisut piumasaqaatinik aalajangersaasinnaapput, aalisagaqtigiiit annertussutsillu aalajangersimasut kisimik pineqarput.
- 6) Sumiiffinni sikusimasuni taamaammallu nunami tunitsiviit tikinnejqarsinnaannngitsuni Umiarsuarnik tunitsivilinerup piffissap killilerneranik aalajangiisinnaaneq tulluarpoq.
- 7) Umiarsuarnik tunitsivilinissamik akuersissuteqarnermi umiarsuarmik tunitsivimmik piginnittup aalisarnermi ingerlataqartunik tunisiniartunik itigartitsisinnaannginnissaa pingaaruteqarpoq. Umiarsuarmik tunitsiviligajuttoqartarpoq sumiiffimmi aalajangersimasumi pisanik tunisinissamut perarfissat killeqarneri tunngavilersuutigalugu, aammalu umiarsuit tunitsiviit arlallit sumiiffimmi ataatsimi tunitsiviusinnaasaratik, taamaammat killilersorneqanngitsumik unammillernissaq eqqarsaatigalugu kikkut tamarmik umiarsuarnut tunitsivinnut tunisisinnaasariaqarput. Aalisarnermik ingerlataqartut umiarsuarmut tunitsivimmut tunisisinnaatitaannginerat tulluanngilaq.

Suliareqqiineq

§ 40-imut

Imm. 1-imut

Aalajangersagaq piffissap ingerlanerani Kalaallit Nunaanni aalisarnikkut, agguassinnikkut suliffeqarnikkullu politikkimi sakkuunikuovoq annertooq. Aalajangersakkami aalajangersarneqarpoq Naalakkersuisut akuersissuteqarsimatinngagat kalaallit angallataanni tunisassiortoqassanngitsoq.

Angallammi tunisassiornissamut akuersissummik tunniussinermi pingaartumik aalisagaqassuseq niuernerlu eqarsaatigalugit piujuartitsineq tunngavigalugu aalisarneq inuiaqtigiiit aningaasaqarnerannut annertunerpaamik pissarsiffiusussaq inatsimmi siunertamut Naalakkersuisut aallaavigissavaat. Tassani aamma aalisarnerup imminut akilersinnaanera kiisalu aalisarnermi pisariillisaasinnaasut pingartinneqassallutik.

Aalajangersagaq imatut ilusilersorneqarpoq taamaalluni Naalakkersuisut akuersissummik tunniussissaasut, kisianni imaanngilaq akuersissummik tunniussinissamik Naalakkersuisut kisimik pisinnaatitaasut. Tamassumunnga Kalaallit Nunaanni inuussutissat pillugit

suliaqarnerup ilaannaa tiguneqarsimavoq, taamaammallu tamanna pillugu oqartussaaneq Danmarkimi oqartussanut avitseqatigiissutigineqarluni.

Angallammi suliareqqiineq inuussutissalerinerimi eqqiluisaarneq aamma inuussutissat isumannaatsuunissaat pillugit malittarisassat qaqgukkulluunniit atuuttut malillugit inuussutissalerinermut oqartussat akuersereernerisigut pisinnaavoq. Danmarkimi fødevarestyrelsi inuussutissanik avammut tuniniaasарneq pillugu malittarisassaliortarnerup Danmarkimit tiguneqarnissaata tungaanut angallatit avammut tuniniaasinnaanermut akuersissuteqartut angallatini suliareqqiinissamik akuersissapput nakkutiginnillutillu.

Angallatit nunatsinni niuerfinnut tunineqaqqittussanik aalisakkanik taamaallaat suliareqqiisut pineqarpata angallammi aalisakkanit tunisassiorqavinnersoq imaluunniit “suliareqqiinermi” pisat taamaallaat annertuunngorlugit tisaneqarnersut immikkoortinneqartarput.

Suliareqqiinermi ilaatinneqarput tarajorterineq, uutsiterineq, annikitsunngorlugit tisaneq, qerititsineq, poortuineq, akuutissanik atuineq il.il. taamaalilluni angallammi inuussutissanik suliarinnittoqarpat inuussutissanik tunisassiornermut, inuussutissatigut eqqiluisaarnermut inuussutissallu isumannaatsuunissaannut piumasaqaatit pillugit Uumasuuteqarnermut inuussutissalerinerpullu Oqartussanit angallat akuerineqassaaq. Tamatuma ilaatigut kingunerisaanik erngup, angallammi suliareqqiinermut atatillugu atorneqartup imerneqarsinnaasutut pitsaassuseqarnissaa pillugu piumasaqaataavoq. Imeq immameersoq, imaluunniit imeq tarajornilaartoq atorneqaqqusangillat. Aammattaaq Uumasuuteqarnermut Inuussutissalerinerpullu Oqartussat angallatinik taakkuninnga nakkutilliinissamut misissuinissamullu periarfissaqassapput aammalu inuussutissat pillugit inatsisini piumasaqaatit allat malinnejqarnerat qulakkiissallugu.

Taamaalilluni akuersissutip tunniunneqarnissaa sioqquillugu inuussutissalerinerimi oqartussaniit akuersissutip pisariaqartup pigineqarnissaa Naalakkersuisut qulakkiissavaat. Taamaattorli suliffeqarfik nammineq Danmarkimi imaluunniit Kalaallit Nunaanni inuussutissalerinermut oqartussanut akuersissummik qinnuteqassaaq.

Kapitali 10

Eqqissisimatitsineq, piujuartitsinissaq siunertaralugu teknikkikkut iliuutsit il.il.

§ 41-mut

Imm. 1-imut

Aalajangersakkami nr. 1-6-imi immikkoortut isumalluutit illersorneqarnissaat siunertaralugu Naalakkersuisut malittarisassiorfigisinhaasaanni arlallit allaqqapput. Aalajangersagaq tamakkiisuunngilaq, taamaattumik alisakkanik isumalluutinik illersuinissaq siunertaralugu malittarisassiorqarpat, Naalakkersuisut immikkoortunut allanut malittarisassiorsinnaapput. Siunnersummi imm. 1, nr. 4-imi ”aalisagaq” imatut allanngortinneqarpoq ” ”uumassusillit assigiinngitsut”, tassa aalisakkat saniatigut immami uumasunik allanik aalisartoqartarmat.

Nr. 1

Aalajangersagaq taanna peqassutsimik nungusaataanngitsumik aalisarnissaata siuarsarnissaa siunertalugu piffissat eqqisisimatisiviit sumiiffiillu matuneqartut pillugit malittarisassiortoqarsinnaavoq. Piffissat eqqisisimatisiviit sumiiffiillu matuneqartut pillugit malittarisassat assersuutigalugu aalisakkat piffissat ilaani suffisarneri illersorniarlugit imaluunniit piffissani aalisakkap pineqartup appassisumik imaluunniit qaffasissumik naleqarneranni il.il. illersorniarlugit aalajangersarneqarsinnaapput.

Nr. 2

Atortut, atortut assigiinngitsut aamma aalisariaatsit aalisarneqartussatut akuerineqarsimasunut aalisakkat kiisalu saniatigut pisanut annertuumik pingaaruteqarsinnaapput. Ilimageqarpoq piissutsit taakku pillugit malittarisassiornikkut kissaatigineqanngitsumik saniatigut pisat annikillisinneqarsinnaasut, peqatigisaanillu aalisakkat akuersissuteqarfiusut immikkoortinnissaat ajornanningerulersillugu, taamaalillunilu peqassutsimik niuernermilu nungusaataangitsumik aalisarneq anguneqarsinnaalluni.

Angallatit aaqqissuunneri atorneqarnerilu pillugit malittarisassanik aalajangersaaneq assersuutigalugu igitsisarnernut atortunut, igitsineq inerteqqutaillugu, inerteqqussummut tunngavissiisinnaavoq. Aalajangersagaq taanna malillugu assersuutigalugu suleriaatsit erseqqinnerusumik allaaserineqarsimasut malillugit usilersornissamut pilersaarusiortoqarnissaa pillugu piumasaqaateqartoqarsinnaavoq il.il. Aalajangersagaq taamatuttaaq atorneqarsinnaavoq atortunut aalajangersimasunut, atortunut assigiinngitsukkuutaanut imaluunniit aalisariaatsinut assigiinngitsunut.

Nr. 3

Malittarisassat tassaapput aalisarnerup ingerlanneqarneranut malittarisassaqartitsinermut malittarisassanut ataatsimut taaguutaasut. Aalajangersagaq taanna tunngavigalugu assersuutigalugu aalisarnermi atortut qanoq nalunaaqutsersorneqassanersut, kalerrisaarutit qanoq ittut atorneqassanersut, angallat qanoq iliuuseqassanersoq, atortut allat atortuinut nermussuussimappata qanoq iliortoqassanersoq, angallatit arlallit aalisarfimmi ataatsimi aalisarusuppata killeqartumilli inissaqarpat angallatit qanoq pissuseqassanersut il.il. pillugit aalajangersakkami pisinnaatitsissut atorlugu malittarisassiortoqarsinnaavoq.

Nr. 4

Aalisakkat uumassusillillu allat angissusaasa minnerpaaffissaat pillugit malittarisassanik aalajangersaanissamut pisariaqartitsinermi siunertaavoq aalisarnermi uumassuseqarnikkut piujuartitsinermik tunngaveqartumik ineriarngerup qulakkeerneqarnissaanik siunertaqarneq. Malittarisassani taakkunani ilaatigut qulakkeerneqassaaq taakkunanna aalisarnerup aallartinnginnerani aalisakkat taakku suffinissamut pisoqaassusissartik angissusissartillu angusimassagaat. Malittarisassani taakkunani aningaasarsiornermi pilerinartuulersimatinngit tamakkerlugit aalisarneqarnissaasa pinnngitsoortinnissaa qulaakkeerneqassaaq.

Aalajangersagaq aamma angissutsit minnerpaaffissaat pillugu malittarisassanik aalajangersaanissamut tunngavissiivoq. Taamaalilluni aalisakkanik aalajangersimasunik aalisarnerni suaassutsip appaata imaanut utertinnissaa pillugu malittarisassanik aalajangersaasoqarsinnaavoq. Aalajangersagaq taanna malillugu aalisagaqtiginnik ataatsinik imaluunniit aalisagaqtiginnik allanik aalisarnermi aalisakkat mikivallaartut qassit pisarineqarsinnaanerinut malittarisassanik aamma aalajangersaasoqarsinnaavoq. Malittarisassat assingusut aalisakkanik isumalluutnik illersuinissamik siunertaqpata aamma aalajangersagaq taanna malillugu aalajangersarneqarsinnaapput.

Nr. 5

Aalisakkat pisarineqartut qanoq angitiginerinut aamma aalisakkat suut pisarineqarnerinut nigartat angissusii pingaaruteqarluinnarput. Taamaattumik naatsorsuutigineqarpoq aalajangersakkamik taassuminnga tunngaveqartumik malittarisassanik aalajangersaaneq aalisarnerup ineriartorneranut annertuumik pingaaruteqassasoq.

Nigartat qanoq uuttornissaannut nunat tamat akornanni malittarisassaqarpoq, aalajangersakkamilu tunngavigineqarluni nunat tamat akornanni malittarisassat atuuttut mianerineqassasut.

Nr. 6

Aalisakkat allat aalisarniarneqanngitsut illersorniarlugit saniatigut pisat pillugit malittarisassanik aalajangersaasoqarsinnaavoq.

Aalajangersakkami tassani taamaattumik siunertaavoq aalisakkanik mikivallaartunik imaluunniit aalisakkanik eqqisisimattanik saniatigut pisanik killilersuinissaq, aamma inuussutissarsiutigalugu aalisarnermi taamaallaat aalisakkat akuersissummi aalisarneqarsinnaasutut akuerisaasut aalisarneqarnissaat qulakteerniarlugu.

Kapitali 11

*Aalisarnermi uumassusilinnik misissuinerit misileraallunilu inuussutissarsiutigalugu
aalisarnerit.*

Aalisarnermi uumassusilinnik misissuinerit

§ 42-mut

Aalajangersagaq siusinnerusukkut inatsisinik ingerlatitseqqiineruvoq taamaattorli ilaatigut allanngortinneqarluni. Aalisarnermi uumassusilinnik misissuinerit misileraallunilu aalisarnerit avissaartillugit immikkoortunut immikkoortinneqarput. Tamatuma saniatigut imm. 1 malillugu aalisarnermi uumassusilinnik misissuinernut akuersisoqarnissaa pillugu naliliiniarnermi Pinngortitaleriffik pingarnerusumik inissimalerpoq, tassa Naalakkersuisut taamaallaat "oqaaseqaatinik pissarsiniaannassannginnamik", maannakkullu akuersissut

tunniunneqassanersoq imaluunniit tunniunneqassannginnersoq pillugu aalajangiinermi tunngaviit ilaannut ilaaliissalluni. Tamatuma kingunerisaanik Pinngortitaleriffiup inassuteqaataanut Naalakkersuisut akerlileerusukkunik, inassuteqaat sooq malinniarnagu aalajangersimasunik suliamullu attummasssuteqartunik tunngavilersitsissapput.

Imm. 1-imut

Aalisarnermi uumassusilinnik misissuinerit imatut paasineqassapput, ilisimatuussutsikkut periutsit akuerisaasut tunuliaqutaralugit ilaatigut uumassusilinnik aalisarneqarsinnaasunik nalilersuinerit aamma aalisagaqassutsip killiffianik naatsorsuinerit naammassineqartassallutik. Aalisarnermi uumassusilinnik misissuinernut ilaatigut ilaapput aalisarnermi atortunik immikkoortiterinerusinnaasunik qajassuussinerusunillu inerisaaneq misileraanerlu, kissaatigineqanngitsunik saniatigut pisanik aamma immap naqqanut immallu naqqani naasunut tulluanngitsumik sunniutinik annikillisaasut.

Inatsimmi matumani aalajangersakkat malillugit suliatigut allannguilluni allatigullunniit akuliulluni iliuuseqarnernut misissuinernullu akuersisoqarsinnaanngilaq. Tamanna aamma misissuinernut aalisakkamik imaluunniit aalisakkat avatangiisiinut imatut allannguisunut aalisakkanut imaluunniit aalisakkat umaffigisaannik sunniuteqartunut atuuppoq. Tamatumunnga assersuutitut oqaatigineqarsinnaavoq imartami aalisagaqartumi innaallagiaq atorlugu misileraaneq.

Imm. 2-mut

Imm. 1, oqaaseqatigiit siulliit malillugit aalisarnermi uumassusilinnik misissuinernut Naalakkersuisut akuersitinnagit Pinngortitaleriffimmiit oqaaseqaammik pissarsiartoqassaaq. Oqaaseqaat taanna akuersisummik tunniussisoqarnissaanik imaluunniit tunniussisoqassannginnissaanik nalilersuinermut ilaatinneqassaaq. Tassani siunertaavoq aalisarnermi uumassusilinnik misissuinerit annertussusaannut piumasaqaatinullu Pinngortitaleriffiup annertunerusumik sunniuteqarnissaa. Pinngortitaleriffiup oqaaseqaataa ilaatigut akuersisummi piumasaqaatinik aalajangersaanermi atorneqarsinnaavoq.

Aalisarnermi uumassusilinnik misissuinerni pisat inuussutissarsiuqgalugu tuniniarneqartarnissaat siunertaanngilaq.

Imm. 3-mut

Pinngortitaleriffik aamma Danmarks Miljøundersøgelser Naalakkersuisunit akuerineqaqqaarnatik aalisarnermi uumassusilinnik misissuinernik ingerlataqarsinnaapput. Tamanna Pinngortitaleriffiup aamma Danmarks Miljøundersøgelser Kalaallit Nunaat aamma Naalagaaffimmi oqartussat sinnerlugit misissuinernik ingerlataqernerannik tunngaveqarpoq, ilaatigut biologit Naalakkersuisunut siunnersuuttaat taakkuninnga tunngaveqarpoq.

Imm. 4-mut

Aalajangersagaq allanngunngilaq. Maannakkut iliniagaqarneq siunertaralugu annikitsumik taamaallaat aalisartoqartarpooq. Aalajangersagaq 1988-imi ilanngunneqarpoq, taamanikkut inuussutissarsiutigalugu aalisarnerup iluani inunnik ilinniartitsinermi Namminersornerullutik Oqartussani Ilinniartitaanermut Pisortaqarfip angallammik 312 BRT-imik pisineranut atatillugu. Taamaallilluni siunissami suliniutit assingusut aalajangersakkap taassuma iluaniissinnaallutik.

Aalisarnerup "ilinniagaqarneq siunertaralugu" ilaatinissaanut immikkoortut uku pingartinneqarsinnaapput:

- 1) ilinniartitaanerup pisortatigoortumik akuerineqarsimanera, aamma
- 2) ilinniartitaanermi peqataaneq naammassinninnerlu inuussutissarsiornikkut tamassuma kingorna Kalaallit Nunaanni suliffinni toqqaannartumik atorneqarsinnaasunik aalajangersimasunik piginnaasaqalerfiuvoq.

Ilinniagaqarneq siunertaralugu aalisarnermit pisat inuussutissarsiutigalugu tuniniarneqartarnissaat siunertaanngilaq.

Imm. 5-mut

Aalajangersagaq nutaajuvoq aamma imm. 1 aamma imm. 3 malillugit akuersissutinut atatillugu Naalakkersuisut akuersissummut sukumiinerusunik piumasaqarsinnaanerat ilanngussisinnaanerat aalajangersarneqarluni. Imm. 1 malillugu piumasaqaatinut ilaatigut ilaasinnaapput Pinngortitaleriffimmit oqaaseqaatigineqartussami inassuteqaataasinnaasut.

Akuersissutip pissarsiarineqarnissaanut piumasaqaat tamanut tunngasoq tassaasinnaavoq aalisarnernit nalunaarusiat Pinngortitaleriffimmut nassiunneqarnissaat, taamaallilluni akuersissuteqarnikkut ilisimalikkanik Kalaallit Nunaat sapinngisamik pitsaanerpaamik iluaquaqarsinnaassalluni.

Akuersissummi piumasaqaatitut allatut assersuutigalugu aalajangersarneqarsinnaavoq angallatip logbogiini nalunaarsuinissaq angallammit qulakkeerneqassasoq, Pinngortitaleriffimmit imaluunniit Kalaallit Nunaanni Aalisarsinnaanermut Akuersissutinik Nakkutilliisoqarfimmit uumassusilinnit misiligutinik tigisisussat periarfissaqarnissaat imaluunniit angallammiinnissaat, kiisalu biologit pisanik uuttuisinnaanissaat.

Aalisarneq suna ingerlanneqarnersoq, sumi aalisarneq ingerlanneqarnersoq, atortut suut atorlugit aalisartoqarnersoq kiisalu pissutsit assingusut tunngavigalugit piumasaqaatit allat aalajangersarneqarsinnaassapput. Piumasaqaatit pingartumik Kalaallit Nunaanni Pingortitaleriffimmut aamma Aalisarsinnaanermut Akuersissutinik Nakkutilliisoqarfimmut tusarniaanerit tunngavigalugit aalajangersarneqarsimassapput.

Imm. 6-imut

Aalajangersagaq nutaajuvoq aamma aalisarnermi uumassusilinnik misissuinerit kiisalu ilinniartitaaneq siunertalaralugu aalisarneq pillugit malittarisassanik sukumiinerusunik Naalakkersuisut aalajangersaasinnaanerannik pisinnaatitsisoqarluni. Malittarisassanut ilaatigut ilaasinjaapput akulikissuseq, siaruaaneq, atortut atorneqartut, sumiiffit, piffissat, misiligtissanik tigusinerit aamma Naalakkersunut kiisalu Pinngortitaleriffimmut nalunaarusianik nassiussinissat.

Inuussutissarsiutigalugu misileraalluni aalisarneq
§ 43-mut

Aalajangersagaq nutaajuvoq aammalu misileraalluni aalisarnerup inuussutissarsiummik ingerlatsinermut atasumik ingerlanneqarnera erseqqissarniarlugu misileraalluni aalisarneq inuussutissarsiutigalugu misileraalluni aalisarnermut maannakkut allanngortinnejarpooq.

Imm. 1-imut

Aalajangersagaq nutaajuvoq. Inuussutissarsiutigalugu misileraalluni aalisarnerup Naalakkersuisunit immikkut akuerineqarnissaa aalajangersakkami aalajangersarneqarpoq.

Akuersisummik tunniussisoqassaneranik naliliineq ataatsimut naliliinermik tunngaveqartariaqarpoq, ilaatigut misileraalluni aalisarnissatut kissaatigineqartumi inuiaqatigiit soqtigisaat, kiisalu angusassatut iluanaarutissatullu naatsorsuutigineqartut Kalaallit Nunaanni inuussutissarsiutigalugu aalisarnermut tamarmiusumut iluaqutaassanersut pingartinneqarlutik. Nalilersuinermi Pinngortitaleriffik peqataatinneqarluarsinnaavoq.

Misileraalluni aalisarnissamik qinnuteqaat imm. 3-imi immikkoortunut ilaanersoq pingarnertut nalilerneqartariaqassaaq. Tulliatut misileraalluni aalisarnissaq pillugu qinnuteqaat imm. 4 malillugu aalajangersarneqartunik piumasaqaatinik erseqqinnerusunik naammassinninersoq naliliisoqartariaqassaaq.

Qinnuteqaatinik tigusaqarnissamut piffissarititap naareernerani ukiumi tulliuttumi inuussutissarsiutigalugu misileraalluni aalisarnissamut Naalakkersuisut pilersaarusiussapput. Ulloq akuersisummik Naalakkersuisut tunniussivissaannut apeqqutaapput misileraalluni aalisarnerup annertussusia, aalisarnermk nalinginnaasumik pilersaarusiorneq mianerisassallu tassunga atasut. Naalakkersuisut taamaalillutik ukiup nikinnera sioqqullugu akuersisummik tunniussinissamik pisussaaffeqaanngillat.

Imm. 2-mut

Aalajangersagaq nutaajuvoq aamma inuussutissarsiutigalugu misileraalluni aalisarnissamut akuersissut pillugu qinnuteqaatit ukiup tulliani aalisarnissamut akuersissutit ulloq 1. november sioqqullugu Naalakkersuisunit tiguneqarsimanissaat aalajangersarneqarluni.

Qinnuteqaatit ulloq 1. novemberip kingorna Naalakkersuisunit tiguneqartut taamaalillutik ukiup tulliani misileraalluni aalisarnermut naatsorsuutigineqarsinnaanngillat taamaattumillu ukiup tullissaanut tullinnguuttussamut utaqqisariaqarlutik. Qinnuteqaqqittooqarnissaa piumasagaataanngilaq, kisianni Naalakkersuisut qinnuteqartumut atassuteqarsinnaapput ukiullu tulliani misileraalluni aalisarnissamut akuersissummik qinnuteqartoq kissaateqarnersoq uppernarsaaqqullugu. Taamatut uppernarsaanermik Naalakkersuisut tigusaqanngippata qinnuteqaatip utertinneqarneratut isigineqassaaq.

Qinnuteqaat ulloq 1. november nallertinnagu Naalakkersuisunit tiguneqarsimassaaq. Taamaalilluni ulloq taanna nallertinnagu qinnuteqaatip Naalakkersuisunut nassiunneqarsimanissaa naammanngilaq, taanna aamma Naalakkersuisunit tiguneqarsimassaaq. Qinnuteqaammik tigesisimanermik Naalakkersuisut uppernarsasinnaapput, qinnuteqaatip ukiumi tulliuttumi misileraalluni aalisarnissamut akuersissut pillugu nalilersuinermi ilaatinneqarnera uppernarsarniarlugu. Ulloq 1. novemberip kingorna tiguneqartumik qinnuteqaammik tigusaqarmanermik uppernarsaat akerlianik ukiup tulliani nalilersuinermut qinnuteqaatip ilaatinneqarnissaanut taamaalilluni uppernarsaanerunngilaq. Ulloq 1. novemberip kingorna qinnuteqaat tiguneqartoq taamaallaat ukiup tullinnguuttup tulliani misileraalluni aalisarnissamut akuerineqarsinnaanermut ilaanissaa naatsorsuutigineqarsinnaavoq.

Imm. 3-mut

Inuussutissarsiutigalugu misileraalluni aalisarneq maannakkut immikkoortunut sisamanut agguarneqarpoq. Misileraalluni aalisarnissamut qinnuteqaat taamaalilluni immikkoortut arlaannut minnerpaamik ataatsimut atatinneqarsinnaassaaq. Immikkut akuersinerit taakku avataaniittunut aalisarnernut inuussutissarsiutigalugu misileraalluni aalisarnermut akuerineqarnissamik qinnuteqartoqarsinnaanngilaq, taakkunani nalinginnaasumik aalisarnermut malittarisassat nalinginnaasut malillugit qinnuteqartoqartussaavoq.

A. Aalisakkat nutaat aalisakkallu ilisimaneqartut

Taaguut "aalisakkat ilisimaneqartut" tassunga atatillugu isumaqarpoq aalisakkat Kalaallit Nunaata aalisarnikkut oqartussaaffigisaani ilisimaneqartut, tassa imaappoq aalisakkat inissereersimasut assersuutigalugu aalajangersimasumik ingerlaarfeqartut imaluunniit Kalaallit Nunaata imartaani suffisarfeqartut. "Aalisakkat ilisimaneqartut" amerlanertigut nalinginnaasumik aalisarnermut ilaapput imaluunniit nalinginnaasumik aalisakkatut takuneqartarlutik.

Taaguut "aalisakkat nutaat" tassunga atatillugu isumaqarput aalisakkat uumassuseqarnikkut immikkoortinneqarsimasut, kisiannili Kalaallit Nunaata imartaani siusinnerusukkut takuneqartarsimannngitsut imaluunniit annikitsumik takuneqartarsimasut. Taaguut taamaalilluni manna tikillugu aalisakkanut takuneqarsimannngitsunut assigiisinneqassanngilaq, naak taakku aamma immikkoortut taakku naapertorlugit taakkununnga ilaatinneqarsinnaagaluartut, taakku uumassuseqarnikkut piujuartitsinermut naleqqiullugu

illorsorneqarsinnaasutut isigineqaraluartut. Aalisakkat nutaat tassaanerupput aalisakkat nunarsuup immikkoortuini allani ilisimaneqartut nunanilu taakkunani aalisarnernut nalinginnaasunut ilaasut, kisianni Kalaallit Nunaannut nutaarluiinnaasut imaluunniit allanut sanilliullugit nutaajusut. Aalisakkanut nutaanut assersuutaasinnavoq avaleraasartuunik aalisarneq aallartinneqaqqammersoq, nalinginnaasumik aalisarnermut ilaasinnaavoq sulilu ”aalisakkanik nutaanik” misileraalluni aalisarnertut qinnutigineqarsinnaallutik. Taamaattorli tamanna qinnuteqaatit ataasiakkaat aalajangersimasumik nalilersornerinik tunngaveqartariaqarluni.

B. Sumiiffit nutaat aamma sumiiffit ilisimaneqartut

Taaguut ”sumiiffit ilisimaneqartut” immikkoortunut marlunnut agguarneqarsinnaavoq. Sumiiffik aalisakkamit pineqartumit uumaffigineqarsinnaasuuvvoq (sumiiffimmi ilisimaneqartumi aalisagaq ilisimaneqartoq), tassa imaappoq aalisagaq sumiiffimmi pineqartumi nalinginnaasumik takuneqartarpooq. Sumiiffik taamaalilluni ”ilisimaneqarpoq”, tassa aalisakkap sumiiffimmi tassaniinnera pillugu aalajangersimasumik ilisimannittoqarmat.

Immikkoortumi pineqartumi siusinnerusukkut akuttungitsumik aalisartoqartarsimancerata malitsigisaanik sumiiffik aamma ilisimaneqarsinnaavoq, imaluunniit uumassuseqarneq, avatangiisitigut imaluunniit nunap sananeqaataanik misissuinerit assigisaaluunniit tunuliaqutaralugit sumiiffik pillugu nalunaarsukkat pigneqarlutik.

Taaguut ”sumiiffit nutaat” aamma immikkoortunut marlunnut agguarneqarsinnaavoq. Sumiiffik aalisakkanut pineqartunut nutaajuvoq (aalisagaq ilisimaneqartoq immikkoortumi nutaami), aalisagaq taanna assersuutigalugu nuuttarnini allanngortissimammag, taamaalillunilu siusinnerusukkut takuneqarfiginngisamini sumiiffimmi aalisagaq taanna takussaalersimalluni. Aamma imaassinnaavoq sumiiffik siusinnerusukkut aalisarfigineqarsimanngitsoq, imaluunniit assersuutigalugu uumassuseqarnermiit, avatangiisiniit imaluunniit nunap sananeqaataanik misissuinerniit sumiiffik pillugu naammattunik nalunaarsukkanik peqarnani.

Naggasiullugu taaguut nutaaq ”misissuilluni aalisarneq” sumiiffimmi ilisimaneqartuni aalisakkanik ilisimaneqartunik inuussutissarsiutigalugu misileraalluni aalisarnermut ilanngunneqarpoq. Pisut ilaanni misissuilluni aalisarneq aalajangersimasumik naliliisoqarneratigut misissuilluni aalisarnertut taanagu aalisarnermi uumassuseqarnikkut misissuinertut immikkoortinneqarsinnaavoq tak. § 44-mut nassuaatini aalisarnermi uumassuseqarnikkut misissuinerit nassuiarneri.

Imm. 4-mut

Pinngortitaleriffik suleqatigalugu inuussutissarsiutigalugu misileraalluni aalisarnermut piumasagaatnik sukumiinerusunik Naalakkersuisut aalajangersaassapput. Ilaatigut Kalaallit Nunaata imartaani avatangiisinut tunngasunik paasissutissanik Pinngortitaleriffik

katersisarpoq, aalisakkanik misissuisarluni aamma immikkoortumi ilisimatuunut, biologinut assigisaannullu atassuteqarneq pissutigalugu immikkut ilisimasaqarluni. Aalajangersakkani tassani taamaattumik misileraalluni aalisarnerup qanoq ingerlanneqarnissaa pillugu piumasaqaatinik sukumiinerusunik aalajangersaalluni sulinermi Pinngortitaleriffimmik qanimut suleqateqarnissaq anguniarneqarpoq. Misileraalluni aalisarneq pillugu malittarisassanik sukumiinerusunik aalajangersaaneq taamaattumik Pinngortitaleriffimmit oqaaseqaammik pissarsiaqarneq minnerpaamik aallaaveqartariaqarpoq.

§ 44-mut

Imm. 1-imut

Inuussutissarsiutigalugu misileraalluni aalisarnermi siunertaq tassaavoq aalisakkatigut isumalluutinik qulaajaanissaq, taamaalilluni aalisakkanik isumalluutit annertunerpaamik iluaqtigineqarsinnaaniassammata. Inuussutissarsiutigalugu misileraalluni aalisarneq pillugu qinnuteqaatini tamani siunertaq taanna aallaavagineqartariaqarpoq.

Siusinnerusukkut misileraalluni aalisarnerup siunertaa inatsisini erseqqissumik allanneqarnikuunngilaq, tamannalu misilaraalluni aalisarnermi siunertami suna aallaavagineqartariaqarnersoq nalornissutaasarsimallunilu allangortivinnejartarsimalluni. Aalajangersakkami nutaami tassani taamaattumik misileraalluni aalisarnerup siunertaa pillugu erseqqissumik nassuaammik aalajangersaasoqarniarpoq taamaaliornikkut pisortat siunertaannut iluaquutanngitsunik tulluanngitsumik aningasananniarluni misileraalluni aalisarniarnerit pinngitsoortinniarlugit. Kalaallit Nunaanni aalisarnermi tamarmi atukkat pitsaanerulersinnissaat ilisimasatigullu tunngaviit pitsaanerulersinnissaat siunertaralugu tamanna ingerlanneqassasoq misileraalluni aalisarnissamut akuersissut pillugu qinnuteqarnissamik soqtigisaqtunut kikkunnuluunniit paasinartuussaaq.

Imm. 2-mut

Imm. 1 naapertorlugu siunertaq naammassineqarsimappat, tassa imaappoq aalisarnermi isumalluutit misileraalluni aalisarnermi aalajangersimasumik qulaajarneqalersimappata, misileraalluni aalisarneq inuussutissarsiutigalugu aalisarnermut nuussaaq. Siusinnerusukkut misileraalluni aalisarnernut assersutissaqarpoq, ukumiit ukiumut nanginneqartarsimasunik, taakkulu peqassutsimik, sumiiffimmik imaluunniit atortunik atorneqartunik ilisimasaqnerulerlernermik kinguneqarsimanatik. Aalisarneq taamaattoq taamaaliluni aalisarsinnaanermut akuersissummut inatsimmi siunertarineqartumit allaanerusumik avaqqutaarilluni allamillu siunertaqarluni pissarsiarineqarsimasumut assinguleriaannaavoq.

Aalajangersakkami tassani misileraalluni aalisarneq, siunertaq anguneqarpat, inuussutissarsiutigalugu aalisarnermut nuussasut maannakkut aalajangersarneqarpoq.

Imm. 3-mut

Misileraalluni aalisarnermi aalajangersimasumi qanoq anguneqarsimanersoq taamaalillunilu inuussutissarsiutigalugu aalisarnermut nuunnissaanik Naalakkersuisut naliliissapput. Pinngortitaleriffiup tusarniaaffigineratigut nalinginnaasumik peqataatinneratigut nalilersuisoqartariaqarpoq.

Immikkoortut pingaartinneqartussat ilaatigut tassaasinnaapput siunissami aalisarnissamut pilersaarutit naammassineqarsimanersut, naammaginartunik Pinngortitaleriffimmut nalunaarusiortoqarsimanersoq, nalunaarsukkat allat, pinngortitaleriffimmit qinnutigineqarsimasut, pigineqarnersut, aamma misileraalluni aalisarnerup piujuartitsineq tunngavigalugu inuussutissarsiutigalugu aalisarnermut nuussinnaanera pillugu paasissutissat naammattut pissarsiarineqarsimanersut. Nalilersuinermut apeqqutaassaaq § 43-mi immikkoortut sisamat allattorneqarsimasut arlaat malillugu misileraalluni aalisarnermut akuersisoqarsimanersoq. Assersuutigalugu sumiiffinni nutaani aalisakkanik misissuiffigineqarsimangitsuni misileraalluni aalisarneq eqqarsaatigalugu aalisakkat pillugit aamma sumiiffik pillugu naammattumik misissuisoqarsimanersoq nalilersuisoqartariaqarpoq. Akerlianilli misileraalluni aalisarneq sumiiffinni ilisimaneqartuni aalisakkanut nutaanut tunngasuuppat, aalisakkat naammattumik misissuiffigineqarsimanersut taamaallaat nalilersuisoqartariaqassaaq, tassa sumiiffik aalisarfigineqartoq pillugu ilisimasanik allanik pissarsiniarnissaq pisariaqanngimmat.

Imm. 4-mut

Inuussutissarsiutigalugu misileraalluni aalisarnermut akuersissutit pillugit Naalakkersuisut sukumiinnerusunik malittarisassiorsinnaapput, tassunga ilanngullugit ingerlanneqarnera pillugu piumasaqaatit, qinnuteqartumut sunik piumasaqaateqartoqassanersoq, qaqgukkut suullu sukumiinerusumik piumasaqaatigalugit akuersisoqassanersoq, piffissaq akuersissuteqarfigineqartoq, aamma inuit akuersissummik qinnuteqarsinnaasut kikkuusinnaaneri. Aalajangersagaq aamma misileraalluni aalisarnerup siunertaanik naammasinninnissaq pillugu sukumiinnerusunik malittarisassiornermut atorneqarsinnaavodq.

§45-mut

Imm. 1-imutAalajangersagaq nutaajuvoq, aalisarnermik ingerlataqartut misileraalluni aalisarnermik aalajangersimasumik aallartiseqataasimasut, misileraalluni aalisarneq nalinginnaasumik aalisarnermut nuutsinneqarpat, tassunga akuersissummut kisermaassisussaanerat aalajangersarneqarluni. Aalajangersakkami tessani misileraalluni aalisaannarnissamik ilungersuuteqarsimasut Pinngortitaleriffimmullu aalajangersakkat allat naapertorlugit paassisutissanik katersisimasut inuussutissarsiutigalugu aalisarneq aallartinneqarpat *immikkut pinninnittarnermik tunngavittut* taaneqartartoq malillugu aalisarsinnaanermut akuersissummik tunineqarnissaat qulakkeerneqassaaq. Immikkut pinnittarnermik tunngavik tassaavoq misileraalluni aalisarnermi peqataasimasut misileraalluni aalisarneq nalinginnaasumik aalisarnermut nuunneqarpat tassunga kisermaassillutik aalisarsinnaanermut akuersissuteqassasut. Kisermaassineq taanna ukiut pingasut tikillugit atuussinnaavoq, pissutsillu malillugit ukiunit pingasunit

sivisunerusunngortinnejarsinnaalluni. Tamanna qinnuteqartut aalisarnermik misileraalluni malittarisassat eqqortinnissaannik kajumissuseqalertinnerannut tapersiissaq misilaraallunilu aalisarneq pilerinarnerulersinnejassalluni. Pisinnaatitaaneq taamaallaat aalisarnermi ingerlataqartunut misileraalluni aalisarnermi peqataasimasunut atuuppoq.

Imm. 2-mut

Misileraalluni aalisarnerup nalinginnaasumik aalisarnermut nooreernerata kingorna aalisarsinnaanermut akuersisummut pisinnaatitaaffik, nalinginnaasumik aalisarnerup aallartereerneraniit ukiuni pingasuni atuutissaq. Akuersisummut piginnittut akuersisummut naammaginartunik ilimagineqarsinnaasumillu iluanaaruteqarnissaat qulakkeerniarlugu taamaaliortoqarpoq.

Pisinnaatitaaffik misileraalluni aalisarnerup nalinginnaasumik aalisarnermut nuunneraniit ukiuni pingasuni atuutissaq, tassa imaappoq nalinginnaasumik aalisarnerup aallartereerneraniit ukiuni siullerni pingasuni akuersisummut piginnittut iluaquteqassasut. Akuersisummut piginnittut allatut oqaatigalugu assersuutigalugu akuersissutini ukiumut tulliuttumut ”toqqorsinnaanngilaa” tamatumalu kingorna ukiunut pingasunut tulliuttunut pisinnaatitaaffeqluni. Ukiut siullit pingasut iluanni akuersissut iluaqutigineqanngippat taanna atorunnaassaaq. Aammattaaq nalinginnaasumik aalisarnerup aallartereerneraniit ukiup ataatsip kingorna aatsaat ukiunilu tulliuttuni atorneqarpat akuersissut ukiumik ataatsimik sivikillineqassaaq.

Misileraalluni aalisarnerup aalisarnermut nalinnginnaasumut nuunneqareernerata kingorna pisinnaatitaaffik atuuppoq, tassa aalisarsinnaanermut akuersisummut piginnittup aalisarsinnaanermut akuersissut nalinginnaasumik aalisarneq aallartippat ukiuni pingasuni siullerni atorsinnaavaa.

Aallatut oqaatigalugu aalisarsinnaanermut akuersisummut piginnittup aalisarsinnaanermut akuersissut assersuutigalugu ukiup tullianut “toqqorsinnaavaa”, tamassumalu kingorna ukiuni pingasuni aalisarsinnaanermut akuersissuteqarsinnaatitaassalluni. Aalisarsinnaanermut akuersissut ukiut pingasut siullit atorneqanngippat atorunnaassaaq. Tamassuma saniatigut aalisarsinaanermut akuersissut aalisarnerup nalinginnaasup aallartereerneratigut aatsaat ukiup ataatsip qaangiunnerani atorneqarpat aalisarsinnaanermut akuersissut ukiumik ataatsimik sivikillineqassaaq, ilaalu ilanngullugit.

Imm. 3-mut

Imm. 1 aamma imm. 2 malillugit akuersisummut pisinnaatitaaffik misileraalluni aalisarnerit aalajangersimasut ilaannut ukiunit pingasunit sivikinnerusumik atuunnissaa pillugu Naalakkersuisut aalajangiisinnasut aalajangersakkami aalajangersarneqarpoq. Pisut ilaanni aalisarnermi unammilleqatigiinneq eqqarsaatigalugu akuersisummut pisinnaatitaaffiup ukiuni pingasuni atuunnissaa tulluartuussanngilaq. Tamatuma saniatigut aalisarnermik ingerlataqartut assersuutigalugu akuersisummut annertunerpaamik iluaquteqanngippata

akuersissutip piffissap atuunnissaata sivikillineqarneqarnissaanut Naalakkersuisut periarfissaqartariaqarput.

Imm. 4-mut.

Imm. 1 malillugu akuersisummik tunisineq allatigullu tunniussineq pillugu malittarisassanik sukumiinerusunik Naalakkersuisut aalajangersaanissamut aalajangersakkami pisinnaatinneqarput. Tassunga ilanggullugu tunisinerit tunniussinerillu taamaattut Nunatta Karsianut akiligassamik akiligassiiffiginissaannut Naalakkersuisut sukumiinerusunik malittarisassiorsinnaapput.

§ 46-imut

Inuussutissarsiutigalugu misileraalluni aalisarnissamut akuersisummik pissarsisimasut inuup imaluunniit suliffeqarfiup pisussaaffiinik aalajangersakkami aalajangersaasoqarpoq.

Imm. 1, nr. 1 aamma nr. 2-mut

Misileraalluni aalisarnermi siunertap naammassineqarnissaanut, tak. § 44, angusat sapinngisamik pitsaanerpaat qulakteerniarlugit misileraalluni aalisarnerup ingerlanneqarneranik nakkutiginneqqissaarnissaq pisariaqarpoq. Taamaattumik inuussutissarsiutigalugu misileraalluni aalisarnissamut akuersisummik pissarsisimasoq Naalakkersuisunit akuerineqartussamik misileraalluni aalisarneq kissaatigineqartoq pillugu pilersaarummik saqqummiussissaq. Pilersaarutit taamaattut nalinginnaasumik pissutsinik makkuninnga imaqassapput:

- misileraalluni aalisarneq qanoq ittoq qinnutigineqarnersoq (tak. § 43, imm. 1, nr. 1-4),
- aalisakkat suut aalisarneqassanersut,
- sumiiffimmi sumi aalisarneqassanersut,
- atortut suut atorneqassanersut,
- angallatit suut atorneqassanersut kiisalu pisanut angallatip aalisarsinnaassusia,
- misileraalluni aalisarnermi siunertaq qanoq naammassiniarneqarnersoq,
- siunertap naammassineqarnissaata tungaanut misileraalluni aalisarnermut piffissamut pilersaarut, kiisalu
- misileraalluni aalisarneq Kalaallit Nunaanni aalisarnermut tamarmiusumut qanoq tapertaassanersoq.

Taaguineq tamakkiisuunngilaq.

Naalakkersuisut isumaqarpata aalisarneq pillugu pilersaarut naammaginanngitsoq Naalakkersuisut akuerisassaannik pilersaarummik nutaamik qinnuteqartoq suliaqassaaq. Piffissaliussap naammaginartup iluani pilersaarummik naammaginartumik qinnuteqartoq suliaqarsimanngippat misileraalluni aalisarnissamut akuersissut atorunnaassaaq, imm. 2 malillugu.

Imm. 2-mut

Imm. 1-imik pisussaaffiit eqqortinneqanngippata inuussutissarsiutigalugu misileraalluni aalisarnermut akuersissut arsaarinnissutigineqassaaq kisremaassisinnaanerlu § 45 imm. 1 naapertorlugu annaaneqassaaq. aalisarneq pillugu naammaginartumik pilersaarummik Naalakkersuisunut saqqummiussisoqanngippat, imaluunniit akuersissummik piginnittooq Pinngortitaleriffiup qinnutigisaanik ingerlaavartumik nalunaarusiunngippat imaluunniit nalunaarsukkanik katersinngippat akuersissut aamma arsaarinnissutigineqassaaq. Tamanna sioqqullugu sanilliussinermut tunngavik naapertorlugu iliuutsit annikinnerusut atorneqartariaqarput. Assersuutigalugu paasisutissat qinnutigineqartut piaarnerpaamik nassiunneqarnissaat imaluunniit pissutsit allat iluarsineqarnissaat pillugit akuersissummik piginnittumut ilisimatitsinerit.

Imm. 3-mut

Imm. 2 naapertorlugu pisussaaffinnik naammassinninnginnerup malitsigisaanik akuersissut atorunnaarsinneqarpat qaammatit 24-t kingorna misileraalluni aalisarnermut akuersissummik nutaamik aatsaat qinnuteqartoqarsinnaasoq aalajangersakkami aalajangersarneqarpoq.

Akuersissutip annaaneqarneratigut inuit imaluunniit suliffeqarfifit akuersissummik nutaamik qinnuteqaqqiinnarsinnaannginneri aalajangersakkammi tassani qulakkeerneqassaaq.

Aalajangersagaq taamaalilluni imm. 2 malillugu pisussaaffiit aalajangersarneqartut eqqortinneqarnissaasa qulakkeerneqarnissaannut aalajangersagaq tapersiissaaq.

Misissuilluni aalisarneq

§ 47-imut

Imm. 1-imut

Misissuilluni aalisarneq inuussutissarsiutigalugu misileraalluni aalisarnerup ataaniittutut nassuarneqarpoq, taanna naapertorlugu sumiiffinni ilisimaneqartuni aalisakkanik ilisimaneqartunik aalisarnissamut killeqartumik akuersissummik tunniussisoqarsinnaalluni immikkut piumasaqaatit naammassineqarsimannngippata misissuilluni aalisarnermut akuersissutinik aallaaviatigut tunniussisoqarneq ajorpoq. Tamatumunnga pissutaavoq immikkoortuni ilisimaneqartuni aalisakkanik ilisimaneqartunik misissuinissamut inuiaqatigiit pisariaqartitsivinngimmata, tamanna aalisarnermi uumassuseqartunik misissuinermut ilaannngippat – taamaattoqartillugu misissuilluni aalisarneq pinnagu tassunga akuersissummik qinnuteqartoqartariaqarluni.

Pisuni suni misissuilluni aalisarnermut killeqartumik akuersissuteqartoqarsinnaaneranut aalajangersakkami aalajangersaasoqarpoq. Taamaattoqassaaq atortut nutaat atorlugit aalisartoqartillugu, imaluunniit atortut siusinnerusukkut atorneqarsimasut atorlugit aalisartoqarpat, kisiannili sumiiffimmi aalajangersimasumi peqassuseq annikilleriarujussuarsimatillugu, inuussutissarsiutigalugu aalisarneq atorunnaarsimalluni,

aamma misissuilluni aalisarnissaq siunertaralugu peqassutsip annertusiartoqqinneranik nakkutilliineq.

Imm. 1-mut, nr. 1. Atortut nutaat

Aalisarnermi tassani siunertaq tassaasinnaavoq atortut nutaat atorneqarsinnaanerinik misissuineq. Siunertaq aamma tassaasinnaavoq piujuartitsinermut aamma aalisakkanut eqorneqartunut sunniutaanut tunngatillugu atortut pineqartut pillugit kiisalu aningaasatigut pissarsianut sanilliullugu atortut atorneqaannarnissaasa tulluartuuneranik ilisimasaqarnerulernissamik kissaateqarneq.

Imm. 1-mut nr. 2. Peqassutsip annertusiartorneranik nakkutiginninneq

Malittarisassamik taassuminnga atuineq annikilluinnartuuusariaqarpoq taamaallaallu aalisakkat ikileriarujussuarsimappata aalisarneq nakkutilliinermik siunertaqartillugu atorneqassalluni. Aalisarnermut tassunga akuersissut pillugu piumasaqaat taamaattumik minnerpaamik tassaasariaqarpoq peqassuseq ajornartorsiorfioereersoq annertunerusumik ajoquuserniarnagu aalisarnerup annertussusiatigut annertuumik tunuarsimaartoqartariaqarnera. Pisuni ataasiakkaani tamani taamatut ittumik misissuilluni aalisarneq pinnagu uumassuseqarnikkut misissuinernut akuersisummik taamaallaat tunniussisoqartariaqarnersoq isumaliutigineqartariaqarpoq.

Imm. 2-mut

Inuussutissarsiutigalugu misileraalluni aalisarnermut piumasaqaatit aamma misissuilluni aalisarnermut atuupput. Tassunga ilanngullugu § 44 malillugu siunertaq tassaavoq aalisakkatigut isumalluutinik qulaajaaneq taamaattorli misissuilluni aalisarnermut atuuttut isiginiarlugit. Siunertaq naammassineqarsimappat (tamanna naammassineqarsinnaappat) misissuilluni aalisarnermi pineqartumi nungusaataanngitsumik aalisarnissaq eqqarsaatigalugu illersorneqarsinnaasutut isigineqarpat misissuilluni aalisarneq inuussutissarsiutigalugu aalisarnermut nuunneqartarpoq. § 44, imm. 3 naapertorlugu aalajangersimasumik Naalakkersuisut naliliissapput aamma akuersissut il.il. pillugit sukumiinnerusunik malittarisassiorsinnaallutik.

Immikkut erseqqissassallugu pingarpoq pisussaaffit § 46, imm. 1 nr. 1-2 aalajangersarneqartut misissuilluni aalisarnermut akuersisummik piginnittunut aamma atuummata.

Imm. 3-mut

Aalajangersakkami Naalakkersuisut piginnaatinneqarput misissuilluni aalisarnermut sukumiinnerusunik malittarisassiorsinnaasut, tassunga ilanngullugu misissuilluni aalisarnermut akuersisummik qinnuteqarnermi piumasaqaatit sukumiinnerusut.

§ 48-mut

Imm. 1-imut aamma 2-mut

Aalajangersakkami siunertaavoq ilaatigut Kalaallit Nunaanni aalisarnermi pisuussutinut akitsuutinik maannakkut atuuttunik siunissamilu atuuttussanik nalilersuinermut paasissutissanik pissarsinissaq siunertalarugu ilaatigut biologit atugassaqarnissaat aalisarnermik inuussutissarsiut ataatsimut isigalugu ilisimasaqalernissaq ilaatigut inuussutissarsiummi tunisassiornermi atugassaqarnissaq ilaatigullu nakkutilliinermi atugassaqarnissaq siunertalarugit malittarisassiornissaq.

Naalakkersuisut inatsit tunngavigalugu aqutsinerat, tassunga ilanngullugu aalisarnermik inuussutissarsiuteqarnermik aamma Kalaallit Nunaanni inuiaqatigiinnik ataatsimut isigalugu ineriartortsineq ilaatigut inuussutissarsiummit paasissutissanik tunngaveqarmata aalajangersagaq annertuumik pingaaruteqartutut isigineqarpoq.

Angallatip, atortut atortullu allat angallatip aalisarnermilu atortut saniatigut aamma tassaasinnaapput angallammik aaqqissuussineq, angallat qanoq ittumik tunisassiorfeqarnersoq, angallat qanoq annertutigisumik tunisassiorsinnaassuseqarnersoq qerititsisinnaassuseqarnersorlu pissutsillu allat angallammi naammassisqarsinnaassutsimik, aalisarnermilu atuinissamik aalajangiinissamut pingaaruteqartut.

Aalisarnerup pisallu ataqtiginnerat aamma angallatip pisaqarsinnaassusia aalisakkat qanoq inisisimanerannik ineriartornerannillu oqaluttuarsinnaapput. Nammineq tunisassiorneq, nuutsinerit, tunisinerit aamma kaaviaartitsinerit aqtseriaaseq sorleq aningaasaqarnikkut tulluarnerunersoq tamarmik takutitsisinnaapput, suliffeqarfiit tungaaniit aamma inuiaqatigiit tungaaniit isigalugu.

Pissutsit allat tassaasinnaapput pisanik tunisinissamut periarfissat, nunami suliareqqiinissamut periarfissat, tulaassivimmiit assartuinissamut periarfissat, tuniniaanissamut periarfissat, akit aamma tulaassivinni assigiinngitsuni akit ineriartornerat.

Paasissutissat teknikimut tunngasut assersuutigalugu tassaasinnaapput, tunisassiorfiit suut angallatit assigiinngitsut atorneraat, tunisassiorfiit ilaanni allanut sanilliullugu imminut akilersinnaassuseq, tunisassiorfiit ilaat sulianik ingerlatsinerni sipaartarnersut.

Aamma tassaasinnaapput aalisarnermi atortut aalisarnerni assigiinngitsuni angallatinuit assigiinngitsunit atorneqartut. Atortunik tunisassiorfut akornanni ineriartortsinermi annertuumik unammillertoqarpoq, tamannalu angallatini pisariillisaanermut, aningaasarututinut imminullu akilersinnaassutsimut annertuumik pingaaruteqarsinnaavoq.

Paasissutissat allat aalisarnermi aammalu qulaaniittunik nalilersuinermut pingaaruteqartut tassaapput pisanik atuinermut qanoq annertutigisumik suliniuteqartoqarsimanoersoq. Tamanna assersuutigalugu uuttorneqarsinnaavoq takussutissanut allanut sanilliullugu piffissaq qanoq annertutigisoq atorneqarsimanoersoq, qanoq aalisarluartoqartigisimanoersoq, motorit angissusaat, ikummatisanik atuineq, ningittakkat takissusaat, qassutit angissusaat qalorsuit ammaneri, tamarmik immikkut ataatsimoortillugilluunniit pisanik aalisarnermik suliniutinik ilisimasaqalersitsisinnasut.

Imm. 3-mut.

Aalajangersakkami tessani siunertaavoq aalisarnerup iluani paasissutissanik pisariaqartunik tamanut saqqummiussinissamik akuersinissaq, assersuutigalugu aalisarsinnaanermut akuersissutit tunniunneqartut aamma angallatit ataasiakkaat aalisarnerni aalisarsinnaanermut akuersissuteqarfiusussani pisat pillugit paasissutissanik tamanut saqqummiussineq, tassunga ilanngullugit pisat annertussusissaannik akuersissuteqarfiusuni pisassiissutinik atuinerit pillugit paasissutissat.

Aalisarsinnaanermut akuersissuteqarnissamik piumasaqaateqarfiusuni kalaallit nunallu allamiut angallataasa aalisarnerat pillugu pisassiissutinik atuinernik Kalaallit Nunaanni Aalisarsinnaanermut Akuersissutinik Nakkutilliisoqarfik naatsorsueqqissaarinernik suliaqartapoq. Pisassiissutinik atuinernik naatsorsueqqissaarinermi ilaapput aalisarsinnaanermut akuersissutinik piginnittut angallatillu aqqi kiisalu pisassiissutit pisallu sumiiffinnut akuersissuteqarfiusunut aggualugit aalisakkat oqimaassusii. Avammut saqqummiussinerni allorniusat minut sillu ilanngunneqarneq ajorput.

Paasissutissat avammut saqqummiunneqartarput tamassuma kingorna uppernarsarneqarnissaat sillimaffigalugu. Paasissutissat avammut saqqummiunneqartussaanngitsut pillugit Kalaallit Nunaanni malittarisassat atuuttut aalajangersakkut allanngortinneqanngillat. Taamaammat paasissutissanik taamaattumik suliaqarnermi pisariaqartumik mianersortoqartariaqarpoq.

Paasissutissanik taakkuninnga suliaqarnermi avammullu saqqummiussinermi inuit pillugit paasissutissat pillugit inatsimmi tamanna pillugu aalajangersakkat naapertorlugit paasissutissanik sularinnitarneq pillugu malittarisassat atuuttut Naalakkersuisut malissavaat.

Kapitali 13

Aalisarneq Pillugu Siunnersuisoqatigiit

§ 49-mut

Imm. 1-imut

Imm. 4 naapertorlugu siunnersuisoqatigiit katitigaanerannut piumasaqaatit naapertorlugin Aalisarneq pillugu Siunnersuisoqatigiinnik Naalakkersuisut pilersitsissapput. Tamatuma kingorna Aalisarneq pillugu Siunnersuisoqatigiit suliassaat tassaavoq imm. 2-imi allattorneqarsimasunut immikkoortunut tunngasutigut Naalakkersuisunut oqaaseqaasiortarneq, kisianni aatsaat Naalakkersuisut tamanna pillugu Aalisarneq pillugu Siunnersuisoqatigiinnut noqqaassuteqarpata. Immikkoortuni imm. 2-imi immikkoortut eqaaneqartunut tunngasunik suliani tamani nalinginnaasunik Aalisarneq pillugu Siunnersuisoqatigiit ilaatinneqarnissaat Naalakkersuisut isumagisariaqarpaat.

Imm. 2-mut

Naalakkersuisut Aalisarneq pillugu Siunnersuisoqatigiit oqaaseqaammik qaugu qinnuigisinnaaneraat aalajangersakkami aalajangersarneqarpoq.

Imm. 2, nr. 1-imut

Kalaallit Nunaanni aalisarnerup ingerlanneqarneranut killilersuiffigineqarneranullu malittarisassassaliornissamik pilersaarusrusiornermut suliaqarnermullu atatillugu Aalisarneq pillugu Siunnersuisoqatigiit oqaaseqaateqaqqullugit Naalakkersuisut qinnuigisinnaavaat. Assersuutigalugu aalisarnermut tunngasuni inatsisitigut suliniutinut nutaanut tunngasutigut Naalakkersuisut tusarniaaqqaarneranni tassani Aalisarneq pillugu Siunnersuisoqatigiit ilaatinneqarsinnaapput.

Imm. 2, nr. 2-mut

Aalisarnermi aalajangersimasumi pisat annertussusaannik aalajangersaanermi Aalisarneq pillugu Siunnersuisoqatigiit oqaaseqaateqaqqullugit Naalakkersuisut qinnuigisinnaavaat. Aammattaaq pisassiissutit, aalisarnermi atortunik atuineq, umiarsuarnik tunitsivilineq kiisalu aalisakkanik aalisakkanillu tunisassianik tuniniaaneq pillugu apeqquutit pillugit siunnersuisoqatigiit oqaaseqaateqarnissaannik Naalakkersuisut noqqaasinnaapput. Tassani pingartumik tuniniaanermi suliniutit nutaat eqqarsaatigineqarput ilanngullugit pingartumik tunisinermi suliniutit nutaat eqqarsaatigineqarput.

Suliani nalinginnaasuni taamaallaat Aalisarneq pillugu Siunnersuisoqatigiit tusarniarneqarsinnaapput, taamaallutillu sulianik suliarinninnerni aalajangersimasuni peqataasinnaanatik. Siunnersuisoqatigiinnik pilersitsinermi ilaasortat aamma siunnersuisoqatigiit sulinerat pillugu nipangiussisussaatitaanermik nalunaarummik atsiortariaqarput.

Imm. 2, nr. 3-mut

Kalaallit Nunaanni aalisarnermi piujuartitsinermik siuarsaasunik suliniutinut tunngasunik Aalisarneq pillugu Siunnersuisoqatigiit oqaaseqaateqaqqullugit Naalakkersuisut qinnuigisinnaavaat. Tamanna tassaasinnaavoq suliniutit aalajangersimasut pillugit siunnersuisoqatigiit tusarniarnissaat, soorlu aamma piujuartitsinermik siuarsaanermi suliniutit nutaat pillugit siunnersuisoqatigiinniit siunnersuutinik pissarsiniartoqarsinnaasoq.

Imm. 3-mut

Apeqqutini kinguartinneqarsinnaanngitsuni siunnersuisoqatigiit ataatsimoorlutik isummersinnaannginneranni Aalisarneq pillugu Siunnersuisoqatigiit allakkatigut Naalakkersuisunit tusarniarneqarsinnaapput.

Imm. 4-mut

Siunnersuutigineqarpoq Aalisarneq pillugu Siunnersuisoqatigiit siunissami inuussutissarsiutitigut aalajangersimasumik tunuliaqtaqartunik suliatigut ilinniarsimasuussasut kiisalu Kalaallit Nunaanni aalisarnermik inuussutissarsiutini soqutigisaqaqatigiit kattuffianni sinniisut allat. Taamatut katitigaanerup Naalakkersuisunut siunnersuisoqatigiit oqaaseqaataasa sulianut tunngasunik pisariaqartunik imaqarnissaat qulakkeerneqassaaq. Aammattaq piumasaqaataavoq ilaasortat tamarmik, assersuutigalugu inuussutissarsiornikkut misilittagaqarnertik pissutigalugu, Kalaallit Nunaanni inuussutissarsiutigalugu aalisarnermut immikkut ilisimasaqarnissaat.

Imm. 5-imut

Siunnersuutigineqarpoq Aalisarneq pillugu Siunnersuisoqatigiit piffissamut ukiunut sisamanut qinerneqartassasut. Ilasortaq ataaseq tunuarpat imm. 4-imi Siunnersuisoqatigiit katitigaanerannut piumasaqaatit naapertorlugit piffissap qinigaaffiusup sinneranut ilasortamik nutaamik Naalakkersuisut toqqaassapput. Piffissaq qinigaaffiusoq siunnersuisoqatigiinnut ilaasortanik nutaanik qinersisoqnerani aallartissaaq, Inatsisartut inatsisaata matuma atulersinnerata kingorna.

Imm. 6-imut

Siunnersuisoqatigiinni ilaasortat akornanni Aalisarneq pillugu Siunnersuisoqatigiit siulittaasannik Naalakkersuisut toqqaassapput, tak. imm. 4. Siulittaasoq aallaaviatigut inuussutissarsiornermik sivisuumik misilittagaqarneq, siusinnerusukkut Aalisarneq pillugu Siunnersuisoqatigiinni peqataasarsimaneq imaluunniit aalisarneq pillugu inatsisinut taakkuninngalu aqtsinermut immikkut ilisimasaqarneq pissutigalugu suliatigut pisariaqartumik ilisimasaqartoq ilaasortat akornanni toqqarneqassaaq.

Naalakkersuisut aamma Aalisarneq pillugu Siunnersuisoqatigiit suleriaasissaannik piareersaanissamut pisussaaffeqarput. Suleriaaseq assersuutigalugu ataatsimiigiaqqusinarerit, imaqarniliat il.il. pillugit malitarisassanik imaqarsinnaavoq.

Taakku saniatigut siunnersuisoqatigiinnut allatseqarfimmik Naalakkersuisut isumaginnissapput. Allatseqarfik siunnersuisoqatigiit ataatsimiinnerinik piareersaanermi ingerlatsinermilu peqataassaaq. Allatseqarfik maannakkutut inunnit Aalisarnermut Naalakkersuisoqarfimmi sulisunit imaluunniit pisortani sulisunit allanit imaluunniit pisortat ingerlatsivianni Naalakkesuisoqarfimmit toqqarneqartumit ingerlanneqassaaq.

Naggasiullugu Siunnersuisoqatigiit ataatsimiinnerinut atatillugu aningaasartuutit Naalakkersuisunit akilerneqassapput. Inatsisartunut Naalakkersuisunullu ilaasortat akissarsiat pillugit inatsit malillugu siunnersuisoqatigiinni ilaasortanut Naalakkersuisut akissarsianik akiiliissapput kiisalu ataatsimiinnerit ingerlanneqarnerannut inissaqartitsissallutik. Taamaattorli assersuutigalugu ataatsimiiffissamut siumut utimullu timmisartumut billetsinut, unnuinernut, aamma ullormusianut il.il. aningaasartuutit akilerneqarnissaat aalajangersakkamut ilaanngillat. Taakku ilaasortap nammineerluni akilertassavai.

Kapitali 14 *Nakkutilliineq*

§ 50-mut

Imm. 1-imut

Aalajangersagaq taanna malillugu inatsimmi aalajangersakkanik eqqortitsisoqarneranik nakkutilliinermut malittarisassanik sukumiinerusunik Naalakkersuisut aalajangersaasinnaapput. Tassunga ilanngullugu Kalaallit Nunaata aalisarnikkut oqartussaaffigisaani kalaallit angallataasa tulaassineri usinillu nuutsisarneri pillugit malittarisassanik Naalakkersuisut aalajangersaasinnaapput. Aalajangersagaq taanna malillugu Kalaallit Nunaata aalisarnikkut oqartussaaffigisaata avataani kalaallit angallataasa tulaassineri usilersoqqinnerilu pillugit malittarisassanik Naalakkersuisut aamma aalajangersaasinnaapput. Aalajangersakkamut ilaapput Kalaallit Nunaata aalisarnikkut oqartussaaffigisaani aamma avataani pisat.

Imm. 2-mut

Aalajangersagaq taanna tunngavigalugu nunat tamat akornanni isumaqatigiissutit naapertorlugit nakkutilliinermi pisussaaffit qaqugukkulluunniit atuuttut Naalakkersuisut ilanngussinnaavaat. Aalajangersagaq taamaalilluni NAFO-miit aamma NEAFC-imiit nakkutilliinermi aalajangersakkat Kalaallit Nunaanni inatsisinut ilanngunneqarnissaannut tunngavissiivoq. Tamanna ilaatigut isumaqarpoq Naalakkersuisut Port State Control-mut tunngatillugu sukumiinerusunik malittarisassiorsinnaasut.

Imm. 3-mut

Inerteqquaasumik, nalunaarutigineqanngitsumik killilersugaanngitsumillu aalisarnerup pinngitsoortinissaa siunertaralugu aalisakkat ilaatigut qanoq pisarineqarnerinut tunineqarnerinullu malittarisassanik aalajangersaanissamut Naalakkersuisut periarfissaqarnissaat pingaaruteqarpoq.

Nunat tamat akornanni suleqatigiiffit Kalaallit Nunaata peqataaffigisaani inerteqquaasumik, nalunaarutigineqanngitsumik killilersugaanngitsumillu aalisarnerup pinaveersimatinnissaanut annertuumik isiginninnerannut atatillugu aalajangersagaq una isigineqassaaq. Taanna

naapertorlugu tulaassinerit usinillu nuutsinerit qanoq ingerlanneqarnissaat pillugu suleqatigiiffinnit taakkunanit piumasaqaateqartoqarpoq, aamma nunat ataasiakkaat inerteqqutaasumik, nalunaarutigineqanngitsumik killilersugaanngitsumillu aalisarnerup pinaveersimatinneqassanissaanut annertunerusumik qanoq iliuuseqarsinnaanersut.

Nr. 1

Unioqqutitsisumik aalisarnerup pinaveersimatinissaa siunertalarugu pisat tiguneqartut pillugit paasissutissanik inuit aamma inatsisitigut inuttut isigineqarsinnaasut tunniussinissaannik pisussaaffiliisunik malittarisassanik aalajangersaasoqarsinnaavoq. Tamakku assersuutigalugu tassaasinnapput tigooqqaaviit, suliffissuit, illut niuerfiit il.il. taamatut pisussaaffilerneqarsinnaasut.

Siunertaq tassaavoq inerteqqutaasumik, nalunaarutigineqanngitsumik killilersugaanngitsumillu aalisarneq ingerlanneqarnersoq nakkutiginiarlugu aamma angallatit allattaavinnut malittarisassat malillugit allattuinersut nakkutiginiarlugit sapingnisamik pitsaanerpaanik nakkutilliisutut oqartussat sakkussaqartinneqassasut.

Nr. 2

Unioqqutitsisumik aalisarnerup pinaveersimatinissaa siunertalarugu aamma pisanik tunisisartut inuit aamma inatsisitigut inuttut isigineqarsinnaasut aalisarnermut kalaallit imaluunniit nunat allamiut akuersissutaannik atuuttumik peqarnersut nakkutigininnissamut tigooraaviit, suliffissuit, illut niuerfiit il.il. peqqunneqarnissaat pillugu malittarisassanik aamma aalajangersaasoqarsinnaavoq.

Inuk imaluunniit inatsisitigut inuttut isigineqarsinnaasoq akuersissummik atuuttumik peqarnani pisaminik tigooraavimmut tunisisimasoq paasineqarpal tigooraaviup, suliffissuup imaluunniit illup niuerfiusup il.il., taamatut pisanik pisismasup pineqaatissinneqarsinnaanera pillugu malittarisassiorqarsinnaavoq.

Nr. 3

Pisassiissutit tamakkerlugit aalisarneqarsimatillugit, tamanna tusagassiorfiit, aalisarnermi kattuffiit il.il. aqqutigalugit tamanut saqqummiunneqarsimalluni, tak. assersuutigalugu § 14, imm. 5, tigooraaviit, suliffissuit, illut niuerfiit il.il. pisassiissutinik taakkuninnga pisanik tigusinissaannut inerteqquteqartunik malittarisassanik aalajangersaasoqarsinnaavoq.

Qulaani allassimasut nanginneratut unioqqutitsisumik pisanik tigusisimasunut pineqaatissiisumik malittarisassanik Naalakkersuisut aalajangersaasinnaapput, pineqartup ilisimasimappagu imaluunniit ilisimasariaqarsimagluarpagu, pisat unioqqutitsinikkut pisarineqarsimasut.

§ 51-imut

Kalaallit Nunaanni Aalisarsinnaanermut Akuersissutinik Nakkutilliisoqarfik nakkutilliinissamut § 5 naapertorlugu aallaaviusumik pisinnaatitaaffeqarpoq, Naalakkersuisulli naalagaaffimmi oqartussat tamanna pillugu isumaqatigiissuteqarfereerlugit allat toqqarsinnaavaat, assersuutigalugu sakkutuut aalisarnermik alapernaarsuisa aamma politiit. Peqatigisaanik Kalaallit Nunaanni Aalisarsinnaanermut Akuersissutinik Nakkutilliisoqarfip sakkutuut aalisarnermik alapernaarsuisuinut aamma politiinut siusinnerusukkut inatsimmi pisinnaatitaaffiusut tigunikuuai. Kapitali 14-imni aalajangersakkani atuutsitsinermut politiiniit aamma sakkutuut aalisarnermik alapernaarsuisuinik ikioqqulluni Kalaallit Nunaanni Aalisarsinnaanikkut Akuersissutinik Nakkutilliisoqarfik noqqaasinnaavoq, tamatumunnga aalajangersimasumik pisariaqartitsisoqarpat, assersuutigalugu angallat ikiffineqarnissaminik nakkutilliiffingineqarnissaminillu itigartitsippat.

Imm. 1-imut.

Nakkutilliinermi oqartussat pisussaaffiinik aalajangersakkami aalajangersaasoqarpoq. Nakkutilliinermi oqartussaasut kikkuunersut § 5 naapertorlugu aalajangersarneqarpoq, aallaaviusumillu tassaalluni Kalaallit Nunaanni Aalisarsinnaanermut Akuersissutinik Nakkutilliisoqarfik. Kalaallit Nunaanni Aalisarsinnaanermut Akuersissutinik Nakkutilliisoqarfip saniatigut nakkutilliinermi oqartussanik allanik Naalakkersuisut toqqaasinnaapput.

Nakkutilliinermi oqartussat akuersissutini piumasaqaatit eqqortinneqarnerinik nakkutilliinermut atatillugu angallatini aalisarnermi atortunik pisanillu misissuisinnaapput.

Umiarsuit tunitsiviit angallatillu allat usinik nuussinissamut akuersissuteqartut aalajangersakkamut ilaapput. Aalajangersakkami ilaapput angallatit tamarmik, Kalaallit Nunaata aalisarnikkut oqartussaaffigisaani aalisartut kiisalu kalaallit angallataat nunat tamat imartaanni aalisartut. Tamassumani siunertaavoq aalajangersakkami angallatit tamarmik Kalaallit Nunaanni aalisarnermут aamma Kalaallit Nunaanni pisassiissutinut attuumassuteqartut aalajangersakkami ilaatinneqassasut.

Imm. 2-mut

Akuersissutini piumasaqaatit eqqortinneqarnersut misissornissaat siunertalarugu nakkutilliinermi oqartussat piumasarisinnaavaat angallatip pappiliaanik uppernarsaatinillu takunnikkumallutik. Tamanna nalinginnaasumik isumaqarpoq inuit imaluunniit inatsisitigut inuttut isigineqarsinnaasut, akuersissummik piginnittutut allassimasut, inuk imaluunniit inatsisitigut inuttut isigineqarsinnaasoq pisussaaffeqartorlu aalisartuunersoq qulakkeerniarlugu akuersissummik misissuineq.

Imm. 3-mut

Nakkutilliinermi oqartussat eqqartuussivik aalajangiiteeqqaarnagu aalajangersakkami eqqaaneqartut ingerlassinnaavaat. Inuilli taakku kinaanerminnik upternarsaammik pissusissamisoortumik takutitsissallutik.

Imm. 4-mut

Nakkutilliinermi oqartussanut isumagisassanngortinneqartut pisinnaatitaaffit suliassallu pillugit malittarisassanik Naalakkersuisut aalajangersaasinnaanerannik aalajangersakkami aalajangersaasoqarpoq.

Imm. 4 naapertorlugu malittarisassanik sukumiinerusumik aalajangersaanermut atatillugu erseqqissarneqassaaq Kalaallit Nunaanni Aalisarsinnaanermut Akuersissutinik Nakkutilliisoqarfipataani sulineq piniarnermik aalisarnermillu nakkutilliisunit ingerlanneqartoq taamaallaat allaffissornikkut nakkutiginninnermik nakkutilliinertullu iluseqartussaammat, aamma piniarnermik aalisarnermillu nakkutilliisut peqqussutit il.il. pinngitsaaliissutigissallugit imaaliaallaannarlutik pissaanermik atuisinnaanatik. Taamaalluni pinerluttulerineq pillugu inatsit naapertorlugu sulianik suliarinnittut suli tassaapput politiit imaluunniit sakkutuut aalisarnermik alapernaarsuisui: Tassa imaappoq Inatsisartut inatsisaanni matumanit malittarisassat malillugit unioqqutitsilluni aalisarnermik unnerluuteqarnissamut naammattumik tunngavissaqartillugu.

§ 52-imut

Imm. 1-imut

Aalajangersagaq taanna malillugu nakkutilliinermi oqartussat tamanna pisariaqartutut missiliorneqarpat aalisariutit suulluunniit unitsissinnaavaat, ikiffagalugit misissorlugillu. Aamma pisanik sakkunillu misissuinissaq imaluunniit nakkutilliinissaq siunertaralugu angallatit nunamukarnissaannik peqqusisinhaapput.

Manna tikillugu annertunerusumik sakkutuut aalisarnermik alapernaarsuisui angallatit unitsinnerisigut taakkulu ikiffingerisigut nakkutilliisuunikuupput. Tamanna pillugu Danmarkimi naalagaaffimmi oqartussanik isumaqtigiissusiortoqarpat taamatut nakkutilliilluni suliap ingerlanneqarneranik sakkutuut aalisarnermik alapernaarsuisui nangitsisinhaapput. Aalajangersagaq naapertorlugu maannakkut "nakkutilliinermi oqartussat" angallammik unitsisisinhaallutillu ikisinnaapput, taamaattumik § 5-imi akisussaaffit agguarneri naapertorlugit maannakkut aallaaviatigut suliassamik taassuminnga Kalaallit Nunaanni Aalisarsinnaanermut Akuersissutinik Nakkutilliisoqarfik isumaginnissaaq. Tamanna atutissaaq § 5, imm. 2 naapertorlugu naalagaaffimmi oqartussanik allanik immikkut isumaqtigiissusiortoqarsimanngippat.

§ 51-imi nakkutilliinermi suliassat ingerlanneqarsinnaapput kalaallit imaluunniit nunat allamiut angallataat pineqarnersoq apeqquaatinngagu.

Aallaaviatigut nakkutilliinermi oqartussat umiarsuup unitsinneqarfiani imaluunniit ikiffineqarfingisaani misissuissapput. Tamanna ajornarpat, imaluunniit saperartoq paasineqarpat, umiarsuaq Kalaallit Nunaanni umiarsualivimmut toqqarneqartumut ingerlaqqullugu peqquneqassaaq.

Pisanik sukumiinerusumik kisitsisoqarnissaa siunertalarugu, uppernarsaatit qulakkeerneqarnissaat imaluunniit tigusarinninnissaq siunertalarugu umiarsuup nunamukarnissaa nakkutilliinermi oqartussat peqqusisinnaapput.

Imm. 2-mut

Imm. 1 naapertorlugu pisinnaatitaaffik eqqartuussivik aalajangiiteqqaarnagu kisiannili kinaassutsimik upparnarsaammik pissusissamisoortumik takutititsinikkut nakkutilliinermi oqartussat ingerlassinnaagaat aalajangersakkami aalajangersarneqarpoq. Tamanna immikkoortumi periutsimut maannamut atuuttumut akuerisaasumullu naapertuuppoq.

§ 53-imut

Imm. 1-imut

Kalaallit nunallu allamiut angallataat, Kalaallit Nunaanni akuersissuteqarlutik aalisartut angallatip aalisarnermut attuumassuteqartunik ingerlataanik nakkutilliinissaq siunertalarugu nakkutilliinermi oqartussat sinniisuinik angallammiittoqarnissaanik nakkutilliinermi oqartussat peqqusisinnaapput.

Aalajangersakkap oqaasertai siusinnerusumut naleqqiullugu annertusineqarput, taamaalilluni maannakkut erseqqissarneqarluni aalajangersagaq angallatinut aalisarnermik ingerlataqartunut taamaallaat atuukkunnaarluni, kisianni aamma aalisarnermut attuumassuteqartunik ingerlataqartunut angallatinut tamanut, tassunga ilanngullugu assersuutigalugu angallatit usilersoqqinneqartut, angallatit aalisakkanik assartuisut, umiarsuit tunitsiviit, umiarsuit tunisassiorfiit, umiarsuit qeritsiviit il.il.

Kiisalu aalajangersagaq imatut annertusineqarpoq, maannakkut umiarsuaatileqatigiiffit Naalakkersuisunit akuersissuteqarlutik angallatit aalisartut, usinik nuutsisut nuutsisuni imaluunniit aalisarnermut attuumassuteqartunik allatigut ingerlataqartut nakkutilliinermi oqartussaniit sinniisunik ilaasoqaqqullugit peqquneqarsinnaallutik, angallat taamaattoq Kalaallit Nunaata nunami aalisarnikkullu oqartussaaffigisaata avataani ingerlataminik ingerlataqarpat.

Nakkutilliineq nalinginnaasumik imatut aaqqissuunneqassaaq nakkutilliinermi oqartussat sinniisui nalunaaquttap akunnerini arlalinni angallammiillutik aamma atortunik, umiarsuup allagaataanik, usianik il.il. misissuillutik.

Nakkutilliineq aamma imatut ingerlanneqarsinnaavoq nakkutilliinermi oqartussat sinniisui piffissani sivisunerusuni angallammiillutik, aamma angallatip ingerlataanik

alapernaarsuillutik aamma unioqqutitsisinnaanernik nakkutilliineq siunertaralugu takusaallutillu misissuillutik.

Nakkutilliinermi oqartussat najuunneri aalisarnerup malittarisassat atuuttut malillugit ingerlanneqarneranik qulakkeerinneqataavoq.

Imm. 2-mut

Aalajangersagaq nutaajuvoq. Aalajangersagaq taanna malillugu nakkutilliinermi oqartussat kalaallit aamma nunat allamiut aalisariutaat, aalisarnermi assartuutaat aamma umiarsuit tunitsiviit peqqusinnaavaat Kalaallit Nunaata aalisarnikkut oqartussaaffigisaani avataanilu angallatit taakku tulaassaannik usilersoqqinnerinillu nakkutilleeqqullugit.

Aalajangersagaq Kalaallit Nunaata aalisarnikkut oqartussaaffigisaani taassumalu avataani aalisarnermut atuuppoq. Aalajangersakkap pingaruteqarnera pisanik nuussineq imaluunniit pisanik tulaassineq umiarsuit upternarsaataanni il.il. allattorneqarsimasunut naapertorlugit ingerlanneqarnersut ilaatigut nakkutilliinermi oqartussat nakkutilliinissamut periarfissaqarnerannut atatillugu isigineqassaaq.

Imm. 3-mut

Nakkutilliinermi oqartussat najugaqarnerannut nerisaqarnerannullu umiarsuaatileqatigiiffiit aningaasartuutinik akiliinerat periuseq atuuttoq malillugu annikitsuararsuuvoq. Taamaattorli aalajangersakkami oqaaseqatigiit appaat malillugu nakkutilliinermi aningaasartuutit ilaannik annertunerusunik imaluunniit tamarmiusunik umiarsuaatileqatigiiffiit akileeqqunissaannut periarfissaqarpoq. Kisianni nalilerneqassaaq umiarsuaatileqatigiiffiit akiliisinnissaat tulluarnersoq. Naliliinermi ilanngunneqassaaq akiliutissap angissusia anguniakkamut sanilliullugu naammaginarnersoq.

Aalajangersagaq taanna naapertorlugu malittarisassat aalajangersarneqartut tamakkiisumik akiliinissamut peqqusisinnaanermut kinaassusersiunngitsumik piumasaqaatinik imaqartariaqarput, taamaalilluni erseqqissumik takuneqarsinnaalluni umiarsuaatileqatigiiffiit allanik imaluunniit tamakkiisumik akileeqquneqarsinnaassanngitsut, immikkoortumi aalajangersimasumi imaluunniit piffissami aalajangersimasumi kilisaatinut tamanut akiliinissamut piumasaqaat equnneqanngippat.

Nakkutilliineq pillugu akiliinerup annertussusaata allanngorarneranik tunngavilersuisinnaasunik pissutsinik tamakkiisumik taaguisoqarsinnaanngilaq, kisianni assersuutit eqqaaneqarsinnaallutik:

- 1) Kilisaammiit nalunaaruteqanngitsoornerit uteqattaartut.
- 2) Unioqqutitsinerit uteqattaartut siusinnerusukkut paasineqarsimasut aamma umiarsuup naalagaanut assuarliutigineqarsimasut.

3) Aalisarnermi nakkutilliisup pisarnertut pularnerata nalaani ingasattumik unioqqutitsinerit paasineqartut.

4) unioqqutitsisumik igitsinernut pasitsaassinerit sakkortuut pisat annertussusiisa katitigaanerisigut, immikkoortumi angallatit allat pisaannik malunnaatilimmik allaanerunerisigut imaluunniit Kalaallit Nunaanni Aalisarsinnaanermut Akuersissutinik Nakkutilliisoqarfianiit immikkoortumi angissutsit nalinginnaasumik angissusiisa agguarnerinik paasisaqarsimanermiit takutinneqartut.

5) Pisarnertut pularnermi angallatit ataatsimoortut sunniuteqarluartumik misissuititsinngippata aalisarnermik nakkutilliisut ataavartumik angallammiitinneqarnissaat pisariaqalersimappat. Tamanna assersuutigalugu Tunumi 100 pct.-imik tunisassioriornissamut akuersissuteqartunut kilisaatinut atuuppoq.

Imm. 4-mut

Pingaauteqarpoq nakkutilliinermi oqartussat sinniisui angallatini taakkunaniittut Kalaallit Nunaanni Aalisarsinnaanermut Akuersissutinik Nakkutilliisoqarfimmik, Issittumi Sakkutuunik aamma politiinik atassuteqarnissaat periarfissaqarnissaat. Inuk nakkutilliisoq taamaaliornikkut unioqqutitsinertut ilimagineqartoq erseqqinnerusumik misissorneqassanersoq imaluunniit erseqqinnerusumik misissuineq ingerlanniarlugu Issittumi Sakkutuuniit umiarsuaq alapernaarsuut aggersarneqassanersoq pillugu quillersani nalilersuisissinnaavai.

Angallatip radioanik, nalunaarasuartaataanik qarasaasiaanillu atortuinik nakkutilliinermi sulinermut atasunik atuinermi aningaasartuutit umiarsuaatileqatigiiffiup akilissavai. Angallatip radioanik, nalunaarasuartaataanik qarasaasiaanillu atortuinik nakkutilliinermi sulinermut atanngitsunik atuineq pillugu aningaasartuutit aalisarnermik nakkutilliisup nammineq akilissavai.

Imm. 5-imut

Imm. 1 aamma 2 naapertorlugit pisinnaatitaaffik eqqartuussivik aalajangiiteeqqaarnagu kisiannili kinaassutsimik upernarsaammik pissusissamisoortumik takutititsinikkut nakkutilliinermi oqartussat pisinnaaittaaffii periuseq atuuttoq naapertorlugu ingerlanneqarsinnaapput.

Imm. 6-imut

Aalajangersagaq taanna malillugu nakkutilliinermi oqartussat, taakku aalisarnermi nakkutilliisui, aamma sulisut allat nakkutilliinermi suliassanik suliaqartussatut toqqarneqarsimasut pillugit malittarisassanik pisinnaatitaaffinnillu Naalakkersuisut aalajangersaasinnaapput. Aalisarnermi malittarisassanik eqqortitsisoqarneranik nakkutilliinerit annertuut politiinit aamma Kalaallit Nunaanni Aalisarsinnaatitaanermut Akuersissutinik Nakkutilliisoqarfimmit ingerlanneqartarput, taamaattumillu suliassat taakku pillugit malittarisassanik aalajangersaaneq Naalagaaffimmi oqartussat peqatigalugit isumaqatigiissutigineqassallutik.

§ 54-imut

Imm. 1-imut

Aalajangersagaq pissutigalugu "misissuiffimmik" aaqqissuussinermik taaneqartumik pilersitsisoqarsinnaavoq. Aalajangersagaq malillugu angallat sumiiffimmut aalajangersimasumut ingerlaqquneqarsinnaavoq, tamaani alapernaarsuineq ingerlanneqarsinnaalluni. Taamatut aaqqissuussinikkut Sakkutuut aalisarnermik alapernaarsuisui akulikinnerusumik taamaalillunilu kinguneqarluarnerusumik alapernaarsuisinnaapput.

Nunat allamiut angallatai eqqarsaatigalugit tamanna amerlanertigut Kalaallit Nunaata aalisarnikkut oqartussaaffigisaanut pulanerup siorna kingornalu pisinnaavoq.

Misissuiffimmik aaqqissuussineq angallat aalisakkanik ataatsinik immikkoortuni malittarisassaqarfiusuni assigiinngitsuni aalisarpat, immikkoortuni taakkunani aalisarsinnaanerup avissaarnerani tulluassaaq. Nunat allat aaqqissuussineq atorpaat, taakkulu misilittagaat iluaqutaasumik ilanngunneqarsinnaallutik.

Pingaaruteqarpoq aaqqissuussineq taamaallaat pisariaqartumik annertussuseqartumik atorneqarpat. Aaqqissuussineq aalisarnermut akornutaassanngilaq. Tassunga atasumik siunertamut iluaqutaassaaq piffissaq sumiiffillu sapinngisamik umiarsuup naalagaalu isumaqatigiissutigineqarpata.

§ 55-imut

Imm. 1-imut

Aalajangersagaq kalaallit aamma nunat allamiut angallataannut atuuppoq. Aalajangersagaq taanna malillugu angallat aalisarnissamut akuersissuteqarfiunngitsumiitillugu aalisarnermi atortut illuartinneqarsimassapput. Aalajangersakkami siunertaavoq angallatip akuersissutigisaata saniatigut aalisarnermik ingerlatsisoqannginnissaata qulakkeerneqarnissaa. Angallatit taamaalillutik aalisarnermi atortunik saqqumititsiinnarnermikkut pillatisinneqarsinnaapput.

Aalajangersagaq nakkutilliinermi aalajangersagaanngikkaluarpoq, kisiannili angallat kalaallit nunaata imartaani angalaartillugu qanoq pissusilersornissaanut malittarisassaliornissamik aalajangersagaq siunertaqarluni. Taamaattorli aalajangersakkami nakkutilliinermi oqartussanit nakkutigineqartussaaneri pineqarmata nakkutilliinermi aalajangersakkat pillugit immikkoortup ataani ilaatinneqarluni.

§ 56-imut

Imm. 1-imut, nr. 1-3

Aalajangersakkami siunertaq tassaavoq nakkutilliinermut periarfissap qulakkeerneqarnissaa. Assersuutigalugu nakkutilliinermi oqartussat pisanik misissuereertinnagit imaluunniit nakkutilliinermi oqartussat takkutereertinnagit angallatip pisanik usingiarsinnaanngikkaat pillugu peqqusummik nalunaaruteqarsinnaapput. Aamattaaq aalajangersagaq angallatinut suliffeqarfinnullu aalajangersimasumut atorneqarsinnaalluni, piffissami assersuutigalugu aalisakkanik aalajangersimasunik tunisineq pillugu tulaassinerik kinguneqarluarnerusumik nakkutilliisoqarnissaanik pisariaqartitsisoqartillugu. Taamaalilluni tulaassineri, usilerosoqqinnermi imaluunniit aalisakkanik immikkoortiterisoqarnerani ingerlaannartumik oqimaalutaaneq suliffeqarfiit nakkutilliinermut oqartussanut siumoortumik nalunaarutigissagaat pillugu angallatinut peqqusisoqarsinnaalluni, tassunga ilanggullugu oqimaalutaaneq oqimaalutaasartumit akuerineqartumit ingerlanneqartassasoq. Peqqusutit inerteqqusutillu taamaalillutik aalisarnerni aalajangersimasuni imaluunniit immikkoortuni tamatumunnga pisariaqartitsisoqalersillugu nalunaaruteqarnissaq naatsorsuusiorqarnissaalu pillugit piumasaqaatinut nalinginnaasunut ilassutitut pingaaruteqartutut atorneqarlutik.

§ 57-imut

Imm. 1-imut

Aalajangersakkami nakkutigineqartut nakkutilliinermi oqartussanut ikuunnissaannut pisussaaffimmik aalajangiippu. Aalajangersakkami nakkutilliiffigineqartut nakkutilliinermi oqartussanik taakkualu sinnissaannik suleqateqarnissaat nakkutilliinermilu suliassanik ingerlatsinermi ajoquusersuinnginnissaat qulakkerneqassaaq. Taaguummi “pisariaqartumik ikuunneq” ilaapput nakkutilliinerup ingerlanneqarnissaa eqaarsaatigalugu pisariaqartutut isigineqartut kiisalu nakkutilliinermi oqartussat sulinerminnut atatillugu pisariaqartitaannik atortunik, uppernarsaatinik, atortussianik, logboginik, atortunik elektroniskiusunik raatiunillu ujartorneqartunik pisariaqartunillu atuinissaat qualakkeerniarlugu inuit taaneqartut inuttanik immikkullu ilisimasalinnik ikuuisussanik atugassiissapput.

Imm. 2-mut

Imm. 2-mi aalajangersakkami nakkutilliinermi oqartussat immikkut ittumik pisoqarnerani kukkunersiuismik naalagaaffimmit akuerisaasumik imaluunniit kukkunersiuisutut nalunaarsorneqarsimasumik atortunik nakkutigineqarsinnaasunik misissuisussamik toqqaassasut aalajangersarneqarpoq. Aalajangersakkamut ilaapput angallatit suliffeqarfiillu, nakkutilliinermik ingerlatsineq tamatuminnga pisariaqartitsippat.

§ 58-imut

Imm. 1-imut

Siunnersuusiornermut atatillugu nakkutilliinermi pisinnaatitaaffit atuuttut pisariillisarneqarnissaasa pisariaqarnerat Naalakkersuisunit nalilersoqqissaarneqarnikuupput. Tassunga atatillugu aalisarnermik nakkutilliineq pisariillisarsinnaajumallugu aalisariutini, suliffeqarfinni aalisakkanik tunisisartunik toqqortaqaqtunilu il.il. nalunaarutigineqanngitsumik aalisarnermik nakkutilliinerup ingerlanneqartarnissaa pisariaqartutut isigneqarnikuuvvoq. Suliffeqarfinnut isersinnaanermut angallatinullu ikisinnaanermut piumasaqaat tassaaginnarpoq, nakkutilliinermi oqartussat Inatsisartut inatsisaannik taannalu naapertorlugu malittarisassanik malinneqarnersoq nakkutilliinermik suliaqarnerannut atatillugu tamanna pissasoq. Tamanna taamaalilluni nakkutilliinermi oqartussat inatsisitigut suliakkiissutinik suliaqarnissaannut nalinginnaasumik tunngaviuvoq.

Siunnersuummi taamaalilluni pissusissamisoortumik kinaassutsimik upternarsaammik takutitsinikkut aamma eqqartuussivikkut aalajangiinertaqanngitsumik siunnersuummi taaneqartuni angallatini suliffeqarfinnilu aalisarnermi nakkutilliinissamut nakkutilliinermi oqartussat periarfissaqarnerat attatiinnarneqarpoq.

Imm 2-mut

Nakkutilliinermi oqartussat aalajangersagaq taanna malillugu inatsimmik saneqqutsisoqartumik pasitsaassisooqarpat inuit angerlarsimaffianni siumut nalunaaruteqaqqaaratik misissuisinnaapput. Nakkutilliinermi oqartussat qaqugukkut inuit angerlarsimaffianni isernissamut piumasaqarsinnaanerat imm. 1-imut tunngatillugu sakkortusineqarpoq. Taamaalilluni pineqartup inatsimmik taannalu naapertorlugu malittarisassianik saneqqutaarinerminut atatillugu angerlarsimaffimminik atuineranik pasitsaassisooqarsimassaaq. Sanilliussinermik tunngavik uani isiginiarneqassaaq, taamaalillunilu inuit angerlarsimaffiinut oqartussat isinnginneranni iliuutsit annikinnerusut atorneqassapput. Suliali kinguartinneqarsinnaannginnera eqqarsaatigalugu imaluunniit nakkutilliinermi oqartussat iliuutsit annikinnerusut atorneqarnissaat utaqqippassuk upternarsaat peerneqarnissaannik iginneqarnissaannilluunniit pasitsaassisooqarpat saneqqunneqarsinnaavoq.

Angerlarsimaffiup inatsimmik saneqqutaarinermi atorneqarnera pisinnaavoq angerlarsimaffimmi upternarsateqarneranik, atortoqarneranik assigisaannillu inatsimmik saneqqutsinermut upternassaateqarneranik pasitsaassineq. Tamassuma saniatigut angerlarsimaffik inatsimmik saneqqutsinermut upternarsaatinik atorneqarsinnaasunik pilersitsinermut, uninngatitsinermut, tunniussinermut toqqorsinermulluunniit atorneqarpat oqartoqarsinnaavoq angerlarsimaffik inatsimmik sanioqqutitsinermut atorneqartoq.

Nakkutilliinermi oqartussat anngerlarsimaffimmut imaliinnarlutik isersinnaanngikkunik politiinut ikiortissarsiorsinnaapput. Angerlarsimaffimmi piginnittup iseqqusinnginnissaa nakkutilliinermi oqartussat ilimagippassuk imaluunniit nakkutilliinermi oqartussat

sulinerannik ajoqusersuisussaasoq nakkutilliinermi oqartussat ilimagippassuk politiinik siumut ikioqqusoqarsinnaavoq.

Kapitali 15
Pineqaatissiissutit

§ 59-imut

Imm. 1-imut

Akiliinerup annertussusissaanik uuttuinermi Pinerluttulerinermi inatsimmi tunngaviit atorneqassasut tunngavigineqarpoq, tak. tassani § 121 aamma § 127. Tamatuma kinguneraa akiliisinnassaassutsip aamma pinerluttup qanoq ittuunerata saniatigut pineqartup suunerani iliuutsit akornusernissaannut inuiaqatigiit soqtigisaat pingaartinneqassasut. Tassunga ilanngullugu unioqqutitsilluni iluanaarutaasinnaasut nalingi aallaavagineqassapput. Angallatip angissusia, piginnaasaa aaqqissugaaneralu kiisalu inatsisinik unioqqutitsinermut tunngasut pissutsit eqqarsaatigineqarsinnaapput. Taamaattorli akiliisitsinerup qaffasissusia pitsaaliuinertut erseqqissumik sunniuteqartutut annertussusilerlugu aalajangersarneqartariaqarluni.

Aalisarnermi suliani aallaaviusoq tassaavoq angallammi naalagaasoq unioqqutitsisinnaanernut inuttut unnerluunneqassammat. Taamaattorli imm. 4-mut innersuussisoqarluni, piginnittooq angallammik ingerlatsisuunngippat.

Nr. 1

Inatsimmi aalajangersakkanik allanneqartunik unioqqutitsinerni akiliisitsisoqarsinnaavoq.

Nr. 2

Inuit inatsisitigullu inuttut isigineqarsinnaasut inatsimmi peqqussutinik nalunaarutinillu allaqqasunik malinninngitsut akiliisinneqarsinnaapput.

Nr. 3

Inatsisit malillugit akuersissutini tuunniunneqartuni piumasaqaatinik unioqqutitsinerni akiliisitsisoqarsinnaavoq.

Piumasaqaatit taamaattut akuersissummi aalajangersarneqassapput, taakkuli aallartinnissamut akuersissutinik taaneqartartuni aamma aalajangersarneqarsimasinnaapput. Piumasaqaatinut assersuuttit taaneqarsinnaapput akuersissutit pisanik tunisisussaatitaaneq amerlanertigut aalisarsinnaanermut akuersissummi piumasaqaatitut allaqqagajuttartut.

Nr. 4

Paasissutissanik eqqortunik nalunaarsuineq piujuartitsinermik tunngaveqartumik inuussutissarsiutigalugu aalisarnerup aalajangersarnissaanut tunngaviupput, paasissutissanik

eqqunngitsunik salloqittaataasunilluunniit tunniussineq, aamma paassisutissanik tunniussinngitsoorneq taamaattumik pineqaatissiissutaassapput.

Imm. 2-mut

Aalajangersagaq taanna malillugu malittarisassanik nalunaarutikkut atulersinneqartunik unioqqutitsinerit aamma akiliisitsinernik kinguneqarsinnaanerink aalajangersaanissamut Naalakkersuisunut piginnaatitsivoq. Pineqaatissiinerit taamaallaat inatsimmi takuneqarsinnaannginnissaat, kisianni aamma inatsimmik tunngaveqarlutik nalunaarutini aamma kommunit malittareqquaannit takuneqarsinnaanerit atatillugu taanna isigineqassaaq.

Imm. 3-mut

Aalajangersakkami pineqarput suliffeqarfii il.il. unioqqutitsinernut namminneq akisussaanerat. Aalajangersagaq pingaartumik umiarsuaatileqatigiiffinnut suliffeqarfittut ingerlanneqartunut atuuppoq.

Kommunimi ataatsimoorfik communalbestyrelsit aamma nunaqarfinni aqutsisut pillugit Inatsisartut inatsisaannut ilaasoq tassaavoq ataatsimoorfik communalbestyrelsit aamma nunaqarfinni aqutsisut il.il. pillugit Inatsisartut inatsisaanni kingusinnerusukkut allannguiteqartumi § 64-imut allaqqasut. Aalajangersakkami § 64-imut innersuussisoqanngilaq tassa aaqqissuusseqqinnermut kommuninillu aaqqissuusseqqiinnermut atatillugu Inatsisartut inatsisaanni allannguisoqarnissaa naatsorsuutigineqarmat.

Imm. 4-mut

Imm. 4-imi aalajangersakkami pineqarput angallammik piginnittup imaluunniit oqartussaasup inuttut akisussaanera. Nalinginnaasumik tamanna amerlanertigut tassaassaaq piginnittoq. Taamaattorli aalajangersakkap kinguneralugu angallammik attartortoq taamaalillunilu angallammik atuisinnaasoq aamma akisussaatinneqarsinnaasoq.

§ 60-imut

Imm. 1-imut

Aalajangersakkami pineqarpoq akiliisitsinissamik arsaarinninnissamillu allaffissornikkut aalajangiineq, tassunga ilangullugu nalilinnik arsaarinninneq. Periarfissaq siunnersuutikkut inatsisip atuuffiini tamani atuutilersinneqarpoq, taamaalilluni nalunaaruteqartarneq pisanillu tunisineq pillugu inatsimmi malittarisassanik unioqqutitsineq tunngavigalugu allaffissornikkut aamma akiliisitsisoqarsinnaalluni arsaarinnittoqarsinnaalluniluunniit.

Pineqartup pisuusutut nassuernissaa suliallu akiliisitsinikkut aalajangiiffiginissaanik isumaqarnissaa piumasaqaataavoq.

Allaffissornikkut akiligassiisoqarnissaanut periarfissaqarneq taamaallaat suliani killilinni atorniarneqarpoq aammalu akiligassiisoqarnissaani sulariaaseq aaqqissuinerlu erseqqissoq

aalisarnermik nakkutilliisunut angallatinullu nakkutilliisunut ilitsersuutini aalajangerneqarumaarluni.

Akiligassiisarneq EU-mi pisinnaatitsineq pillugu inatsimmi pisinnaatitsineq atorlugu logbogit kingusinaartumik nassiunneqarnerat pillugu suliani ullumikkut atorneqartarpoq.

Taamatuttaaq arsaarinninnissamik pariarfissaq siunnersuutip kinguneraa, tassunga ilanngullugu nalilinnik arsaarinninnissamik allaffissornikkut aalajangiineq.

Unioqqutitsilluni sakkoq pineqartup pisuunerminik atsiornissaata kiisalu eqqartuussivik avaqqullugu arsaarinninnermik suliamik aalajangiinissamik isumaqataanerminik nalunaaruteqarnissaata tungaanut nakkutilliinermi oqartussanit tigummineqassaaq. Piumasaqaatini taakkunani marlunni ataaseq eqqortinneqanngippat eqqartuussivik avaqqullugu arsaarinnitoqarsinnaanngilaq.

Taamatuttaaq nalilinnik eqqartuussivik avaqqullugu arsaarinnitoqarsinnaavoq.

Eqqartuussivik avaqqullugu arsarinninneq akiligassiinerlu eqqartuussivinni aalajangiinermut sanilliullugu, tassani politit eqqartuussivillu suliamut ilanngunneqartarlutik, ajornannginnerummat aalajangeeriaaserlu nanertuutaannginnerummat, innuttaasup suliani ajornanngikannersuni periarfissat taakku marluk akornanni toqqaasinnaanissaa pissusissamisoortutut isigineqarpoq.

Akiligassiinermik arsaarinninermilluunnit allaffissornikkut aalajangiinermut atatillugu qinnuteqartoqarneratigut akiliinissamut piffisarititap sivitsorneqarnissaanik periarfissaq aalajangersakkami atuutilersinneqarpoq.

§ 61-imut

Imm. 1-imut

Aalajangersagaq nutaajuvoq, aalajangersarneqarlunilu § 60, imm. 1 naapertorlugu suliarineqartuni eqqartuussisoqarnermi sulineq pillugu Kalaallit Nunaannut inatsimmi § 347 taamatuttaaq atuutissasoq.

§ 62-imut

Imm. 1-imut aamma 2-mut

Aalajangersakkami imm. 1-imi aalajangersarneqarpoq angallami unioqqutitsilluni aalisartumi pisanik arsaarinninnermi ilaasut pisat taakkualu nalingini angallammiittut angallatillu avataaniittut ilaasut, tassani pineqaratik pisat unioqqutitsinani aalisarnermeersutut uppernarsarneqartut.

Aalajangersakkami tassani pinerluttulerineq pillugu inatsimmi tunngaviit saneqqunneqarput. Saneqqutsineq pisat ilaat unioqqutitsilluni aalisarnermeersut immikkoortinnissaata ajornakusoornera tunngavigalugu isigineqassaaq.

Pisat ilaat unioqqutitsilluni aalisarnermeersut suullu tassanngaaniinnginnersut nalilersuinermi kinguneqanngilaq, angallat pillugu pissutsit aalajangersimasut pingartinneqassasut. Taakku tassaasinnaapput logbogimik, usilorsornermut allattuivimmik, angallammi aalisarnermi atortunik, atortut suut atorneqarsimanerannik logbogi allaqqasunik il.il. nalilersuineq. Pisat nalunaarutigineqartunut naapertuunnersut nalilersuinermi aamma iluaqtaasinnaapput.

Pisat ilaat suut unioqqutitsilluni aalisarnermeernersut suullu unioqqutitsilluni aalisarnermiinnginnersumut tunngatillugu nalilersuinermi apeqquaassaaq, suut uppernarsarneqarsinnaasimanersut.

Unioqqutitsilluni aalisarneq pisanik arsaarinninnermik kinguneqartoq pisinnaavoq angallatip matoqqasumi aalisarnerani imaluunniit angallat pineqartoq aalisarsinnaanermut akuversissuteqannginnerani. Tassaasinnaavoq aalisarnermik unitsitsinerup atuutilereernerata kingorna imaluunniit pisassiissutiminik tamanik atuereernerata kingorna. Tamanna aamma pisinnaavoq, angallat aalisarnermi atortut akuerisaanngitsut atorlugit aalisarpat, tassunga ilanngullugit nigartat mikivallaartut il.il.

Imm. 3-mut

Aalajangersagaq taanna malillugu angallatip pisaanik annertuumik uteqattaartumillu nalunaaruteqannginnerani angallammik angallatilluunniit nalinganik arsaarinnittoqarsinnaavoq.

Pisut annertunerit imatut paasineqassapput, pisut pillugit piaaraluni annertuumilluunniit mianersuaalliorluni nalunaaruteqannginneq kukkusunilluunniit nalunaaruteqarpat. Pisunut ilaapput angallatip pisassiissutini tamaasa pisarisimappagit, sumiffimmi mattoqqasumi aalisarpat, atortut inerteqquaasut atorlugit aalisarsimappat, nigartat mikivallaarpata, aalisakkanik aalisaqquaanngitsunik aalisarsimappat assigisaallu.

Imm. 4-mut

Aalajangersakkami arsaarinnittarneq pillugu nalunaarutikkut sukumiinerusunik malittarisassiornissamut Naalakkersuisut pisinaatinneqarput. Malittarisassat taakku suliarineranni tamanna pillugu Pinerluttulererneq pillugu inatsimmi § 166 isiginiarneqassaaq, taakku malillugu atortut pinerluuteqartup unioqqutitsinani ingerlatsineranut annertuumik pingaaruteqartut pissutsit immikkut ittut tamassumunnga pissutissaqartitsinngippata, arsaarinnissutigineqassanngitsut.

§ 63-imut

Imm. 1-imut

Aalajangersakkami tassani pisanik arsarinninnermut atatillugu immikkoortitsineq. Immikkoortitsineq assersuutigalu pisinnaavoq pisat angallammi usilorsornermi inissinnerisigut.

Immikkoortitsineq aamma pisinnaavoq pisanik nalunaaqutsiinikkut imaluunniit lastip inilluunniit paarnaarneqarnerannik nalunaaqutsiinikkut. Pisariaqartutut isigineqarpat periarfissat taakku marluk ataatsikkut atorneqarsinnaapput.

Immikkoortitsinermi nalunaaqutsersuinermiluunniit akulerutsitsinissaq pinngitsoorneqarsinnaanngippat, angallat oqaaseqatigiit aappaat malillugu pisanik arsaarinnissutinik imaluunniit nalinginik arsaarinnissutigineqartunik tulaassinissaanik peqquneqarsinnaavoq.

Imm. 2-mut

Aalajangersagaq taanna malillugu pisat arsaarinnissutaasut angallat Kalaallit Nunaata aalisarnikkut oqartussaafianiitillugu immikkoortinneqassapput.

§ 64-imut

Imm. 1-imut

Aalajangersagaq nutaanngitsuuvoq kisiannili Kalaallit Nunaat isoratoorujussuummat naleqqulluni. Angallatit 75 BRT/120 BT-imi anginerusut (avataasiorlutik aalisartut) Nunatta Eqqartuussivianut suliassanngortinnejassapput.

Aalajangersakkami ilaapput kalaallit angallataat aamma nunat allamiut angallataat.

Aalajangersakkami nakkutilliinermi oqartussat angallammik unioqqutitsilluni tigummigallaanissamik eqqartuussivimmilu suliassanngortitsinissaq siunertaralugu angallatip umiarsualivimmut tulakkiartoqquneqarnissaanik pisinnaatinnejqarput.

Tamatut tigusarinninnermut atatillugu eqqartuussisoqarnermi sulineq Kalaallit Nunaannut inatsimmi kapitali 235-imi § 357-imi aalajangersagaq atuutissaaq, tamassumalu kinguneraa arsaarinninnermik apeqqut angallatip tulareernerata kingorna piaernerpaamik kingusinnerpaamillu 125 tiimit qaangiunneranni eqqartuussivimmut suliassanngortinnejassasoq.

Politiit tassaagajupput angallat tulappat ikisartut. 25 tiiminik piffissaliineq taamaalilluni arsaarinninnermik apeqqummik eqqartuussivimmut suliassanngortitsinissami politiit unnerluussisussaatitaasullu piffissaqartinnejqassapput.

Nunat allamiut angallataasa unioqqutitsillutik aalisartut eqqartuunneqarnaveersaarnissaasa pinaveersimatinnissaanut aalajangersakkami ilaatigut qulakkeerisoqarpoq.

Aalajangersakkami aamma siusinnerusukkut unioqqutitsinerit pissitugalugit tigusarininnissamik periarfissiisoqarpoq.

Imm. 2-mut

Aalajangersakkami angallatinik eqqartuussisarneq pillugu (hot pusuit) FN-imi imarpiit pilligit isumaqtigiissummi 1982-imeersumi artikili 111 malinneqarpoq. 2003-imi novembarimi aalajangerneqarpoq FN-imi imarpiit pilligit isumaqtigiissut atortussanngortinnejassasoq

“hot pursuit”-imik aallartitsinissami pingaaruteqartoq tassaavoq, unioqqutitsinerup Kalaallit Nunaata aalisarnikkut oqartussaaffiani pisimanissaa angallatillu malersorneqartup suli Kalaallit Nunaata aalisarnikkut oqartussaaffianiinnissaa. Tassani malersuineq unitsinneqarani ingerlannejassasoq.

§ 65-mut

Imm. 1-imut

Aalajangersagaq taanna malillugu angallammik tigusarinnittoqarsinnaasoq, imm. 1-imi aningasatigut piumasaqaatit akilerneqarnissaata qulakkeerneqarnissaata pisariaqarpat imaluunniit aningasanik piumasaqaatit akilerneqarnissaannut qularnaveeqqusisoqarnissaata tungaanut.

Aalajangersagaq taanna malillugu imm. 1-imi piumasaqaatit suliap aalajangiiffigineqarneranit qaammatit marluk iluanni akilerneqanngippata angallat taassumalu atortui tuniniarnissaat qinnuteqaatigineqarsinnavoq.

Imm. 2-mut

Aalajangersagaq taanna malillugu angallammik atuisoq pisinnaatitaaffeqarani angallammik atuippat imm. 1-imi malittarisassaq atorneqarsinnaanngilaq.

Imm. 3-mut

Aalajangersagaq taanna malillugu tigummigallaqarnermut naammatittaaliortoqarpat eqqartuussisoqarnermi sulineq pillugu Kalaallit Nunaannut inatsimmi kapitali 35 atorneqassaaq. Suliaq taamaattoq Nunatta Eqqartussivianut suliassanngortinnejassaaq.

Eqqarsaataavoq aalajangersagaq inatsimmik unioqqutitsinermut atatillugu akileeqqusineq akuerineqanngippat atorneqassasoq.

§ 66-imut

Imm. 1-imut

Pillaammik akiliutit aalajangersagaq taanna malillugu Nunatta Karsianut akilerneqartassapput.

Kapitali 16

Atuutilersitsineq ikaarsaariarnerlu pillugit aalajangersakkat

§ 67-imut

Imm. 1-imut

Inatsit ulloq 1. januar 2018-imi atuutilersinneqarpoq.

Imm. 2-mut aamma imm. 3-mut

Peqatigisaanik aalisarneq pillugu Inatsisartut inatsisaat nr. 18, 31. oktober 1996-imeersoq kingornatigullu allannguutit atorunnaarsinneqarput.

Inatsisartut inatsisaat nr. 18, 31. oktober 1996-imeersoq naapertorlugu malittarisassat atuutilersinneqartut naalakkersuisullu aalajangiineri taarserneqarnissaasa imaluunniit malitarisassatigut allatigut atorunnaarsinneqarnissaasa tungaanut atuutiinnassapput.

Aalisarneq pillugu Inatsisartut inatsisaat nr. 18, 31. oktober 1996-imeersoq sioqqullugu malittarisassat atuutilersinneqarsimasut sulilu atuuttut malittarisassatigut uani imaluunniit Inatsisartut inatsisaanni allani alajangerneqartunik taarserneqarnissaasa atorunnarsinneqarnissaasaluunnit tungaanut atuutiinnassapput

Imm. 4-mut

Aalajangersaq § 26-p imarisaata allannguutaasa kinguneranik atuutilersinneqarpoq.

Aalajangersagaq ikaarsaariarnermi aalajangersakkatut isigineqassaaq. Aalajangersakkami siunertaq tassaavoq sinerissap qanittuani angallatit aamma avataasiornermi angallatit siunnersummi agguaanermut nutaamut naleqqussarnissamut nammattumik piffissaqartinnissaat. Inatsisip atuutilersinneqarneranit ukiunut tallimanut siumut nalunaaruteqarnissaq aalajangerneqarpoq, naliliisoqaporlu maannakkut agguaneq tassunga atillugu isiginiarneqarpat inuussutissarsiutip naleqqussarnissaanut piffissaq naammattoq.